

खास चेली के काम

भूमिका

चेली के कामु के बारे मुंझ लूका की लिखीएँ आच्छी खबरा के आगे के बारे मुंझ अ। ऐथुका प्रमुख उद्देश्य ऐजो बोलन। कि ईसा के सुरुआत के चलेएँ सुचा आत्मा के अगुवाई मुंझ ईसा के बारे खुस खबरीयाक “यरुसलेम अंर सारे यूदीया अंर सामरीय मुंझ अंर दुनिया के लाष्ट दुरी (1:8) कसा सुणाआ। ऐजा मसी आन्दोलन का विवरण अ जा यऊदी लोगु के बिचंदा सुरु अवा अंर बड़ी करी सारे दुनिया के लोगु का विसवास अणा। लिखनु वाड़ा ऐथु बाया का बी धियान राखं कि तेसके पढनु वाडीक ऐथु बाता का निषचय अला की मसी लोग रोमी सामराज्य के अरनी विद्रोई राजनैतिक सक्ति आनु ते, अंर मसी विसवास यऊदी दरम की पूर्ति ता।

चेली के कामु की किताब तीन भागु मुंझ संक बाटी जेई लागातार ऊबी बड़न मुंझ देखाव जेतुंदा ईसा मसी के खुस खबरीय का परचार करा अंर कलीसिया बाणी: 1) ईसा को सरग जाण के बाद यरुसलेम मुंझ मसी आन्दोलन कि सुरुआत, 2) ईसा ऐथु क प्रसार, अंर 3) भूमध्य सागर के देशुंदी अंर रोम दुरी ऐथु का प्रसार। चेली के कामु की एक महत्वपूर्ण विशेषता अ सुचा आत्मा कि क्रियाशिलत। वह पन्तकुस्त के दुस यरुसलेम कठे विसवासीयूच बड़े सामर्थ्य से उतरा अंर ऐथु किताबा पाण्डा लिखीएँ गटनाऊ के बिच मुंझ कलीसिया अंर तेथु के अगुवी कि परवी करं अंर तिऊक सामर्थ्य प्रदान करं। चेली के कामु के देईएँ कृतीई उपदेशु मुंझ सुआत मसी खबर का सारा प्रस्तुत देईएँ अंर ऐथु पाण्डी लिखीएँ घटना विसवासीयू के जिवन अंर कलीसिया सहभागिता मुंझ ऐथु खबरा की सामर्थ्य देखाव।

रूप-रेखा

गवाई के अरनी तयारी 1:1 - 26

क, ईसा की आखरी आज्ञा अंर प्रतिज्ञा 1:1 - 14

ख, यऊदा का उतराधिकारी 1:15 - 26

यरुसलेम मुंझ गवाई 2:1 - 8:3

यऊदिया अंर सामरिय मुंझ गवाई 8:4 - 12:25

पलुस के सेवा काम 13:1 - 28:31

क, पोईली परचार यात्रा 13:1 - 14:28

ख, यरुसलेम मुंझ सम्मेलन 15:1 - 35

ग, दुजी परचार यात्रा 15:36 - 18:22

घ, तिजी परचार यात्रा 18:23 - 21:16

च, यरुसलेम कैसरिया अंर रोम मुंझ बन्दी पलुस 21:17 - 28:31

जाण पछाण

1 ¹ओले थिऊपुलूस, में आपड़ी पोईलके किताबा पाण्डी सेजी सारी बाता राखी लिखी जेथुक ईसाएँ सुरु से करी अंर सीखाई अ।
²अंर जा लुगी ईसाक सरग मुंझ ना नेया ता लुगी सो आपड़े खास चेलीक सुचा आत्मा लेई ऊकम रा देन्दा लागी कि ‘तुवें का करनअ अ’
³अंर आपड़े मरनं के बाद ईसा आपड़े चेलीक देखाऊन्दा रा लागी अंर भरीसे पाके सबुत देने कि आऊँ पछी जिऊन्दा रा गोई।
सो चालीस दुस लुगी तिऊक देखुन्दा रा लागी अंर परमेस्वरअ के

राज्य के बारे में मुँझ बाता बोलदा रा लागी।⁴ एक बेरा जबी ईसाएँ तिऊँके सात खाणको तो लेओ खाई, तबी तेणे चेलीक ऐजा ऊकम देना कि, “तुवें यरुसलेमअ मुँझ रया अंर जा मेरे बाबाएँ वादा राखा करी तेथुक ठरीया, जेतुकी बाता तुवें मुँ बेरी राखी सुणी।⁵ यऊनाएँ त पाणी लेई नाईण ता देवअ पर किछ दुसु के बाद तुम सुचा आत्मा लेई नाईण पांदे।

ईसाक सरग लेजाआ

⁶जबी सो आपस मुँझ मिले तबी चेलीएँ पुछो, “ओ परभु, का तुऊँ ऐथु बखतअ इसराईली लोगु का राज पछी देंदा?”⁷ ईसाएँ तिऊँक बोलो, “तेथु गड़ी अंर तेथु तारीका के बारे में मुँझ जाणनअ तारा काम आथीना जेथुक मेरे बाबाएँ आपड़े अक से राखा ठईराई।⁸ अंर जबी सुचा आत्मा तुमुच ऊतरला तबी तुम सकित पांदे अंर यरुसलेम, पूरे यऊदिया, सामरिया अंर सारे दरतीयाच तुम मेरे गवा अंदे।”⁹ जबी तेणे ऐई बाता लाई ती लेई तबी तिऊँके आखी के सामणी तेसके ऊबा सरग मुँझ चुंगा अंर बादे लेई देखाऊणा ना।¹⁰ जबी तिवें दियान से ईसाक गईणीबा जांदुई ता लेया ऐरी तबी तिऊँके सामणी सुकले गटुण बीड़िएँ दुई मरद खड़े अरे।¹¹ अंर तिऊँक बोलो, “ओ गलीलियो, तुवें गईणीबो काई लागीए ऐरदे? तारे बिचंदी सरग मुँझ नेईएँ ऐस ईसाक जेसा तुवें सरग जांदुई देखा तेसाई सो पछी आंदा।

यऊदा के जागाच मतियाक छाण्टा

¹²तेथु के बाद सेजे चेले जेतुन नांव के टीराचि यरुसलेम आये। ऐजी टीर यरुसलेमअ से करीब एक किलोमिटर दुरे ती।¹³ तेकी पोऊछी करी पतरस, यऊना, याकूब, अन्द्रीयस, फिलिपुस, थोमा, बरतुमे, मती, अंर अलफाई का बेटा याकूब, देस बगत सेमोन अंर याकूब का बेटा यऊदा तेथु कुड़े के ऊछले पुरे नठे जेतु पुण्डे सो रुकीएँ ते।¹⁴ योऊँ सबीयाएँ एक मन अई करी पराथना ते करं अंर ईऊँके सात किछ बेटकुड़ीया अंर ईसा की ईजी मरियम अंर तेसके बाई बी ते।¹⁵ तेथु के बाद एक दुस जबी करीब एक सो बिस बिसवासी लोग कठे ते अईएँ तबी पतरसएँ तिऊँक खड़े अई करी बोलो,¹⁶ “ओ बाईओ, ऐजो जरुरी तो कि दरम सास्तर की सेजी भविस्वबाणी पुरी अली जेई सुचा आत्माई यऊदा के बारे में मुँझ

दाऊदअ बेरी ती बोलाई कि, 'यऊदा ईसाक पकड़वाण मुंझ आगीण्डा रंदा।' ¹⁷अंर सो आमुई मुंझी एक ता अंर ऐथु सेवा मुंझ बी सो सातेई ता। ¹⁸तेणे बेईमानी के पईसी लेयाई एक डोखरो गाडो अंर सो तेथुई डोखरे पुण्डा उसना पड़ा अंर तबी तेसकी पोटी फुटी करी सारी आन्दीया भाण्डी आई। ¹⁹अंर यरुसलेम के सारे लोगुंक ऐथु बाता का पता चला ऐथु अरनी तिऊँकी बोलीया मुंझ तेथु डोखरेक 'अकलदमा' बोलो, जेथुका मतलब अ 'लोई को डोखरो।' ²⁰काईकी भजन संईता के किताबा पाण्डो ऐसो लिखीएँ कि,

'तेसको गर उजड़ी नठदो अंर तेथु पुण्डा कुणीएँ ना सकदा रई अंर ऐसो बी लिखीएँ कि, तेसकी जागा कुणीएँ ओका आदमी लेंदा,'

²¹⁻²²ऐथु अरनी ऐजो जरुड़ी कि जीछे दुस परभु ईसा आमारे सात रा, मतलब यउना के नाईण से लेई करी तेसके आमारे बिचंदी ऊबा सरग मुंझ ना नेजा जे लोग सदा आमारे सात रे। तिऊँई मुंझी कुणीएँ परभु के पछी जीणअ का आमारे सात गवा अला त ऐजो आछो अंदो।"

²³तबी तिवें दुई आदमीक छाटे, एक युसूप जेसके बरसबा ते बोलअ अंर तेसके यूसतुस के नांव से बी ते पछाण अंर ओका मतीआ ता। ²⁴तबी चेलीएँ पराथना करदुई बोलो कि, "ओ परभु तु सबु के जियकी जाणे, अंर आमुक ऐजो दे देखाई कि ईऊ दुऊँ मुंझी कसके छांटना। ²⁵जो यऊदा के जागांच तेरी सेवा एक खास चले के रुप मुंझ करला काईकी यऊदा ऐथु कामक छोडी करी तेथु जागांच नठा जेथु जोगा सो असअ ता। ²⁶तबी तिवें युसूप अंर मतीआ के नांव कि टाया गेरी अंर परचि मतीआ के नांव कि आई। अंर सो तिऊँ गियारअ खास चेली के सात गिणूणा।

सुचा आत्मा को आण

2¹जबी पेन्तीकुस नांव को तियार आओ तदुस सबीयाईएँ एकअ जांगाच ते कठे अईएँ। ²तबी एकदम गईणी बी जोर से ढण्ड बात भणअ की बासा सुणुणी अंर सारो बितर गुजंदो लागो जेथु पुण्डे चले ते बेठीएँ। ³अंर तिऊँक आगी की लया जेसी देखाऊणी अंर तिऊँच सबूच आई करी रुकी। ⁴अंर तबी सो सबीयाएँ सुचा आत्मा लेई बरुई नठे अंर तेथुके जोर से सो ओकी-ओकी बोली बोलदे लागे।

⁵जे यऊदी बगत तला यरुसलेम मुंझ ते रे आई सेजे दुनीयां के ओके ओके मुलकअ के रण वाड़े ते। ⁶जबी सेई बास सुणुणी तबी बेजाई आदमी कठे अणे अंर सबुएँ आप-आपड़ी बोली सुणी करी डरी नठे। ⁷तबी सेजे सुणनअ वाड़े चचकुई रे अंर ताजुब मुंझ पड़ी करी बोलदे लागे, “का ऐजे सारे बोलनअ वाड़े गलील के रणवाड़े आथीना? ⁸तबी आमे ईऊँ सबु बेरी आप-आपड़ी बोली कसी लेई सुणी? ⁹जे आमे पारथी, मेदी, एलामी, मोसोपोटामिया के रणु वाड़े, अंर यऊदिया, कप्पूदूकिया, पुन्तुस, आसिया ¹⁰अंर फ्रिगिया, पंफुलिया, मिसर, अंर लीबीयां देसअ जो कुरेन के नजदीक अ। अंर जे रोम के यऊदी अंर यऊदी दरम माननं वाड़े, ¹¹अंर क्रेती, अंर अरब के रण वाड़े आम सबु लोगुएँ आप-आपड़ी बोली मुंझ परमेस्वरअ के बड़े कामु के बारे मुंझ ईऊँ बेरी कसो लेओ सुणी?” ¹²अंर सो सबीयाएँ ताजुब मुंझ पड़े अंर डरी करी आपस मुंझ बोलदे लागे कि, “ऐओ का लागो अई?” ¹³पर किछ लोगुएँ तिऊँ बिस्वासी लोगुं का मजाक ता लेया भाणी अंर बोलदे लागे कि, “ईऊँक माता सुरा का माच रा लागी।”

पतरस का बासण

¹⁴तबी पतरस तिऊँ गियारूँ खास चेली के सात खड़ा अणा अंर सो जोर से लोगुंक बोलदा लागे, “ओ यऊदी अंर यरुसलेम के सब रण वाड़े. लोगो मेरी बात कानु खोली करी सुणो अंर ऐजो जाणी करो कि ¹⁵ऐजे लोग पिएँ आथीना, जेसो तुवें सुची लेओ, काईकी ऐबी त माता रातीएँ का बखत अ। ¹⁶ऐजी सेजीई बात अ जेतु के बारे मुंझ परमेस्वरअ के बांकी योएलई तो बोलो।

¹⁷‘परमेस्वरएँ बोलो कि, ‘आखरी बखत अ मुंझ ऐसो अंदो कि आऊँ आपड़ी आत्मा सारे आदमीच उतारदा अंर तारे छोरे, छोरियाँ परमेस्वरअ के बाताक लोगुं बेर पोछान्दे, अंर जुवान लोगुंक दरसन मिलदा अंर तारे बाटबाठे सुईने देखदे। ¹⁸आऊँ तेथु दुसू मुंझ आपड़े दास अंर दासियाऊँच आपड़ी आत्मा उतारदा अंर सो बी परमेस्वरअ कि बात पोछान्दे। ¹⁹अंर आऊँ ऊगले गईणी बे चमतकार के काम अंर निंगले दरतीयाच ताजुब के काम करदा। तेथु दुसु मुंझ लोई, आग, दुवें अंर बादअ के चिन देखदे। ²⁰दुस ईनीयारे मुंझ अंर जुन लोई मुंझ बदलुंदी तेथु के बाद

परभु को आछो अंर खास दुस आंदो।²¹ अंर तबी सेजेई लोग बचदे जो परभु से मदत मांगले।

²²ओ इस्राएली लोगो मेरी बात सुणो, ईसा नासरी एक ऐसा आदमी ता सो परमेस्वरअ के तरफ से ता रा आई अंर तारे सामंणी चिन, चमतकार अंर ताजुब के काम करी करी ऐजी बात साबीत बी करी। ऐथु बाता तुवें आपु बी झाणं अ।²³ परमेस्वरएँ ईसा के आस्ते जेसी योजना पोइलेई ती राखी भाणी तेथुके अनुसार ईसाक तारे आतन्दा देना पकड़ाई अंर तुवें कचले आदमीऊँ की मदत से तेसके कुरुसच टंगाई करी मारी गेरा।²⁴ पर परमेस्वरएँ तेसके मोती के आतंदी छोडाई करी पछी जिऊँदा भाणा। काईकी ऐजो अई नु तो सकी कि ईसा मोती के वस मुंझ रन्दा।²⁵ दाऊदएँ बी तेसके बारे मुंझ ऐसो बोलो कि,

‘में परभुक अमेसा आपड़े सामणी देखा, अंर सो मेरे सात अ, जो आऊँ अइबड़ाई नू नठमा।²⁶ ऐथु अरनी मेरो जीऊँ अंर मेरी बोली खुसी से बरुणी अंर मेरा सरीर बी उमीद मुंझ जीन्दो।²⁷ काईकी तू मेरे आत्माक तईले जुगअ रणई ना देंदा, अंर ना तु आपणे सुचे बगतअ के लासाक सड़नई देंदा।²⁸ ते मुखे जीणअ कि बाट देखाई अंर ताऊँ ढाया रई करी मुखे पूरी खुसी मिलदी।

²⁹ओ मेरे बाईओ, आऊँ बरोसे के सात बोलु कि, आमारा बाठा दाऊदक मरी करी दाबी देना अंर तेसकी कबर ऐला दुरी आमारे ऐकी अ।³⁰ राजा दाऊद परमेस्वरअ का बाकी ता अंर तेस बेर परमेस्वरएँ ऐजी बात कसम खाई करी ती राखी बोली कि, आऊँ तेरे खान्दानी मुंझी एकक राजा बाणी करी तेरे जागाच बेठांदा।³¹ ऐथु अरनी जेई बाता पोइलेई अणवाड़ी ती तेथुक देखी करी मसी के पछी जीण के बारे मुंझ बोलो कि, “सो ना त तईले जुग रदां अंर ना तेसकी लास सड़दी।³² ऐसीई ईसाक परमेस्वरएँ पछी जीऊँदा बाणा जेतु के आमे सबीयाएँ गवा अ।³³ ऐथु अरनी तेणे ईसाएँ परमेस्वरअ बेरी सबुसे बडी जागा पाई अंर तेसके धईने बीला गा बेठी। अंर तेसके सेजी आत्मा देनी जेथु देण का परम बाबाएँ वादा ता करा। अंर तेणे तेथु

आत्माक आमुच देनी ऊडाई जेथु तुवें देखी अंर सुणी अ।
³⁴दाऊद आपु त सरग मुंझ नठा ना पर तेणे बोलो कि,
 'परभुएँ मेरे परभुक बोलो कि, मेरे दर्इने बिला जा बेठी ³⁵जा
 लुगी आऊँ तेरे दुसमनुक तेरे गोडी थाले नु देमा करी।'
³⁶"ऐथु अरनी सारे इस्राएली लोगो ऐजो जाणी करो की
 परमेस्वरएँ ऐस ईसाक 'परभु' अंर 'मसी' ता राखा ठडराई, जेसके
 तुमे कुरुसच ता टांगा।" ³⁷तबी सुणनअ वाड़ी के जीऊँ फुटी नठे अंर
 तीवें पतरस अंर ओर चेली बेरी पुछो कि, "ओ बाईओ, आमे का
 करनअ?" ³⁸तबी पतरसएँ तिऊँक बोलो कि, "गलत कामु से आपडो
 जीऊँ पछी बोऊडाओ अंर ईसा मसी के नांव से नाईण लेओ, तबी
 परमेस्वरअ तारे पापुक माफ करदा अंर तुऊँक सुचा आत्मा का
 बरदान देन्दा। ³⁹काईकी ऐजा बादा तारे अरनी, तारे अलादी के
 अरनी अंर तिऊँ सबु के अरनी अ जे ईबी दुरे अ। अंर तिऊँके
 अरनी बी अ जीऊँक आमारा परमेस्वर आपु डाय़ा बोईदणे सुचंअ।
⁴⁰अंर तेणे ओर बी भरिसे बातु लेयाई तिऊँक चोकस करे अंर ऐजी
 अरजी करी कि ऐथु खराब पीड़ियाच जेई मुसिबत आण वाड़ी अ
 तेथु से आपुक बचाई राखो।" ⁴¹जीऊँ लोगुएँ तेसकी बात मानी तिवें
 नाईण करा अंर तदुसेई तीन अजार के करीब आदमी तिऊँ के सात
 मिले ⁴²जे नवें लोग बिस्वास ते करअ सो चेली की बात ते सुणअ
 अंर आपस मुंझ मिलदे जुलदे ते रअ लागी अंर परभुक आद
 करनअ के आसते सातीई कोदुवें ते तोड़अ, अंर पराथना करदे ते
 रअ लागी।

बिस्वासियूँ की जिन्देगी

⁴³सारे लोगुच डर ता रअं छाऊँवी काईकी चले बड़े बड़े काम
 अंर चिन ते देखाव। ⁴⁴सारे बिस्वासी लोगुं कि आपस मुंझ मेल ती
 अंर तिऊँकी सारी चिजा साजी ती। ⁴⁵अंर सो आपणी जमीन अंर
 जाईदाद बीकी करी जेसी जेसके जरूरत ती पड़अ, तेसके तसोई ते
 देवं। ⁴⁶सो सबीयाएँ रोज मन्दिर पुण्डे कठे ते अं, अंर दारके -
 दारके जाई करी कोदुवें ते तोड़अ अंर एक मन अई करी तेथुक
 खुसी अंर नीछडे. जीयं से ते खर्चिएजे लोग परभु कि बड़ाई ते
 करअ अंर सारे लोग ईऊँक आछे ते मानअ अंर रोज जे लोग
 परभुच बिस्वास ते करअ तिऊँ परभु चेली के सात ता देवं मिलाई।

लंगड़े बिकारी को आछो जाण

3¹गमा नई करी पतरस अंर यऊना पराथना के बखते तीन बजे मन्दिरअ पुण्डे ते लागीं जान्दे। ²तेकी एक आदमी ता जा जनम से लुँजा ता अंर तेसके लोग रोज मन्दिरअ के बाँके गेट ढाई ते देवं बेठाई कि सो मन्दिरअ पुण्डे जाण वाड़े लोगु बेरी बिक सकला मांगी। ³जबी तेणे पतरस अंर यऊनाक मन्दिरअ पुण्डे जान्दुई देखे तबी तेणे बिकारीं तिऊँ बेरी बीक ती लेई मांगी। ⁴तबी तिवें तेसके बिला दियान से ऐरो अंर पतरसएँ बोलो कि, “तु आमारे बिलाक ऐर।” ⁵अंर सो तिऊँके बीला ऐथु अरनी लागा ऐरदा कि मुखे किछ देन्दे अ। ⁶तबी पतरसएँ बोलो कि, “मुँ बेर ताऊँखे देणक पर्ईसे त आथीना, पर जो किछ मुँ बेर अस अ सेजो आऊँ ताऊँखे देई देवं, तु नासरत के ईसा मसी के नांव से ऊजु अंर हाण्ड।” ⁷तबी पतरसएँ तेसका दर्ईना आत पकड़ी करी ऊबा ऊजीया अंर तलाई तेसके गोडी अंर गोडी के डेमणीन्दी जान आई। ⁸अंर सो एक दम से खडा अणा अंर फोऊटीया मारी मारी करी परमेस्वरअ की बड़ाई करदा लागा अंर तिऊँके सात मन्दिरअ पुण्डा नठा। ⁹अंर सारे लोगुई तेसके हाडण्डुई अंर परमेस्वरअ की बड़ाई करदुई देखा। ¹⁰अंर लोगुएँ तेसके पछाणी गाला कि ऐजा त सेजाई आदमी अ जा मन्दिरअ के बाँके गेटअ ढाया बेठी करी बीक ता मांगअ। अंर जेई बात तेसके सात गटी तेथुक देखी करी लोग चचकुई अंर ताजुब रे मानी।

मन्दिरअ पुण्डा पतरसअ का बासण

¹¹जबी तेणे पतरस अंर यऊना का आत ता राखा पकड़ी तबी सारे लोग ताजुब रे मानी अंर दोऊँड़ी करी तेथु चोबारे ढाया नठे जेथुक सुलेमान का चोबारा ते बोलअ। ¹²जबी पतरसएँ ऐजो देखो तबी तेणे लोगुंक बोलो कि, “ओ इसराली लोगो तुवें ऐथु बाता देखी करी ताजुब काई रे मानी? अंर आमारे बिला गुरी गुरी करी काई लागीं ऐरदे? आमै का आपणे सक्तिया अंर भक्तिया लेई ऐस आदमीक हाण्डन जोगा भाणा? ¹³ईबराइम, इसाक, याकुब अंर आमारे बाटबाठी के परमेस्वरएँ, आपड़े सेवक ईसा मसीक ईजत अंर सम्मान देना। पर तुवें तेसके पकड़ी करी पिलातुस ढाया नेया अंर जबी तेणे ईसाक छोड़नक बोलो तबी तुवें तेसकी बात मानी ना।

¹⁴तुमे तेस दरमी अंर सुचा आदमी छोड़नक मना करो अंर एक खुनी छोडाणअ कि मांग करी। ¹⁵तुमे जिणअ की बाट देखाण वाड़ेक मारी गेरा जेसके परमेस्वरएँ मरीएँ मुंझी जिऊँदा भाणा अंर आमे ऐथु बाता के गवा अ। ¹⁶जेस आदमीक तुवें देखी लेया अंर ऐसके तुवें झाण बी अ। ऐस आदमीएँ ईसा मसीच बिस्वास करा अंर ईसाएँ ऐसके तागत देनी। जा बिस्वास ईसाच करा तेथुई बिस्वासई ऐस आदमीक पुरे डंग से आछा भाणा।¹⁷ओ बाईओ, आऊँ ऐजी बात झाण अ कि तारे नेताऊँ जेसा तुवें बी ऐजा काम अणजाणे मुंझ करा। ¹⁸काईकी मरमेस्वरएँ आपड़े सारे बाकीयूँ बेरी पोइलेई तो राखो बोलाई कि मसी दुख ऊठान्दा। तेथु बाताक मरमेस्वरएँ ऐथु डंग से पुरी करी। ¹⁹ऐथु अरनी गलत कामु से आपणअ जीऊँ पछी बोऊड़ाओ अंर परमेस्वरअ के बिला आओ, सो तारे पापुक माफ करदा। ²⁰अंर परभु के सामणी तारे सुख अंर चेणा के दुस आन्दे। अंर तबी सो तारे अरनी ईसाक बेजदा जा पोइलेई मसी ठईराईएँ। ²¹काईकी मसीक ता लुगी सरग मुंझ पड़दो रण जा लुगी सारी बाता पोइले जेसी नू जाली अई, जेई बाता परमेस्वरएँ पोइलेएँ अपड़े सुचा बाकीयूँ बेरी ती राखी बोलाई। ²²मुसाएँ बोलो,

“परभु परमेस्वर तारे भाई मुंझी तारे आस्ते मुँ जेसा एक बाँकी बेजदा अंर जेसो सो तुमुक बोलला तुवें तेसोई करीया।

²³अंर जा आदमी तेस बाँकी कि बात नू मानला तेसके तेस बाँकी के लोगु मुंझी खतम देया करी।”

²⁴सेमुएल अंर जे तेसके बाद ओर बाँकी आएँ, तिवें ऐथुई दुसु के बारे मुंझ तो बोलो।

²⁵तुवेंई त बाकीयूँ अंर तेथु बादे के अक दार अ जेथुक परमेस्वरएँ तारे बाटबाठी के सात ता करा। तेणे ईबराइमक ऐसो तो बोलो कि, “दरतीयां के सारे लोगुंके तेरे खान्दानी लेई आसीस मिलदी। ²⁶परमेस्वरएँ जबी आपड़े सेवकक पछी जिऊँदा भाणा, तबी सबसे पोइले तेसके तुऊँ ढाया बेजा कि तारे बुरे काम छोडाई करी तुऊँक आसीस देला।

पतरस अंर यऊना यऊदी नेताऊँ के सामणी

4¹जबी पतरस अंर यऊना बेटागन्दे बातु लांदे ते लागीएँ तबी किछ पोरोईत, अंर मन्दिरअ के सिपाईयूँ का स्याणा अंर सदुकी लोग तिऊँ ढाया आए। ²अंर तिऊँक पतरस अंर यऊनाच

बेजाई गुसा आ, काईकी तिवें लोगुंक ईसा के मरनअ अंर पछी जिणअ के बारे मुंझ तो लेओ बोली कि आदमी मरी करी पछी जिऊँन्दे जाव। ³अंर तिऊँ लोगुएँ चेलीक पाकड़ी करी गटी देने अंर दोतके दुरी आपड़े कब्जे मुंझ राखे। काईकी तला पाछा का बखत ता रा अई। ⁴अंर जिऊँ लोगुएँ तिऊँकी बात सुणी तेथु मुंझी भरी लोगुएँ तिऊँके बाताच बिस्वास करा अंर मरदु कि गिणती करीब पाँच अजार पोऊँछी। ⁵दोतको ऐसो अणअ कि यरुसलेम मुंझ तिऊँके नेता, बाठ बाठे, अंर सास्त्री कठे अणे। ⁶अंर तबी बड़ा पुजारी अन्ना, तेसके कबीले के लोग, कैफा, यऊना, अंर सिकेन्दर तेवड़े ते। ⁷अंर तिवें खास चेलीक बिचंदे खड़े करी करी पुछो कि, तुवें ऐजा काम कसके अक अंर सक्तिया लेई करा।”

⁸तबी सुचा आत्मा लेई भरुई करी पतरसएँ तिऊँक बोलो, “ओले बाटबाठीओ अंर नेताओ, ⁹जो तुवें आमु बरी ऐला एक लंगड़े आदमी के सात करीएँ बलाया के बारे मुंझ लेओ पुछी कि योऊँ आछा कसा गोणा? ¹⁰पर तुवें सबीयाएँ अंर इस्राएल के लोग ऐजो झाणी करो कि ऐजा काम नासरी ईसा मसी के नांव से अणा, जेसके तुवें कुरुसच ता टांगा अंर परमेस्वरएँ तेसके मरीएँ मुंझी जिऊँदा भाणा। अंर तेसी लेई ऐजा आदमी ठीक गोवा अंर तारे सामणी खड़ा अ।

¹¹‘ईसा सेजोई ढोक अ जेथुक तुवें राजमिसत्रीएँ बेकार तो झाणअ पर सो कण्डारे को ढोक बणो।’

¹²मोक्स कसी ओरू के बीलाई मिलदा ना, अंर आमारे बचनअ के आस्ते दुनियान्दो ईसा के सिवा ओको कोई नांव ना आथी।” ¹³जबी तिवें पतरस अंर यऊना की ईमत देखी अंर ऐजा पता लागा कि यओ डंग से पड़ीई बी आथी ना अंर सिदे सादे लोग अ, तबी सो ताजुब रे मानी। तबी तिऊँक ऐजा पता लागा की यओ ईसा के सात ते रअ। ¹⁴अंर जबी तिवें पतरस अंर यऊना के बिला तेस ठीक अईएँ आदमीक खड़ा देखा तबी तिवें ईऊँके खिलाप किछ ना सको बोली। ¹⁵तबी तिवें पतरस अंर यऊनाक बेटागंदी धुर जाणक बोलो अंर आपस मुंझ ऐजो ठाटदे लागे कि, ¹⁶“आमे ईऊँ आदमी के सात का करनअ अ? काईकी यरुसलेम के सब रणअ वाड़ीक ऐजा पता लागी ता रा कि ईऊँ लोगुएँ बड़े ताजुब के काम ले करी, जेथुके आस्ते आमे मुकरी बी सकी ना। ¹⁷पर आमे ईऊँ लोगुंक दमकाई करी बोलमे कि, तुवें ईसा के बारे मुंझ कसी बेर नु

बोलीया, जो ऐजी बात ओर लोगु बेर नु फईली।” 18तबी तिऊँ लोगुएँ पतरस अंर यऊनाक बेटागन्दे पछी बोइदी करी बोलो, “ईसा के नांव से ना त किछ सिखाया अंर ना किछ बोलीया।” 19तबी पतरस अंर यऊनाएँ जबाब देना, “तुमेई फेसला करो कि परमेस्वरअ के नजर मुंझ का ठीक अंदो? आमे परमेस्वर की बात माननी कि तारी? 20काईकी ऐजो अई ना सकी कि जो आमे देखो अंर सुणो अ, तेथुक ओरु बेर नु बोलमे। 21तबी बेटांगअ के लोगुएँ तिऊँक ओर धमकाई करी छोड़ी देने अंर तिऊँक सजा देणअ का कोई भाना ना मिला। काईकी तेथु काम देखी करी लोगुएँ परमेस्वरअ की बड़ाई ती लेई करी 22अंर जेस आदमीच ऐजा आछे जाणअ का चमतकार अवा तेसकी उमर चालीस साल से जादा ती।

बिस्वासियूँ की पराथना

23जबी तिऊँक छोड़ी गाले तबी सो आपड़े लोगु डाय़ा आए अंर जो किछ बड़े पुजारीयूँ अंर यऊदी बाटबाठीएँ बोली तो राखो सेजो सब तिऊँ बेर बोलो। 24जबी तिवें ऐजी बाता सुणी तबी सारे लोग एक मन अई करी पराथना करदे लागे अंर परमेस्वरक बोलो कि, “ओ मालीक, गर्इण, दरती, समुन्दर, अंर तेथु बितोड़ी जो किछ असं अ सेओ सब तेई भाण। 25तेई सुचा आत्मा लेई आपड़े सेवक अंर आमारे पूर्वज दाऊदअ बेरी बोलाओ कि,

जे यऊदी ना आथी तिऊँ मुंझ खलबली काई माचिएँ? अंर लोग बेकार की बाता काई लागीएँ सोचदे? 26परभु अंर तेसके मसी के बिरोद मुंझ दरतिया के राजा खड़े उजुणे अंर अधिकारी एक सात कठे अऐ।”

27काईकी ऐरोदेस अंर पुन्तिऊस पिलातुस ऐथुई सईरके ओके जाती अंर इसरालीऊँ के सात मिली करी तेरे सुचा सेवक ईसा के बिरोद मुंझ कठे अणे जेसके तेएँ मसी के रुप मुंझ ता राखा छांटी। 28अंर जो किछ तेरी मरजी अंर सक्तियां लेयाई पोईले तो ठड़राईएँ सेजोई करनअ के आस्ते सो कठे अणे। 29ओ परभु ऐबे तुँ तिऊँकी दमकीयाऊँच दियान दे, अंर आपड़े सेवकुक बगर डरे बचन सुणाण कि इमत दे। 30लोगुक आछे भाणनअ के आस्ते तु आपणा आत बड़ा, जो चिन अंर ताजुब के काम तेरे सुचा सेवक ईसा के नांव से अले। 31जबी तिवें पराथना करी गाली तबी सेजी जागा इली नठी

जेवड़े सो कठे ते अईऐं अंर सुचा आत्मा लेई सो बरुई करी बीना डरे परमेस्वरअ का बचन सुणांदे लागे।

बिस्वासीऊँ की मेल

³²बिस्वासीऊँ कि आपस मुंझ बेजाई मेल ती अंर तिऊँ मुंझी कुणीऐं बी आपणे चीजाक आपणी नु ते बोली पर सारी चीजा साजी ती। ³³अंर खास चले बड़ी सक्तिया लेई परभु ईसा के पछी जिण की गवाई ते देवं अंर सबूच परमेस्वरअ कि बेजाई बरगत ती।

³⁴तिऊँ मुंझी कसीक बी किछ कमी नु ती आथी काईकी जेस कसी बेर बी डोखरो या कूड़ो तो सो तेथुक बिकी करी तेथु की रकम खास चेली बेर ते देवं देई, ³⁵अंर जेसी जेसके जरवत ती पड़अ तेसोई ते बांटअ।

³⁶कुपरुस जागा का एक लेवी ता जेसको नांव इसुप तो अंर चले तेसके बरनाबास ते बोलअ जेथु का मतलब अ, इमत बड़ाण वाड़ा बेटा। ³⁷तेसकी किछ जमीन ती जेतुक तेणे बिकी देनी अंर तेथुकी रकम खास चेली बेर देनी देई।

अनया अंर सफीरा

5¹अनया अंर सफीरा नांव के दुई जोरु खुवान्द तें अंर तिवें आपणी किछ जमीन बिकी करी ²तेथु मुंझी किछ पईसे तिऊँ धुवें सलाई करी करी आपु बेर राखे अंर बचीऐं सारे पईसे खास चेली बेर देने। ³एथु बाताच पतरसऐं बोलो कि, “ओ अनया जमीना के रकमा मुंझी किछ बचाणअ के अरनी दुष्टांगऐं तेरे जियंदी ऐई बात काई गेरी कि तें सुचा आत्मा बेर जुटी लेई लाई? ⁴का सेजी जमीन बिकनअ से पोईले तेरी आथी नु ती? अंर बिकनअ के बाद बी सेजे पईसे तेरे आथी नु ते? तें आपड़े जियंदी ऐई बात काई सोची? तें आदमी बेर ना पर परमेस्वरअ बेर जुटी लाई। ⁵ऐई बात सुणी करी अनया रुड़ी पड़ा अंर पराण देने छोडी अंर जिऊँ लोगुंऐं ऐजी बात सुणी सो बेजाई डरी नठे। ⁶तबी जुवान छोरीऐं आई करी तेसके आडे बितोड़ी लपेटा अंर बाण्डा नेई करी दाबी देना। ⁷करीब तीन गन्टे के बाद तेसकी जोरु बितरे आई अंर तियांक एथु बाता का किछ बी पता नु ता आथी। ⁸तबी पतरसऐं तियांक बोलो कि, “तु मुं बेर ऐसो दे बोली कि, का तुवें सेजो डोखरो ईछेई मुंझ बीको?” तियाँई बोलो कि, “अँ आमे ईछेई मुंझ बिको।” ⁹तबी

पतरसएँ तियांक बोलो कि, तुवें दुयाएँ परभु की आत्मा परेखनक एक काई अएँ? देख तेरे खुवान्दक दाबनअ वाड़े ऐबी दारन्दे रे पोऊछी अंर सो ताऊँखे बी चुंगी नेंदे। ¹⁰तबी सो तेसके गोडी मुंझ रुड़ी करी मरी नठी। जबी जुवान छोरे बितरे नठे अंर तियांक मरीएँ देखी करी चुंगी नेंई अंर जेकी तियांके खुवान्दक ता राखा दाबी तेवड़ी तियांक बी दाबी देनी। ¹¹तबी सारे बिस्वासी लोग अंर जीऊँवे ऐजी बात सुणी तीऊँच डर नठा छाऊँई।

खास चेलीएँ लोगुंक आछे भाणे

¹²खास चेली लेई भरी सारे चिन अंर ताजुब के काम लोगु के बीचंदे ते लागीएँ अन्दे अंर सारे बिस्वासी लोग मिलदे जुलदे मन्दिरअ के चोबारे पुण्डे ते जांव, जेथुक सुलेमानं का चोबारा ते बोलअ। ¹³अंर ओके लोगुंक तिऊँके सात मीलनअ की इमत नु ती अई। पर लोग तिऊँकी तारीफ जरुड़ ते करअ। ¹⁴अंर तेकी परभुच बिस्वास करनअ वाड़े मरद अंर बेटकुडीया भरी ते लागीएँ बड़दे। ¹⁵लोगुंक ईछा बिस्वास ता रा अई कि सो आपणे बिमारुक खाटाऊँच अंर सातरच लेई करी बाटांदे ते देवं सुताई, की जबी पतरस या बाहू जाला तबी तेसकी छाईल ईऊँच पड़ली अंर योऊँ ठीक जाले अई। ¹⁶अंर यरुसलेम के नजदीक मुंझ जे बी सईर ते तेकीई बी भरी बिमार लोगुंक, अंर जीऊँ पाण्डो दुष्टांग तो लागीएँ लेई करी ते आंव अंर सबीयांई ठीक ते लागीएँ जान्दे।

खास चेलीच मुसीबत

¹⁷तबी बड़े पुजारीएँ अंर तेसके सात के सद्की लोग खास चेली से जअं ते ऐथु आस्ते सो तिऊँके बिरोद मुंझ खड़े अणे। ¹⁸तबी तिवें चेलीक पाकड़ी करी जेला पुण्डे देने गेरी। ¹⁹पर रात परभु के एक सरगदुतएँ जेला को दार खोली करी तिऊँक भाण्डे नेजाएँ अंर बोलो कि, ²⁰“जाई करी मन्दिरअ पुण्डे खड़े ओ, अंर ऐथु नए जिन्देगीया के बारे मुंझ लोगु बेर देओ बोली। ²¹ऐजी बात सुणी करी खास चेले रातीएँ बखतअ मन्दिरअ पुण्डे नठे अंर लोगुंक सिखान्दे लागे।

पर बड़े पुजारीएँ अंर तेसके सातीवें यऊदी अंर इस्राएलीऊं के बाटबाठी बोर्डेदी करी एक बेटांग करो। अंर तिवें जेला पुण्डी चेलीक भाण्डे लेण के आस्ते आपणे आदमीऊँक भेजे। ²²जबी चोकिदारुक

खास चले जेला पुण्डे मिले ना तबी तिवें आई करी ऐई खबर बेटांग वाड़ीक देनी अंर बोलो कि, ²³जबी आमे जेला ढाया पोऊँछे तबी आमे देखो कि सारे ताड़े लाईएँ अ अंर चोकीदार दारन्दे खड़े अ। पर जबी आमे दारअ खोली करी बितरे नठे तबी आमुक तेथु पुण्डे कुणीएँ ना मिले। ²⁴जबी मन्दिरअ के चोकिदारु के स्याणे अंर बड़े पुजारीयूँ ऐजी बात सुणी तबी तिऊँक तेथु बाताक सुणी करी सुंच बेठी की, “ऐब का अंदो।” ²⁵तबी कुणीएँ आदमीएँ बितरे आई करी बेटांग वाड़ीक बोलो कि, “जिऊँ लोगुंक तुमे जेला पुण्डे ते राखे गटी सो मन्दिरअ पुण्डे लोगुंक सीखान्दे लागीएँ।” ²⁶तबी मन्दिरअ के चोकीदारु के स्याणे चोकिदारुक आपणे सात नेएँ अंर खास चेलीक प्यार से पछी ले, काईकी सो लोगु से ऐसे ते डरं की कदी पथराब नु चाएँ करा। ²⁷तिवें खास चेलीक बितरे नेई करी यऊदी बेटांग के बिचंदे खड़े करे अंर बड़े पुजारीएँ तिऊँ बेरी पुछो अंर बोलो कि,

²⁸“आमे तुमुक ऐथु नांव से सिखाणअ के आस्ते कड़ा ऊकम ता राखा देई, पर तुवें सारे यरुसलेम मुंझ ऐथु बाता का परचार लागीएँ करदे अंर तेस आदमी के मोती के जुमेदार बी आमुक ले ठईराई।” ²⁹तबी पतरस अंर ओके खास चेलीएँ जबाब देना अंर बोलो कि, “आमुक आदमी से जादा परमेस्वरअ की बात माननी जरुड़ि अ। ³⁰अमारे बाटबाठी के परमेस्वरएँ तेस ईसाक पछी जिऊँदा देना भाणी जेसके तुवें कुरुसच टांगी करी ता मारा। ³¹अंर तेसकेई परमेस्वरएँ परभु अर मोक्स देण वाड़ा ठईराई करी आपणे धईने बीला बेठा। जो सो इस्राईली लोगु को गलत कामु से पछी जिऊँ बोऊँडाला अंर तिऊँके पाप माफ सकला करी।

³² ऐथु बाता के आमे गवा अ तेसाई सुचा आत्मा बी जेथुक परमेस्वरई आपणे ऊकम माननअ वाड़ीक राखा देई।”

³³जबी बेटांग वाड़ीएँ ऐजी बात सुणी तबी सो आग बबूला नठे अई अंर तिवें चेलीक मारने सुचे। ³⁴तबी बेटांगन्दा गमलिएल नांव का एक फरीसि आदमी खड़ा अणा जो दरमसास्त्र का गुरजी बी ता अंर सारे लोग तेसकी इजत ते करअ। तेणे बोलो कि, “किछ बखतअ के अरनी ईऊँ चेलीक भाण्डे देओ बेजी।” ³⁵तबी तेणे बेटांग वाड़ीक बोलो, “ओ इस्राएल के लोगुओ तुमे जो ईऊँ चेली के सात करनअ सुचअ सेजो सोची समझी करी करो। ³⁶काईकी किछ साल पोईले थैऊदास बी आपुक बड़ा ता समझअ अंर करीब चार सो

आदमी तेसके सात ते। जबी तेसके मारी गेरा तबी तेसके सातअ के बी भागी नठे अंर तेसको नांव निसान बी मिटी नठो अई।
³⁷ऐथुई डंग से जबी जनगणना ती लागीएँ अन्दी तबी गलील का रणअ वाड़ा यऊदा बी आपुक ऐसनाई ता समझअ अंर तेणे बी किछ लोगूंक आपड़े बिला नेएँ। जबी तेसके मारी गेरा तबी तेसके सातअ के बी भागी नठे। ³⁸ऐथु अरनी आऊँ तुऊँक ऐसो बोलअ कि, “ईऊँ लोगु से दुरे रो अंर ईऊँ से किछ मतलब नु राखीया काईकी जे ऐजा काम आदमी के बिलाई अला त खतम नठदा अई। ³⁹पर जे परमेस्वरअ के बिलाई अला तबी तुवें ऐथुक खतम सकी ना करी। अंर कदी ऐसो नु चाएँ अण कि तुवें परमेस्वरअ के बिरोद मुंझ जगड़ी भाणनअ वाड़े ठईरअ।”

⁴⁰तबी तिवें तेसकी बात मानी अंर चेलीक बितरे बोईदी करी मराएँ अंर ऐजा ऊकम देई करी छोडी देने कि ईसा के नांव से कोई बात नु करीया। ⁴¹तबी सो बेटांगन्दी धुर आएँ अंर तिऊँक ऐथु बाता से खुसी अणी कि ईसा के नांव से दुःख ऊँठाण के काबील आमे बी बणी सके। ⁴²तबी सो रोज मंदीरअ पुण्डे अंर दारके दारके जाई करी सिखान्दे अंर आछी खबर का परचार करदे रे लागी कि ईसा ई मसी अ।

सात सेवक छाटे

6¹तला के दुसु मुंझ जबी चेली की गिणती बड़दी लागी तबी यूनानी अंर इब्रानी रीति रीवाज वाड़े यऊदी लोगु मुंझ खाणको बाटनअ मुंझ बोल चाल अणी। काईकी जिऊँ बेटकुडीयाऊँ के खवान्द ते मरीएँ तिऊँके सात इब्रानी रीवाज के यऊदी लोगुएँ उण्डड़ो पुण्डड़ो तो लेओ करी। ²तबी बारअ चेलीएँ बिस्वासी लोगुंक आपु ढाया बोईदी करी बोलो कि, “परमेस्वर की सेवा छोडी करी लोगु के खाण पीण कि बियस्ता करनी आमारे अरनी ठीक ना आथी। ³ऐथु अरनी ओ बाईओ आपस मुंझी ठगडे . अंर सुचा आत्मा से भरुएँ सात मरदुक करो छांटी, जो ऐथु काम कि देखबाड़ करले। ⁴अंर आमे त पराथना अंर परमेस्वर के बचन की सेवा मुंझ लागी रन्दे। ⁵ऐजी बात सारे लोगुंक आछी लागी अंर तिवें सितफनुस नांव का जा बिस्वास अंर सुचा आत्मा लेई भरुएँ ता, अंर फिलिपुस, प्रखुरुस, नीकानोर, तिमोन, परमिनास अंर अन्ताकिया के निकुलाऊसक जेणे यऊदी दरम ता राखा अपनाई, ईऊँ लोगुंक छांटे।

६अंर तबी तिऊँक खास चेली ढाया नेएँ अंर खास चेलीएँ पराथना करी करी आपड़ा आत तिऊँच राखा। ७तबी परमेस्वरअ का बचन फईलदा लागा अंर यरुसलेम मुंझ चेली की गिणती सकोड़ी बड़दी लागी। पुजारीयूँ के एक बड़े दड़ेई बी ईसाच बिस्वास करा।

सितफनुस के खीलाप यऊदी नेताऊँ का बिरोद

८सितफनुस एक ऐसा आदमी ता जो परमेस्वरअ कि आसीस अंर सामर्थ से भरुईएँ ता अंर सो लोगु के बिचंदे बड़े चिन अंर चमतकार ता देखावं। ९तबी सेजो मन्दिर जेथुक आजाद दासु को ते बोलअ तिऊँ मुंझी किछ कुरेनी, सिकन्दरिया, किलिकिया, अंर ऐसिया के लोगुकी सितफनुसअ के सात बोल चाल अणी। १०पर सो ईछे समझदारी अंर आत्मा से बरुई करी ऐसी बाता ता लावं कि, लोग तेसके सामणी टीकी नु ते सकी। ११तबी तिवें किछ लोगु बेरी लालच देई करी बोलाओ कि, “आमे ऐसके मूसा अंर परमेस्वर के खिलाप बेजाई बुराई करदुई सुणी। १२अंर ऐथु डंग से तिवें लोगुंक यऊदी बाटबाठे नेताऊँक, अंर यऊदी दरम सास्तरियूँक भड़काए। अंर तबी तिवें सितफनुसक पाकड़ी करी यऊदी बेटांग के बीचन्दा लेजा। १३अंर तिऊँ लोगुएँ जुटे गवा खडे करे अंर तिवें ब्रोसो आदमी आमारे सुचे मन्दिर अंर मूसा के नियम के खीलाप बोलनक कदी ना रुकी। १४आमे एस आदमीक ऐजो बोलदुई सुण कि “ईसा नासरी ऐथु मन्दिरक ढाई देंदा अंर जे रीति रिवाज आमुक मूसाएँ राखे देई तेथुक बी बदली देंदा।”

१५तबी सारे बेटांग के लोगुएँ तेसके बिला दियान से ऐरो अंर तिवें देखो की ऐसको मूँ सरगदूत के जेसो लागीएँ देखाऊन्दो।

सितफनुस का बाषण

7 १तबी बड़े पुजारीएँ बोलो, “का ऐई बाता साची अ?” २तेणे जबाब देना, ओ बाईओ, अंर बाटबाठीओ मेरी बात सुणो, आमारे बाबा ईबराईम आरान मुंझ बसनअ से पोईले जला मोसोपोटामिया मुंझ ता रेअ, तला जोतीमय परमेस्वरएँ तेसके दर्सन देना। ३अंर बोलो, “आपड़े देस अंर आपड़े लोगुंक छोडी करी तेथु दरतियाच जा, जेतु आऊँ देखामा। ४तबी सो कसदियों छोडी करी आरान मुंझ बसदा लागा। जबी तेसका बाबा मरी गा तेथु के बाद परमेस्वरएँ तेसके ऐकी बसाआ जेथुन्दे तुवें ऐला बसी अ।

⁵परमेश्वरएँ तेसके अक मुंझ गोडे राखनक दरती बी ना देनो, तेस बेर अलाद बी आती नु ती तबी बी परमेश्वरएँ वादा करा की या देस ताऊँखे अंर तेरे अलादीक संपती के रूप मुंझ देंदा। ⁶परमेश्वरएँ तेसके ऐजो बी बोलो, कि 'तेरी अलाद ओके देसन्दी अणजाण बणी करी बी रन्दी अंर चार सो साल दुरी तिऊँक आड़ी भाणी करी तिऊँके सात बुरा बरताव करदे।' ⁷परमेश्वरएँ बोलो, आड़ी भाणनं वाड़े जातीक आऊँ सजा देंदा अंर ऐथु के बाद तुवें तेथु देसन्दी दुर आंदे अंर ऐकी मेरी सेवा करदे। ⁸परमेश्वरएँ ईबराइमक बचन देना अंर तेथु का चीन खतने^a की रसम ती। तबी सो ईसाकअ का बाबा बणा अंर जबी ईसाक पईदा अई गा, तेथुके बाद आठवें दुस तेसका खतना करा अंर इसाकअ लेई याकुब अणा अंर याकुब के छोरी लेयाई बारअ कुल बणे। ⁹"याकुबअ के छोरे आपणे बाई यूसुपअ से जअं ते अंर तिवें तेसके मिसर मुंझ आड़ी बणनअ के आस्ते बिकी देना, पर परमेश्वर तेसके सात ता। ¹⁰परमेश्वरएँ इसुपक सारे दुखु से बचाई राखा अंर ठगड़ा भाणा, जेथु लेयाई मिसर के राजाएँ तेसके आपणे देसअ का राज्यपाल अंर आपड़े बितरअ स्याणा भाणा। ¹¹तबी सारे मिसर अंर कनान देस मुंझ बीदराव पड़ी जेथु लेयाई भरी मुसिबत आई अंर आमारे बाटबाठीक कोकीई बी नाज ना मिलो। ¹²पर जबी याकुबक ऐजा पता लागा की मिसर मुंझ नाज लागीएँ मिलदो तबी तेणे पोईले बेरा आमारे बाटबाठीक तेकी भेजे। ¹³जबी सो दुजारे तेकी नठे तबी इसुपएँ आपड़े बाईयूँक आपणे बारे मुंझ बोलो अंर तेकीया के राजाक बी इसुपअ के कबीले का पता लागा। ¹⁴तबी इसुपएँ आपड़े बाबा अंर आपड़े कबीले के लोगुंक तेकी बोईदे अंर सो पिछतर लोग ते। ¹⁵तबी याकुब मिसर मुंझ आ अंर तेकीई याकुब अंर आमारे बाटबाठे बी तेकी मरे। ¹⁶तिऊँकी लासा सेकेम लेई करी कबरान्दी देनी दाबी जेतुक ईबराइमएँ अमोर के छोरी बेरी चान्दी के रुपी मुंझ ती राखी गाडी। ¹⁷"जा बाद परमेश्वरएँ ईबराइमक ता राखा देई, जबी तेथुके पुरे अण का बखत आ, तला मिसर मुंझ आमारे लोगु की गिणती भरी ती रोई बड़ी। ¹⁸तबी मिसर मुंझ ओका राजा बणा जा इसुपक जाणी नु ता। ¹⁹तेणे आमारे बाटबाठी के सात चलाकी करी अंर

^a परमेश्वरएँ यऊँदी लोगो के सात एक बचन देना तेथु बचन के चिन के रूप मुंझ सारे यऊँदी मरद पईदा अण के आठ दुस वाद खतना कराणा। ऐजा काम सिरफ यऊँदी पुजारीई सकअ करी।

ईछा बुरा बरताव करा कि तिऊँक आपड़े लाइकटे धुर ते पड़े फेरकाणे कि सो मरी नठले। ²⁰तेथुई बखतअ मुसा पईदा अणा अंर सो बेजाई बाँका ता अंर तीन मिने दुरी तेसके आपड़े बीतरे राखा ²¹अंर जबी तेसके फेरकाई देना तबी फिरोन के बेटीयाएँ तेसके आपणा छोरा भाणी करी पाड़ा। ²²मुसाक मिसरीयूँ की बिदीया सिखाई, सो बातुं अंर कामु मुंझ ऊसताज ता।

²³“जबी सो चालीस साल का अई गोआ तबी तेणे सुचो की आऊँ आपड़े इस्राइली बाईऊँ ढाई जावं ²⁴तेणे आपणे लोगु मुंझी एकके सात एक मिसरी आदमीक बुरो करदुई देखो तबी तेणे मिसरी आदमीक मारी गेरा अंर तेसका बदला गाडा। ²⁵तेणे ऐजो सुचो की मेरे भाई जाणी पांदे कि परमेस्वरएँ मुखे ईऊँ छोडाणक राखा छांटी पर तिवें समझी ना सको। ²⁶दुजे दुस जबी तिवें आपस मुंझ जगड़े ते ले भाणी तबी तेणे आई करी तिऊँकी आपस मुंझ मेल ती लेई गडाई अंर बोलो कि, ‘ओ बाईओ तुवें आपस मुंझ भाई भाई अई करी बी काई जगड़े भाणअ?’ ²⁷पर जेणे जगड़े ते लेएँ भाणी, तेणे मुसा के दाका देई करी बोलो कि, “ताऊँखे आमारा स्याणा अंर पंच कुणे भाणा? ²⁸जेसा तें बिया तेस मिसरीक मारा तेसाई तु मुखे बी मारना सुचें? ²⁹ऐजो सुणी करी मुसा भागी नठा अंर मिधान देस मुंझ परदेसी बणी करी रंदा लागा। तेकी तेसके दुई छोरे अणे।

³⁰जबी चालीस साल बीची गोवें तबी मुसाक सिने टिरा के नजीक रेगीस्तान मुंझ एक ओजीएँ झालन्दा सरगदुत देखाऊँणा। ³¹जबी मुसाएँ ऐजो देखो तबी सो ताजुब रा मानी अंर ऐथु ऐरदा ढाया नठा। तबी तेसके परभु की बास सुणुणी कि ³²“आऊँई तेरे बाटबाठी का परमेस्वर अ, अंर आऊँई ईबराईम, इसाक, अंर याकूब का परमेस्वर अ।” तबी मुसा डरी नठा अंर तेसके ऐरनअ की इमत बी पड़ी ना। ³³तबी परभुएँ तेसके बोलो कि, ‘आपड़े गोडी के जुते खोली कर, काईकी जेवड़ा तु खड़ा अ, सेजी जागा सुची अ। ³⁴मैं मिसर मुंझ आपड़े लोगु की दुरदसा देखी अंर तिऊँक रुंदुई सुणे। ऐथु अरनी तिऊँ छोडाणक आऊँ उंदा उतरा। ऐबे आऊँ ताऊँखे मिसर मुंझ बेजअ।’ ³⁵जेस मुसा की तिवें खिलापत ती करी कि ताऊँखे आमारा स्याणा अंर पंच कुणे भाणा? ऐजा सेजाई मुसा अ जेसके परमेस्वरअ का बेजीएँ सरगदुत झालन्दा देखाऊँणा अंर

तेसके स्याणा अंर बचाणअ बाड़ा भाणी करी बेजा। ³⁶तेणे तिऊँक मिसर से चिन अंर चमतकारु लेयाई भाण्डे ले अंर लाल समुन्दर टपाण मुंझ अंर चालीस साल दुरी रेगीस्तान मुंझ रण के आस्ते चिन अंर चमतकार करे। ³⁷ऐजा सेजाई मुसा अ जेणे इसराइल के लोगुंके एसो तो बोलो कि, 'परमेस्वर तारे आस्ते तुमुई मुंझी मुऊँ जेसा एक बाकी खड़ा करदा' ³⁸ अंर ऐजा सेजाई आदमी अ जा रेगीस्तान मुंझ आमारे बाटबाठी के सात ता। अंर ऐणेई सिने टिराच सरगदुतअ के सात बाता बी लाई अंर ऐणेई आमुक देण के आस्ते परमेस्वरअ बेरी जिऊँदा बचन आसील ता करा। ³⁹पर आमारे बाटबाठीएँ तेसकी बात मानी ना अंर सो मुसाक छोडी करी पछी मिसर मुंझ ते सुंचअ जाण। ⁴⁰अंर तिवें आरुणक बोलो कि, "आमारे आस्ते ऐसा देव भाण जो आमुक बाट देखाला। काईकी जेणे मुसाएँ आमुंके मिसर देसन्दी भाण्डे ते ले, तेस के बारे मुंझ आमे किछ ना झाणी कि तेसके सात का ओ। ⁴¹तेथुई दुसु मुंझ तिवें एक बाछुटे की मुरती भाणी अंर तेथुच बड़ी चड़ाई अंर आपड़े भाणीए चिजाऊँ कि खुसी मनाई। ⁴²तबी परमेस्वरएँ तिऊँके बीला पीठ देनी फिराई अंर तिऊँक गईणीब के चीजा पुजनं के आस्ते देने छोडी। जेसो बाकीयूँ के किताबा पाण्डो लिखीएँ,

ओ इस्राएली लोगो, चालीस साल दुरी रेगीस्तान मुंझ जेई चईनं कि बड़ी अंर बेंट तुवें चड़ाई, सेजी मेरे आस्ते आथी नु ती।

⁴³तुवें मोलेक देव की पालगी अंर आपड़े तारी का देव रिफानक आपड़े सात नेया। तुवेंई सेजी मुरुता भाणी बी अ अंर तेथु की पुजा बी करी। ऐथु आस्ते आऊँ तुऊँक बेबिलोन से बी पुण्डे बेजदा।

⁴⁴"गवाया का ऐजा तम्बु आमारे बाटबाठीएँ रेगीस्तान मुंझ आपणे सात नेया, परमेस्वरएँ मुसाक जेसना तम्बु देखा ता तेणे तेसनाई भाणा। ⁴⁵आमारे बाटबाठी तिऊँके बाटबाठी बेरी ऐजा तम्बु लेई करी यओशू के सात ऐकी लेया। तेथु बख्तअ ऐथु देसन्दे ओके जाति के लोग ते रअ, परमेस्वरएँ तिऊँक आमारे बाटबाठी के सामणी ऐकी धुर देने खेराई। अंर ऐजा तम्बु दाऊदअ के बख्तअ दुरी ऐकी रआ। ⁴⁶दाऊदच परमेस्वरअ की दया बणी रोई तबी तेणे याकुबअ के परमेस्वरअ बेरी पुछो की का में तेरे आस्ते एक मदिन्र भाणनं अ? ⁴⁷पर मदिन्रअ भाणाण बाड़ा सुलेमानई ता। ⁴⁸"पर

परम परमेस्वर आतु के भाणीएँ मन्दिर पुण्डा रई ना। जेसो बाकीएँ तो बोलो कि, ⁴⁹“परभुएँ ऐसो बोलअ, सरग मेरो सिंगासन अ अंर दरती गोडी राखनं को ठेलो अ। मेरे आस्ते तुवें कसनअ कुड़ो भाणदे? मेरे आस्ते रणअ कि जागा कोकी अ? ⁵⁰का ऐई सारी चिजा मेरे आत की भाणीए आथीना?’ ⁵¹“ओ जिदी लोगो, तुवें ना त सुणन सुची अंर ना समझण चाई। पर अमेसा आपड़े बाठबाठी के जेसा सुचा आत्मा का बिरोद करअ। ⁵²का कोजाई ऐसा बाकी असं ता जेसके तारे बाटबाठीएँ दिक ना करा? तिवें त तिऊँक बी मारी गेरे जिवें बेजाई पोईले तेस दरमी के आण की खबर ती देनी, जेसके तुमे ऐबे दोखे से पकडुआ अंर मराई गेरा। ⁵³तुमे सेजेई अ जिवें सरगदुतअ बेरी व्यवस्था त पाई पर तेथुक मानी ना।”

सितफनुसक डुंगरीया

⁵⁴सितफनुस की बाता सुणी करी सो चिड़ी नठे अंर दांद किटदे लागे। ⁵⁵पर तेणे सुचा आत्मा लेई भरुई करी सरग के बिलाक ऐरो अंर परमेस्वरअ की मईमा अंर ईसाक तेसके दईने बीला खड़ा देखा। ⁵⁶तेणे बोलो कि, “में सरगक खुलीएँ अंर आदमी के बेटेक परमेस्वरअ के दईने बिला खड़ा देखा।” ⁵⁷तबी सो जोर से ललियाणे अंर आपड़े कान बन्द करी करी सब सितफनुस पाण्डे पिड़चे। ⁵⁸तबी तिवें तेसके गिरोड़ी करी सईरन्दी बाण्डा लेया अंर तेसीच डुंगरीयाव देनी। अंर गवाऊँवें आपड़े गटुण खोली करी साऊल नांव के एक छोरे के गोडी मुंझ राखे। ⁵⁹तबी सो सितफनुसक लागी रे डुंगरीयान्दे अंर सितफनुसएँ ऐसी पराथना करी कि, “ओ परभु ईसा मेरी आत्माक समाड़।” ⁶⁰तबी तेणे गुण्डी नाई करी जोर से बोलो, “ओ परभु, या पाप ईऊँच पाण्डा नु लाया अंर ऐजी बात बोली करी तेणे आपड़े पराण देने छोडी।”

बिस्वासीयूँच मुसीबत

8¹जीऊँ लोगुवें सितफनुसक ता मारा साऊलएँ बी तिऊँका सात देना अंर तथुई दुस से यरुसलेम के बिस्वासीऊँ के दड़ेच मुसीबत आणी सुरु अई जेथु लेयाई खास चेलीक छोडी करी ओर सबीयाएँ यऊदीया अंर सामरिया के मुलकन्दे नठे। ²किछ बगतुएँ सितफनुसक दाबी देना अंर तेसका सोक मनाआ। ³साऊलएँ बिस्वासीऊँ के दडीक उजाड़ने सुरु करे अंर सो बितरे बितरे जाई

करी मरद अंर बेटकुड़ीयाऊँक गिरोड़ी करी ता लेवं अंर जेला पुण्डी ता देवं गटी। ⁴पर जे लोग ऊण्डे पुण्डे नठे,अंर जेकी बी सो नठे अ तिवें ऐजा परचार करा कि ईसा ई मसी अ।

सामरिया मुंझ फिलिपुस का परचार

⁵फिलिपुस सामरिया के बड़े सईरंदा नठा अंर तेकीया के लोगुं बेर मसी का परचार करा। ⁶जबी फिलिपुसअ कि बात लोगुं सुणी अंर जे ताजुब के काम सो करअ ता तेथु देखी करी तिवें आछे से दियान देना। ⁷भरी लोगुं बितोड़ी दुष्टांग ललीयाई करी धुर नठे अंर भरी आदरंगअ के मरीज अंर लंगड़े ठीक गोवें। ⁸अंर सारे सईरअ के लोगुंवे खुसी मनाई।

जादु करनअ वाड़ा समोन

⁹तेकी समोन नांव का एक आदमी ता रअ, जा भरी बखते से जादु मन्तर करी करी सामरिया के लोगुं ताजुब मुंझ ता गेरअ अंर आपुक बड़ा आदमी ता बोलअ। ¹⁰नेन्द्रे से लेई करी बड़े दुरी तेसकी इजत ते करअ अंर लोग तेसके बारे मुंझ ऐसो ते बोलअ कि, “या आदमी परमेस्वरअ की सेजी सक्ति अ जेतुक बड़ी सक्ति बोलअ।” ¹¹तेकीया के लोग तेसके भरी ते मानअ काईकी तेणे भरी दुस से तिऊँक आपणे जादु के कामु लेयाई ताजुब मुंझ ते राखे गेरी। ¹²पर जबी तिवें फिलिपुस बेरी परमेस्वरअ के राज्य के बारे मुंझ सुणअ अंर ऐजो बी सुणअ कि ईसा ई मसी अ तबी तिवें बिस्वास करा। अंर मरद अंर बेटकुड़ीयावें दुयाई नाईण लेन्दे लागे। ¹³तबी समोनऐं आपु बी तेथुच बाताच बिस्वास करा अंर नाईण लेण के बाद फिलिपुसअ के सात आछे से रंदा लागा। अंर तेथु चमतकार अंर ताजुब के काम देखी करी समोन आपु बी ताजुब ता मान।

पतरस अंर यऊना सामरिया मुंझ

¹⁴जबी यरुसलेम के खास चेलीऐं ऐजो सुणो कि सामरीया के लोगुं परमेस्वरअ का बचन मानी लेया तबी पतरस अंर यऊनाक तिऊँ ढाया बेजे। ¹⁵जबी पतरस अंर यऊनाऐं तेकी पोऊँछे तबी तिवें लोगुं के आस्ते ऐसी पराथना करी कि ईऊँक सुचा आत्मा मिलला। ¹⁶काईकी तेकी ऐला दुरी कसीच सुचा आत्मा उतरा नु ता बस तिऊँक परभु ईसा के नांव से नाईण ता देईऐं। ¹⁷तबी पतरस अंर

यऊनाएँ लोगुच आपड़े आत राखे अंर तिऊँक सुचा आत्मा मीला।
 18जबी समोनएँ ऐजो देखो कि खास चले के आत राखनअ लेई
 सुचा आत्मा मिलअ, तबी तेणे तिऊँ ढाया पईसे नेए अंर बोलो,
 19“ऐजी सक्ति मुखे बी देओ कि जबी आऊँ बी कसीच आत
 राखमा, तबी तेसके बी सुचा आत्मा मिलला।” 20पतरसएँ बोलो,
 “तेरा अंर तेरे रुपिई का छतीयानास अया, काईकी तें ऐजो सुचो कि
 ‘आऊँ परमेस्वरअ का बरदान मोले सकअ गाडी’ 21ऐथु बारे मुंझ ना
 त तेरा कोई अक अंर ना तेरा इस्सा, काईकी परमेस्वरअ के
 नजरीन्दो तेरो जिऊँ ठीक ना आती। 22ऐथु अरनी आपड़े गलत
 कामु से जिऊँ पछी बोऊड़ा अंर परभु से पराथना कर, कि जे तेरे
 जियन्दे गलत बिचार अ तेथुक सो माफ करला। 23काईकी में ऐजो
 लेओ देखी कि तूँ जिदाऊ लेई भरुईएँ अंर बुरे कामु मुंझ अइजीएँ।
 24समोनएँ जबाब देना, “तूँ परभु से मेरे आस्ते पराथना कर कि
 जेओ किछ तें बोलो अ तेथु मुंझी किछ बी बात मुऊँच नु गटली।
 25तबी पतरस अंर यऊनाएँ आपड़ी गवाई देई करी अंर परभु का
 बचन सुणाई करी पछी यरुसलेम आए। अंर बाटा आंदुई बेरा
 सामरीया के भरीसे गांवन्दी आछी खबरा का परचार करा।

इथोपियाएँ आईएँ आदमीक फिलिपुस को सिखाण

26परभु के एक सरगदुतएँ फिलिपुसक बोलो ऊजु अंर दखीन
 दिसा के बिला तेथु सुनसान बाटांदा जा जेई यरुसलेमई गाजा
 सईरक जावं। 27सो तियार अई करी नठा अंर बाटा तेसके एक ना
 मरद आदमी मिला जा इथोपिया के राणी कन्दा के राजसभा का
 खजानची ता। अंर सो पुजा करदा यरुसलेम ता नठीए। 28जान्दुई
 बेरा तेणे आपड़े रथच बेठी करी परमेस्वरअ के बांकी यसाया की
 किताब ती लेई पढी। 29सुचा आत्माएँ फिलिपुसक बोलो, “ढाया जा
 अंर रथअ ढाई रया।” 30जबी फिलिपुस दोड़ी करी रथअ ढाया नठा
 तबी तेणे तेसके यसाया बाकी की किताब पइदुई सुणा अंर तबी
 फिलिपुसएँ पुछो, “तेएँ जेओ पढी लो का तेथुक समझी पाएँ?”
 31तेणे बोलो, “जा लुगी मुखे कुणीएँ समझाले नु आऊँ कसो सकु
 समझी?” अंर तबी तेणे फिलिपुसक आपड़े सात रथन्दो बेठनक
 बोलो। 32किताबा का जा पाट तेणे पढी ता लेया, सा ऐजा ता,
 “तेसके खाडु के जेसा जानसे मारनक ता ला नेई। अंर जेसा
 जुआन खाडु ऊनाऊ छापदुई चुप रअ तेसोई तेणे बी आपड़ो

मुँ ना खोलो। ³³तेसकी बेईती करी अंर नीयाव ना मिला, तेसके खानदानी के बारे मुंझ कुण सकं बोली? काईकी दरतीयाची तेसका जिवन त नई नठा।”

³⁴तेणे आदमीएँ फिलिपुसक बोलो, “ढाल ताऊके, मुँ बेर ऐजो दे बोली कि बाकीएँ ऐजो कसके बारे मुंझ बोलो? आपड़े बारे मुंझ या कसी ओरु के बारे मुंझ बोलो?” ³⁵तबी फिलिपुसएँ बोलनअ सुरु करो अंर तेथु किताबा के पाटअ से लेईकरी ईसा के आछे खबरा दुरी सुणाओ। ³⁶बाटान्दे जान्दुई सो पाणी डाय़ा पोऊछे, तबी तेणे आदमीएँ बोलो, “देख, ऐऊडो पाणी बी असं, अंर ऐबे मुखे नाईण देणअ के आस्ते ताऊक का रोक अ।” ³⁷फिलिपुसएँ बोलो जे तु सारे जीय से बिस्वास करे तबी लेई सकें। तेणे जबाब देना, “आऊँ बिस्वास करु की ईसा मसी परमेस्वरअ का बेटा अ।” ³⁸तबी तेणे रथ रोकनअ का ऊकम देना अंर फिलिपुस अंर सा आदमी दुयाई पाणी मुंझ नठे अंर तबी फिलिपुसएँ तेसके नाईण देना। ³⁹अंर जबी सो पाणी मुंझी ऊबे आए तबी परभु की आत्माएँ फिलिपुसक तेकी चुंगी लेजाआ अंर तेस आदमीएँ फेर तेसके देखा ना, अंर सा आदमी खुसी मनान्दुई आपड़े बाटा आगीण्डा नठा। ⁴⁰फिलिपुसएँ आपुक असदोद नांव के जागाच पाआ अंर जा दुरी केसरीया ना पौऊछा ता दुरी सईरुंदी आछी खबर सुणाई।

साऊल को जीऊ बोऊड़ाण

9¹साऊल तला परभु के चेलीक मारनअ की धमकीया ता देवं अंर सो बड़े पुजारी डाय़ा नठा ²अंर तेणे दमिसक के दियाण्डीयूँ के नांव आपणे अक की चिटी मांगी कि जे तेसके ईसा के बाता माननअ वाड़े चले मिलले त, सो बाऊँ बेटकुड़ीया अया बाऊँ मरद अया तिऊँक बांदी करी पछी यरुसलेम सकला लेई।

³पर जबी सो दमिसअ के नजीक पोऊछा, तबी एकदम से गईणी बी तेस बारोड़ी आसो चमको ⁴तबी सो धईनी पड़ा रुड़ी अंर तेणे एक भास सुणी “साऊल, ओले साऊल, तूँ मुखे काई सताएँ?”

⁵साऊलएँ पूछो, “ओ परभु तूँ कुण अ?” तेणे बोलो, “आऊँ ईसा अ जेसके तँ सताई लेया। ⁶ऐबे ऊजु अंर सईरंदा जा अंर तेकी जो बी करनअ अ ताऊखे बोली देन्दा।”

^b किछ पुराणे युनानी ग्रन्थों पाण्डा ऐजी आयत 37 आथीना।

7तेसके सात जाण वाड़े चुप चाप खड़े रए। तिवें बास त सुणी पर कसीक देखा ना। 8जबी साऊल धईनी ऊबा ऊजुणा अंर तेणे आपणे आँखे खोले त तेसके किछ नु तो देखोई अंर तिवें तेसका आत पाकड़ी करी दमिस लेजाआ। 9तीन दुस लुगी ना तेणे किछ देखी सको अंर ना किछ खाओ पिओ। 10दमिसक मुंझ एक अनया नांव का चेला ता रअ। तेसके परभुएँ दर्सन देई करी बोलो, “ओ अनया।” तेणे बोलो, “ओ, परभु।” 11तबी परभुएँ तेसके बोलो, “खड़ा ऊजु अंर सीदा गड़ीयान्दा जा। तेकी यऊदा के दारके तरसुस का रणअ वाड़ा साऊल नांव का एक आदमी के बारे मुंझ पुछताछ कर, सो पराथना करदा लागीएँ। 12साऊलएँ एक दर्सन देखा कि अनया नांव का एक आदमीएँ बितरे आई करी तेसीच आत राखा कि सो फेर से देखला।” 13अनयाएँ जबाब देना, “ओ परभु, ऐस आदमी के बारे मुंझ में बरीसी बेरी बात सुणो कि एणे यरुसलेम मुंझ बी तेरे आदमीऊँ के सात बेजाई बुरो करो। 14अंर ऐकी बी योओ बड़े पुजारी बेरी तेरे नांवच बिस्वास राखनअ वाड़ीक बन्दी बाणनअ का अक लेई करी रा आई” 15पर परभुएँ तेसके बोलो, “तूँ जा, काईकी ऐस आदमीक में ओके जाती, राजायूँ, अंर इसराएली लोगु के सामणी आपड़े बारे मुंझ बोलनअ के आस्ते छांटी राखा। 16मैरे आस्ते जेई बी मुसिबत तेसके ऊठाणी पड़ली तेथु के बारे मुंझ आऊँ आपुई तेसके देखान्दा।” 17तबी अनया तेथु बितरे नठा अंर तेसीच आपड़ा आत राखी करी बोलो कि, “ओ बाई साऊल, जा परभु ईसा ताऊँखे बाटान्दा ता देखाऊणा तेणे मुखे राखा बेजी कि तु पछी देखी सकला अंर सुचा आत्मा लेई बरुला।” 18अंर तलाई तेसके आखी पाण्डी छेलके से छुटे अंर सो देखदा लागा अंर तबी सो खड़ा ऊजुणा अंर नाईण लेया। तबी तेणे खाणको खाओ अंर आपड़ा जोर पछी पाआ।

दमिसक मुंझ साऊलअ का परचार

19तबी सो किछ दुस लुगी दमिसक मुंझ चेली के सात रणा। 20अंर तबी सो तलाई यऊदी के दियाण्डी पुण्डा परचार करदा लागा कि ईसा मसी ई परमेस्वर का बेटा अ। 21सारे सुणनअ वाड़े लोग ताजुब मुंझ पड़ी करी बोलदे लागे कि, “का यओ सेजाई आदमी आथीना जा यरुसलेम मुंझ ईसा के नांव लेण वाड़ीक नास ता करअ अंर ऐकी बी ऐथुई अरनी ता रा आई की आऊँ ईऊँक बाधी

करी बड़े पुजारीयूँ डाई नेमा?" 22साऊल ओर बी मजबुती से परचार करदा लागा अंर दमिस मुंझ रण वाड़े यऊदी लोगुंक ऐजे सबुत देन्दा रा लागी की ईसा ई मसी अ, अंर तिवें तेसका जबाब ना सका देई। 23जबी भरी दुस आई गे तबी यऊदी लोगुएँ तेस मारनअ की सलाव करी। 24पर साऊलक जोई बात तिवें ठाटी ती राखी तेथुका पता लागा। अंर तिवें साऊलअ मारन के आस्ते सईर के गेटन्दे रात-दुस लोगुंक चौकस ते राखे करी। 25पर एक रात साऊलअ के चेलीएँ ओइवेंदा बेठाई करी सईरअ के दिवालींदा देना उतारी।

साऊल यरुसलेम मुंझ

26यरुसलेम पौऊछी करी साऊलएँ चेली के सात जुड़नअ की कोसिस करी। पर सारे चले तेसके डरअ ते अंर कोई बी ऐजा बिस्वास नु ते करी की यओ बी चेला अ। 27पर बरनाबासएँ तेसके आपड़े सात खास चेली डाय़ा नेया अंर तिऊँक बोलो कि बाटान्दा साऊलक परभु कसा देखाऊणा अंर परभुएँ तेससे कसी बात करी अंर तेथु के बाद तेणे कसा दमिसक मुंझ निडर अई करी ईसा का परचार करा। 28तबी साऊल तिऊँके सात यरुसलेम मुंझ रन्दा लागा अंर तिऊँके सात आन्दा जान्दा लागा अंर निडर अई करी परभु का परचार ता करअ। 29सो यूनानी बोली बोलनअ वाड़े यऊदी लोगुंक सिखान्दा रा लागी अंर तिऊँके सात बोल चाल बी करदा रा लागी। पर सो तेसके मारना ते सुचअ। 30पर जबी बिस्वासी लोगुंक ऐथु बाता का पता चला तबी तिवें तेसके कैसरिया लेजाई करी तरसुस के आस्ते देना बेजी।

31अंर ऐथु डंग से सारे यऊदी, गलील अंर सामरिया के बिस्वासी लोगुं के दड़ेक चेण मिला अंर सो परभु के डर से ते चलअ अंर सुचा आत्मा के मदद से ईऊकी गिणती बी बड़दी रोई लागी।

पतरस लुद्दा अंर याफा सईरन्दे

32पतरस सारे मुलकंदा ता जावं अंर सो लुद्दा मुंझ रण वाड़े परभु के लोगुं डाय़ा बी नठा। 33तेकी तेसके अनियास नांव का एक अदरग का मरीज मिला जा आट साल से सातरंदा ता सुतीएँ। 34पतरसएँ तेसके बोलो, "अनियास ईसा मसी ताऊँखे ठीक देव करी

ऐबे तु खड़ा ऊजु अंर आपड़ो सातर बेड़ी दे।" अंर तबी सो तलाई खड़ा ऊजुणा। ³⁵तबी लुद्धा अंर सारोन के रणु वाड़ी सारे लोग तेसके देखी करी परभु के बिला बोऊड़े।

³⁶याफा मुंझ तबीता मतलब दोरकास नांव की एक बिस्वासी बेटकुड़ी ती रंअ, सो बेजाई भले काम ती करअ अंर गरीबुक दान बी ती देव। ³⁷तला के दुसु मुंझ सो बिमार अई करी मरी नठी अंर तिवें तियाँक नुवाई करी बितरे बोऊड़ी पुण्डी देनी राखी। ³⁸लुद्धा याफा के नजदीक तो, जबी चेलीएँ ऐजो सुणो की पतरस लुद्धा मुंझ अ तबी तिवें दुई आदमी पतरस ढाया देने बेजी की तु किरपा करी करी झट आमु ढाई आ। ³⁹तबी पतरस तिँके सात नठा अंर सो तेकी पोऊछा तबी तिवें तेसके तेथु बितरासा नेया। तबी सारी बेटकुड़ीयां जीऊके खुवादं ते रे मरी सो रुई रुई करी पतरस ढाया आई, अंर जे जगे अंर गटूण दोरकासएँ ताला ते भाणे जला सो जिऊन्दी ती, सेजे पतरसअ बेर देखान्दी लागी। ⁴⁰तबी पतरसएँ सारे लोगुंक भाण्डे भेजे अंर गुण्डी नाई करी पराथना करदा लागा अंर लासा के बिला फिरी करी बोलो, "तबीता खड़ी उजुऊ।" तबी तियाँएँ आपड़े आँखे खोले अंर पतरसक देखा अंर ऊजुई करी बेठी गोई। ⁴¹तबी पतरसएँ आपणा आत देई करी तियाँक खड़ी ऊजीयाई। अंर बिस्वासीयुक अंर बिधवाँक बोईदी करी जिऊन्दी तियाँक तिँक देनी सोपी। ⁴²ऐजी बात सारे याफा मुंझ नठी फईली अंर भरीसे लोगुएँ परभुच बिस्वास करा। ⁴³अंर पतरस याफा मुंझ समोन नांव के चामड़े का काम करनअ वाड़े के सात भरी दुस रा।

पतरस अंर कुरनेलियुस

10¹कैसरीया मुंझ कुरनेलियुस नांव का एक आदमी ता रअ जो इतालवी नांव के पलटन का सुबेदार ता अंर तेस थाले सो सिपाई काम ते करअ। ²सो अंर तेसके कबीले के लोग परमेस्वरअ के बगत ते, सो गरीब लोगुंक दान ता देंव अंर अमेसा पराथना ता करअ। ³कुरनेलियुसएँ गमा नई करी करीब तीन बजे एक दरसन देखा कि परमेस्वरअ का एक सरगदुतएँ तेस ढाया आ अंर तेणे बोलो कि, "ओ कुरनेलियुस।" ⁴कुरनेलियुसएँ तेसके दियान से ऐरा अंर डरी करी बोलो, "ओ परभु का अ?" सरगदुतएँ बोलो कि, "तेरी पराथना अंर दरम के कामु लेयाई परमेस्वरअ खुस अ। ⁵अंर ऐबे समोन जेसके पतरस बी बोलअ तेसके बोईदनअ के

आस्ते आपणे आदमिऊँक याफा दे बेजी। ⁶अंर सो चामड़े का काम करनअ वाड़े सेमोन नांव के आदमी के सात रंअ, तेसको दारक समुन्दरअ के छेवं पुण्डो अ। ⁷जबी सेजा सरग दुतएँ नठी गा जेणे तेसके सात बाता ती लेई लाई, तबी तेणे आपणे दुई नोकरुक अंर एक दरमी सिपाईक बोईदा जो तेसकी सेवा ते करअ। ⁸अंर तेणे तिऊँ बेर सारी बाता लाई करी याफा देने बेजी।

पतरस का दरसन

⁹दोतके जबी सो आण्डदुई आण्डदुई सईरअ ढाया पोऊछे तला कलीयारी खाण का बखत ता रा अई अंर पतरस पराथना करदा छतच नठा। ¹⁰तेसके बुक ती रोई लागी अंर सो किछ खाण ता सुचअ, जबी सो खाणको भाणदा लागा तबी तेणे एक दरसन देखा।

¹¹ कि गईण खुली रोई अंर एक बड़ी चादर सी लागी ऊन्दी उतरन्दी। तेथुके चाराई कुणे पाकड़ी करी दरतीयाच लेई उतारी।

¹²अंर तेथु चादरान्दे भांती बांती के जानवर अंर दरतीयाच रिंगनअ बाडे . जीऊँ अंर गईणीम के चलखुड़े तैतबी तेसके एक बास सुणुणी कि, “ओले पतरस ऊबा ऊजु अंर ईऊँक मारी करी खा।”

¹⁴पतरसएँ बोलो कि, परभु, में कुचील अंर खराब चीजा कदी ना खाई।” ¹⁵फेर दुजाएँ बास सुणुणी की “जेतुक परमेस्वरएँ सुचो राखो

ठईराइ तेथुक तु कुचील काई बोले।” ¹⁶तीन बेरा ऐसोई ओ तबी सेई चादर पछी गईणीबी नेई।

¹⁷पतरसएँ तेथु दरसनअ के बारे मुंझ ता लागीएँ सुचदा कि ऐथुका का मतलब सकं अई। तेथुई बखतअ कुरनेलियुसअ के बेजीएँ आदमी सेमोन के दारकअ का पता लाई करी तेसके दारन्दे पोऊँछे।

¹⁸अंर तिवें अटाई करी पुछो कि, “का सेमोन जेसके पतरस बी बोलो सो ऐकी अ?” ¹⁹पतरसएँ जेथु दरसनअ के बारे मुंझ सुची तो

लेओ, तबी सुचा आत्माएँ तेसके बोलो कि, सुण, तीन आदमी ताऊँखे लागिऐँ ऐरदे। ²⁰ऐथु अरनी ऊजुई करी ऊन्दा जा अंर तिऊँके

सात जाणक डरीयानु, काईकी तिऊँक में राखे बेजी।” ²¹तबी पतरस उन्दा नठा अंर तिऊँक बोलो कि, “जेसके तुवें ऐरी लेया, सेजा आऊँ

ई अ। तुवें कथुक रे आई? ²²तिवें बोलो कि, “आमुक सुबेदार कुरनेलियुसएँ राखे बेजी। सो परमेस्वरअ का बगत अंर दरमी

आदमी अ। सारे यऊदी लोगु मुंझ तेसकी बेजाई इजत अ। तेसके सरग दुतएँ ऐसो बोलो कि ताऊँखे आपणे दारके बोईदी करी तेरी

बात सुणला” 23तबी पतरसएँ तिऊँक बितरे नेएँ अंर तिऊँकी सेवा करी।

कुरनेलियुसअ के बितरे पतरस

दोतके रातिएँ सो तिऊँके सात नठा अंर याफाई किछ बिस्वासी लोग तेसके सात नठे। 24एक दुस के बाद सो केसरिया पोऊचे, जेकी कुरनेलियुस आपड़े कबीले अंर दोस्तु के सात तेसके ता लागीएँ ठरदा। 25जबी पतरसअ बितरे जाण बाड़ा ता तबी तेसके कुरनेलियुस मिला अंर कुरनेलियुसएँ तेसके गोडी मुंझ रुड़ी करी तेसके ढाल करी। 26पर पतरसएँ तेसके ऊबा ऊजीया अंर बोलो कि, खड़ा अ, मुखे ढाल काई करे आऊँ बी एक आदमी अ। 27तबी सो तेसके सात बातु लांदुई लांदुई बितरे नठा अंर बितरासे तेणे भरी आदमी कठे अईएँ देखे। 28तबी तेणे तिऊँक बोलो, तुवें ऐजी बात झाणअ कि एक यऊदी आदमीक ओके लोगु के सात मिलनअ झुलनअ या तिऊँ ढाया जाणअ नियम के खीलाप अ, पर परमेस्वरएँ मुखे ऐजो देखाओ कि कुणीएँ बी आदमी अछुत ना आथी। 29एथु अरनी जबी तुवें मुखे बोईदा अ तबी आऊँ सीदा नठी आ, पर ऐबे आऊँ तुमु बेरी ऐसो पुछअ की तुवें मुखे कथु अरनी बोईदा?” 30कुरनेलियुसएँ बोलो कि, “चार दुस पोईले गमा नई करी करीब तीन बेजे में आपड़े दारके पराथना ती लेई करी, कि एकदम से चमकिले गटुण वाड़ा एक आदमी मुं ढाया खड़ा अणा। 31अंर तेणे बोलो कि, “कुरनेलियुस तेरी पराथना परमेस्वरएँ सुणी गाली अंर तेरे आछे कामु के बारे मुंझ बी सो झाणं अ। 32एथु अरनी सेमोन जेसके पतरस बी बोलअ तेसके बोईदनअ के आस्ते आपणे आदमीक याफा दे बेजी। अंर सो चामड़े का काम करनअ वाड़े सेमोन नांव के आदमी के सात रंअ, तेसको दारक समुन्दरअ के छेवं पुण्डो अ। 33तबी में तलाई ताऊँखे बोईदनअ के आस्ते आपणे आदमी बेजे अंर तें बी आछो करो जो आई गा। ऐबे आमे सबीयाएँ परमेस्वरअ के सामणी अ अंर जो किछ ताऊँ बेर परमेस्वरएँ बोली राखो तेथुक सुणमे।”

पतरसअ का बासण

34तबी पतरसएँ बोलो कि, “ऐबे आऊँ समझी गा कि परमेस्वर कसी के सात बी ऊण्डड़ो पुण्डड़ो ना करी। 35पर दुनिया के सारे

लोगु मुंझी जा बी आदमी तेसका डर मानअ अंर आछे काम करअ परमेस्वर बी तेसके आछा मानअ। ³⁶तुवें ऐजी बात सुणी ली कि इस्राएली लोगु के आस्ते बेजीएँ आछी खबर ऐजी अ कि जा सबुका परभु ईसा मसी अ तेसके दुवारा आमारी सान्ती परमेस्वरअ के सात अ। ³⁷सेई गटना तुवें बी झाण अ, जेई यऊना नाईण देणं वाडे के परचार के बाद गलील मुंझ गटी अंर सारे यऊदीया मुलुकन्दी नठी फईली। ³⁸परमेस्वरएँ नासरत के ईसाक सुचा आत्मा अंर सक्तिया लेयाई देना बरी, अंर सो चारु बीला फिरी फिरी करी बलाई के काम करदा रा लागी अंर जे आदमी सेतानअ के बस मुंझ ते तिऊँक सो आछे रा भाणदा लागी, काईकी परमेस्वर तेसके सात ता। ³⁹अंर आमै तेथु बाता के गवा अ जो तेणे यऊदी मुलकअ अंर यरुसलेम मुंझ करो अंर तिऊँ लोगुएँ तेसके सुडी च टांगी करी मारी गेरा। ⁴⁰पर परमेस्वरएँ तेसके तीजे दुस जिऊँदा भाणा अंर तेसके देखाई बी देना। ⁴¹सबु लोगु के सामणी ना पर तिऊँ गवाऊँ के सामणी जिऊँक परमेस्वरएँ पोईलेई छांटी ते राखे, सेजे गवा आमै अ। जबी सो मरी करी पछी जिऊँदा गोवा तबी आमै बी तेसके सात खाओ पिओ अ। ⁴²अंर तेणेई आमुक ऐजा अक देना कि लोगु के बीचन्दा परचार करो अंर गवाई देओ, कि ऐजा सेजाई अ जेसके परमेस्वरएँ जिऊँदे अंर मरीएँ का न्यावं करनअ वाड़ा राखा ठईराई। ⁴³परमेस्वरअ के सारे बाकीयूँएँ तेसके बारे मुंझ गवाई देनी कि जे कुणीएँ तेसीच बिस्वास करला त तेस आदमी के पाप ईसा के नांव से माफ अन्दे।”

ओरु लोगुंच बी सुचा आत्मा उतरा

⁴⁴पतरसएँ ऐजी बाता लाई ती लेई कि, तलाई तिऊँ सारे लोगुंच सुचा आत्मा उतरा, जीवें तेसकी बात सुणी ती लेई। ⁴⁵पतरस के सात जे यऊदी बिस्वासी ते रे आई सो बी ताजुब रे मानी, काईकी सुचा आत्मा जे यऊदी नु ते आथी, तिऊँच उतरा। ⁴⁶काईकी तिवें तिऊँक भांती बांती की बासा बोलदुई अंर परमेस्वरअ की बड़ाई करदुई सुणी, तबी पतरसएँ बोलो कि, ⁴⁷“का आमु मुंझी कुणीएँ ईऊँक पाणी मुंझ नाईण लेण से रोकी सकअ? काईकी ईऊँक बी आमु जेसा सुचा आत्मा मिला। ⁴⁸अंर तेणे तिऊँक ईसा मसी के नांव से नाईण लेणअ का ऊकम देना, तबी तिवें पतरस से अरजी करी की तु किछ दुस ओर आमारे सात रअ।

पतरस को पछी यरुसलेम आण

11 ¹जबी खास चेलीएँ अंर यऊदिया के बाईऊएँ ऐजी बात सुणी की ओर लोगुएँ बी परमेस्वरअ की बात मानी लेई। ²अंर जबी पतरस यरुसलेम मुंझ आ, तबी किछ यऊदी बिस्वासीएँ तेसके सात बोल चाल करदे लागे। ³तिवें बोलो कि, “तू जा यऊदी ना आथी तेसके बितरासा काई नठा? अंर तिऊँके सात काई खाओ पिओ?” ⁴तबी पतरसएँ जेई बात गटी ती रोई तेथुके बारे मुंझ तिऊँ बेर बोलो कि, ⁵“में याफा सईरंदी पराथना ती लेई करी अंर पराथना करदुई करदुई मे एक दरसन देखा कि एक बड़ी चादर जेसी कोई चीज चारु बिलाई लटकाई करी गईणीबी दरतीयाच मुं ढाया लागीएँ उतरन्दी। ⁶जबी में तेथु चादराक दियान से ऐरी तबी तेथुन्दे दरतीया के सारे भांती बांती के जानवर अंर दरतीयाच रिंगनअ वाडे जीऊँ अंर चलखुड़े ते। ⁷तबी मुखे एक बास सुणुणी कि “ओले पतरस ऊबा ऊजु अंर ईऊँक मारी करी खा।” ⁸पर में बोलो ना परभु ना, में कुचील अंर खराब चीजा कदी ना खाई। ⁹फेर दुजाएँ गईणीबी ऐजी बास सुणुणी की, “जेतुक परमेस्वरएँ सुचो राखो ठईराइ तेथुक तु कुचील काई बोले? ¹⁰तीन बेरा ऐसोई ओ तबी सेई चादर पछी गईणीबी नेई।

¹¹तेथुई बखतअ जेथु बितरासा आऊँ रुकीएँ ता तिऊँ के दारके केसरीया के तीन आदमी आएँ जिऊँक मुं ढाया ते राखे बेजी। ¹²अंर सुचा आत्माएँ मुखे बोलो कि, ‘डरीयानु तिऊँ लोगु के सात जा अंर छअ बाई बी मेरे सात आएँ अंर आमै कुरनेलियुस के बितरासे नठे। ¹³अंर तेणे बोलो कि में एक सरगदुतक आपणे बितरासा कसा देखा, सरगदुतएँ मुखे बोलो कि आपणे आदमीक याफा बेजी करी सेमोन जेसके पतरस बी बोलअ तेसके कर बोईदी। ¹⁴अंर सो तुऊँक ऐसी बात सुणांदा जेथु लेई तु अंर तेरा कबीला मोक्स पाले। ¹⁵जबी में तिऊँके सात बाता ती लेई लाई तबी सुचा आत्मा तिऊँच बी तेसनाई उतरा जेसा सुरु मुंझ आमुच ता उतरा। ¹⁶तबी मुखे परभु की बोलीएँ सेजी बात आद आई कि, ‘यऊना त पाणी लेई नाईण ता देवं पर तुमुक सुचा आत्मा लेई नाईण मिलदा। ¹⁷जबी परमेस्वरएँ तिऊँक बी सेजाई बरदान राखा देई जा आमुक परभु ईसा मसीच बिस्वास करनअ से मिला। तबी आऊँ परमेस्वरअ का बीरोध करनअ वाड़ा कुण अ?” ¹⁸ऐजी बात सुणी करी सो चुप रएँ,

अंर परमेस्वरअ की तारिफ करदे लागे अंर बोलो कि, परमेस्वरएँ ओरु जातीक बी गलत कामु से जिऊँ बोऊड़ाण का मोका देना जो सो जी सकले।

अन्ताकिया मुंझ आछे खबरा कि सुरुआत

19 सितफनुस के मरनअ के बाद जेई मुसिबत सुरु ती अई अंर तेथु के बजे से जे लोग उण्डे पुण्डे ते रे बागी से फिरदुई फिरदुई फीनीकी, साइपर अंर अन्ताकिया दुरी पोऊछे, पर यऊदी लोगुंक छोडी करी सो ओरु कसीक बी बचन नु ते सुणाई। 20ईऊँ बिस्वासी मुंझी किछ लोग साइपर अंर कुरैनीया के ते। जिवेँ अन्ताकिया मुंझ जाई करी यूनानी लोगुंक बी परभु ईसा की खुस खबर सुणाई।

21परभु कि सक्ति तिऊँ लोगु के सात ती अंर भरी लोगुएँ बिस्वास करा अंर परभु के बिला फिरे। 22ऐजी बात जबी यरुसलेम के बिस्वासी लोगु बेर पोऊछी तबी तिवेँ बरनाबासाक अन्ताकिया मुंझ बेजा। 23अंर तेणे तेकी पोऊछी करी परमेस्वरअ कि आसीस लोगु बिचन्दी देखी करी बेजाई खुस अणा अंर तेणे सबुक ऐजी बात सिखाई कि जिऊ जान से परभु के बिस्वास मुंझ बणी रो।

24बरनबास एक आछा आदमी ता अंर सो सुचा आत्मा अंर बिस्वास से भरुएँ ता। तबी ओर बी भरीसे लोगुएँ परभुच बिस्वास करा।

25तबी बरनबास साऊलअ ऐरदा तरसुस नठा। 26जबी सो तेसके तेकी मिली गा तबी तेणे तेसीक बी अन्ताकिया मुंझ लेया अंर एक साल दुरी सो बिस्वासी लोगुंक मिलदे रे लगी अंर भरीसे लोगुंक सिखांदे रवेँ लागी। अंर चेलीको सबसे पोईले मसी नांव अन्ताकिया मुंझ बोले।

27तेथुई बखतअ यरुसलेमई किछ बाकी अन्ताकिया मुंझ आये।

28अंर तिऊँ मुंझी अगबस नांव के एक बाकीएँ सुचा आत्मा की सक्तिया लेई ऐजी भविष्यबाणी करी कि सारे दुनियान्दी बेजाई बिदराव पड़दी सेजी बिदराव राजा क्लोदियुस के बखतअ ती। 29तबी सारे बिस्वासीएँ आपड़े कमाया मुंझी जिछो अई तो सकं तिछो यऊदिया मुलुक मुंझ रण वाड़े बाईऊँ कि मदत के आस्ते बेजनअ सुचो अंर 30तिवेँ तेसोई करो। जा दान बरनाबास अंर साऊलअ बेर यरुसलेम के बिस्वासी लोगु के आस्ते ता बेजा सेजा तिवेँ बाटबाठी बेर देना।

चेलिच राजा ऐरोदेस का सताव

12¹तेथु बखतअ राजा ऐरोदरसएँ बिस्वासीऊँ के दड़े मुंझी किछ लोगुंक परेसान करने सुरु करे। ²अंर तेणे यऊना के भाई याकुबक तरवाड़ी लेई माराई गेरा। ³जबी तेणे देखो की ऐथु बाता लेयाई यऊदी लोग खुस अवे, तबी तेणे पतरसक बी पकड़ाई गेरा अंर तला यऊदी लोगुंको बगर खमीर के असकी को तियार तो। ⁴तेणे पतरसक बी पकड़ाई करी जेला पुण्डा देना गेराई अंर चार चार सिपायूँ कि टोली भाणी करी तेसके चोकिदारी मुंझ देने लाई। कोईकी सो तेसीच फसे के तियारु के बाद मुकदमा ता सुचंअ चलाणा। ⁵जबी पतरस जेला पुण्डा ता गटीएँ, तबी बिस्वासी लोग तेसके अरनी एक अई करी दियान से परमेस्वरअ से पराथना ते लागीएँ करदे।

जेला पुण्डी पतरसअ को छुटनअ

⁶जबी ऐरोदेस तेसके कचरीया पुण्डा नेण वाड़ा ता तबी तेथुई रात पतरस दुई सिपाई बिचन्दा ता सुतिएँ अंर सांगणाऊ लेयाई ता भादीएँ अंर जेला के दारन्दे चोकीदार ते राखीए। ⁷तबी परभु का एक सरग दुत पतरसअ ढाया आ अंर तेवड़ो आसो लागो अंर सरगदुतएँ पतरसक ईलाई करी उजीया अंर बोलो, “झठ उजु” अंर तलाई तसके आतुकी सांगणा खुली नठी। ⁸तबी सरग दुतएँ बोलो, “आपण मंजण कर बादी अंर चपल कर बिडी” अंर पतरसएँ तेसोई करो। तबी सरगदुतएँ फेर बोलो, “आपड़े गटूण कर बिडी अंर मुँ पछीण्डा आ।” ⁹तबी पतरस तेस पछीण्डा भाण्डा नठा, अंर तेणे सुचो कि जो सरगदुतएँ करी लेओ सेजो एक सुईन अ साची बात आथीना। ¹⁰तबी सो पोईले अंर दुजे चोकिदारु की टोलिया छोडी करी लोए के दार ढाया पोऊछे जेई बाट सईरअ के बिला ती जावं अंर सेजो दार तिऊँके आस्ते आपुई नठो खुली अंर सो भाण्डे एक गड़ीयान्दे पोऊछे अंर तबी सरगदुत तलाई तेस छोडी करी धुर नठा। ¹¹तबी पतरस आपड़े आपे मुंझ आ अंर तेणे बोलो कि, “ऐबे में झाणी गालो कि परभुएँ आपड़ा दुत बेजी करी ऐरोदेसअ के आतंदी मुखे छोडाई गाला अंर यऊदी लोगु के ठाटीऐच पाणी नठो फिरी। ¹²जबी तेणे ऐजो झाणी गालो तबी सो यऊना जेसके मरकुस बी ते बोलअ तेसके ईजा मरीयम के दारखे नठा। तेवड़े भरीसे लोग

कठे अई करी पराथना ते लागीं करदे। ¹³जबी पतरसएँ भाईले बिलाई दार तो लेओ खटखटाओ। तबी रुदे नांव की एक आड़ीण ऐरदी आई। ¹⁴अंर पतरस की बास सुणी करी सो खुस अई अंर बिना दार खोले पछीं तिऊँ ढाया नठी अंर बोलो कि पतरस दारन्दा खड़ा अ। ¹⁵तबी तिवें तियाँक बोलो कि, “तु जाली रोई गोई।” पर सो जोर से बोलदी रोई लागी कि ऐजी बात साची अ। तबी तिवें बोलो कि, “तेसका सरगदुत अंदा।” ¹⁶पर पतरस दार खटखटान्दा रा लागी अंर जबी तिवें दार खोलो तबी तेस देखी करी सो ताजुब रे मानी। ¹⁷तबी तेणे तिऊँक चुप रणं के आस्ते आतअ लेई ईसारा करा अंर बोलो कि, “परभुएँ मुखे जेला पुण्डी कसा भाण्डा लेया अंर ऐजी बात याकुब अंर ओर बाईऊँ बेर बी बोली देया” तबी पतरस तेथु जागाक छोडी करी ओके जागाच नठा।

¹⁸रातीएँ बखतअ सिपाईयू मुंझ खलबली नठी मची कि पतरस कोकी नठा? ¹⁹जबी ऐरोदेसएँ सिपाईयू बेरी तेसकी खोज ती लेई कराई तबी सो तिऊँक मिला ना। तबी तेणे सिपाईयू कि पुछ ताछ करी अंर तिऊँ मारनअ का ऊकम देना अंर तेथु के बाद राजा ऐरोदेस यऊदिया छोडी करी केसरीया मुंझ रणा।

ऐरोदेसअ की मोत

²⁰ऐरोदेस सूर अंर सैदा के लोगु से भरी गुस्सा ता करअ। ऐथु अरनी सो कठे अई करी तेस ढाया नठे अंर जा राजा का एक करमचारी बलास्तुस ता तेसके मनाई करी तिवें ऐरोदेसअ से मेल गाइनअ कि अरजी करी। काईकी तिऊँ लोगुंक खाण पीण की चीजा तेथु देसन्दी ती जावं। ²¹जो दुस राजाएँ ठईराए तो राखो तदुस राजा ऐरोदेस आपणे राज गटूण बिड़ी करी राज गदीयाच बेठा अंर लोगुंक बासण देन्दा लागा। ²²तबी लोगुएँ ललीयाई करी बोलो, “ऐजी बास आदमी की आथीना देव की अ।” ²³तलाई परभु के एक दुतई तेसके बिमार देना करी अंर किड़िएँ तेसके खा अंर सो मरी नठा। काईकी ऐजो ऐथु अरनी ओ कि जेई ईजत परमेस्वरक ती चाइएँ मिली सेजी ऐरोदेसएँ आपु लेई। ²⁴पर परमेस्वरअ का बचन बड़दा अंर फईलदा रा लागी।

²⁵जबी बरनाबास अंर साऊलएँ यरुसलेम मुंझ आपड़ी सेवा पुरी करी गाली अंर तबी सो तेकीई अन्ताकिया नठे अंर तिवें यऊनाक जेसके मरकुस बी ते बोलअ आपड़े सात नेया।

बरनाबास अंर साऊलक भेजे

13¹अन्ताकिया के बिस्वासी लोगु के दड़े मुंझ किछ बाकी अंर किछ सिखाण वाड़े ते, जैसे बरनाबास, समोन जेसके नीगर बी ते बोलअ, लूकियुस कुरेनी अंर देसअ के चौऊथे ईस्से का राजा ऐरोदेसअ के सात पाड़ीए बाई मनाएम अंर साऊल ते। ²जबी सो बरती रई करी परभु कि आराधना ते लागीएँ करदे, तबी सुचा आत्माएँ तिऊँक बोलो कि, “मेरे अरनी बरनाबास अंर साऊलक तेथु काम के आस्ते आलग करो जेथु काम के अरनी में तिऊँक बोर्डे राखे। ³तबी तिवें बरत अंर पराथना करी अंर तिऊँच आत राखी करी बेजे।

कुपुरुस का जादुगर

⁴सुचा आत्माएँ बरनाबास अंर साऊलक सिलुकिया बेजे अंर सो तेकीई पाणी के झाजंदे बेठी करी कुपुरुस नठे। ⁵अंर सलमीस पोछी करी परमेस्वरअ का बचन तिवें यऊदी लोगु के दियाण्डे पुण्डा सुणाआ अंर यऊना बी तिऊँके मदत करनक सातीई ता। ⁶अंर सारे लोग टापून्दे गुमी करी पाफुस दुरी पोऊँछे तेकी तिऊँक एक जादु करनअ वाड़ा जुटा यऊदी बाकी मिला जसको नांव बर-ईसु तो। ⁷सो एक बेजाई ठगड़ा आदमी ता अंर सो राज्यपाल सिरगियुस पलुस का सेवक ता अंर राज्यपालएँ परमेस्वरअ का बचन सुणनअ के अरनी बरनाबास अंर साऊलक आपु ढाई बोर्डे। ⁸पर बर-ईसु जेसको ओको नांव इलीमास जादुगर तो तेणे तिऊँका बिरोद करा। एणे तेथु सईर के राज्यपालअ के बिसवासक तोड़नअ कि कोसीस ती लेई करी। ⁹तबी साऊलएँ जेसको नांव पलुस बी ते बोलअ तेणे सुचा आत्मा लेई भरुई करी इलीमासअ के बीला ऐरो अंर बोलो कि, ¹⁰“ओ छल कपटी सेतान की अलाद तु सारे आछे कामु का दुसमन अ। का तु परभु के सीदे बाटाक बीगाइनी छोड़दा ना? ¹¹अंर देख ऐबे परभु का आत ताऊँच अ अंर ऐबे तु काणा जान्दा अंर किछ बखतअ के अरनी तु दुस देखी ना सकदा।” तबी तलाई तेसीच धुन्धलो अंर इनियारो छाऊणअ अंर सो उण्डा पुण्डा पसकाऊन्दा लागा कि कुणीएँ तेसका आत पाकड़ी करी आण्डाले। ¹²तबी राज्यपालई जो किछ ओ तो तेथु देखी करी अंर परभु के बचनअ सुणी करी ताजुब रा मानी अंर बिस्वास करा।

पलुस अंर बरनबास पिसदिया के अन्ताकिया मुंझ

¹³तबी पलुस अंर तेसके साती पाफुसई नावीन्दे पंफुलिया के पिरगा सईरन्दे पोऊँछे। पर यऊना मरकुस तिऊँक छोडी करी यरुसलेम नठा। ¹⁴अंर पिरगाई सो आगिण्डे जाई करी पिसदिया के अन्ताकिया मुंझ पोऊँछे अंर तेकी सो बेठोजअ के दुस यऊदी लोगु के दियाण्डे पुण्डे नठे अंर बेठी गोवे। ¹⁵मुसा कि बियस्ता अंर बाकीयूँ के किताबा पढ़नअ के बाद दियाण्डी के स्याणीएँ तिऊँक ऐजी खबर बेजी कि, “ओ बाईओ जे तुम लोगुंक किछ बचन सिखाणा चावं त बोलो।” ¹⁶तबी पलुस खड़ा अणा अंर आत ईलाई करी बोलो कि, “ओ इसराएली लोगो अंर परमेस्वरअ से डरनअ वाड़े सारे लोगो मेरी बात सुणो, ¹⁷इसराएली लोगु के परमेस्वरएँ आमारे बाटबाठीक ते छांटे अंर जला सो मिसर मुंझ ते रंअ, तला तेणे तिऊँक बड़ाए अंर आपड़े बड़े सक्तिया लेई तेकिई छोडाए। ¹⁸अंर करिब चालीस साल दुरी परमेस्वरएँ तिऊँकी रेगिस्तान मुंझ बरदास करी। ¹⁹अंर कनान देसअ के सात राज्य के लोगुक मारी करी, तेणे तेथु जमीना के मालिक इसराएली लोगुंक देने भाणी। ²⁰ऐथु बाताक पुरी अण मुंझ करिब चार सो पचास साल लागे। अंर तेथु के बाद परमेस्वरएँ तिऊँके आस्ते नियाव ठाटनअ वाड़े स्याणे भाणे अंर ऐजी परथा समूएल बाकी दुरी चली। ²¹तबी तिवें राजा कि मांग करी अंर परमेस्वरएँ बिन्यामीन के खान्दानी मुंझी कीस के छोरे साऊलक तिऊँका राजा भाणा अंर तेसका राज चालीस साल दुरी रवा। ²²तबी साऊलअ के जागाच दाऊदक राजा भाणा जेसके बारे मुंझ परमेस्वरएँ ऐसो तो बोलो कि यिसे का छोरा दाऊद मेरे जिय कि बात झाण अंर सोई मेरी सारी बाताऊँक पुरी करदा। ²³अंर परमेस्वरएँ आपड़ा वादा पुरा करनअ के आस्ते इसराएल मुंझ मोक्स देण बाड़ा ईसाक ऐसकेई खान्दानी मुंझी बेजा। ²⁴तेसके आण से पोईले यऊनाएँ इसराएली लोगु मुंझ तिऊँके गलत कामु से पछी जीऊ बौऊड़ाण अंर नाईण देण का परचार ता करा। ²⁵यऊना जबी आपड़ा काम पुरा करनअ वाड़ा ता तबी तेणे बोलो, ‘तुवें मुखे जा समजअ आऊँ सेजा आथीना, पर मेरे बाद जा आण वाड़ा अ, आऊँ तेसके जुती के तणीया खोलनअ जोगा बी आथीना।

²⁶ओ ईबराईम के खान्दानी के बाईओ अंर परमेस्वरअ से डरनअ वाड़े गेर यऊदी लोगो, मोक्स की ऐई खुस खबर आमारे

अरनी राखी बेजी। ²⁷यरुसलेम के रण वाड़ीएँ अंर स्याणाऊँई त ईसाक मोक्स देण वाड़े के रूप मुंझ पछाणा ना अंर तेसके गलत बाणा। ऐसो करनअ से तिवें बाकीयूँ की सेई बाता पुरी करी जेई सो सारे बेठोज के दुस पढ़अ। ²⁸तिवें मारनअ के लायक तेसदी कोई गलती ना देखी, तबी बी तिवें पिलातुसअ से अरजी करी की ऐसके मारी गेरो। ²⁹जेई बाता तेसके बारे मुंझ लिखीएँ ती जबी सेजी सारी तिवें पुरी करी गाली तबी तेसके कुरुसची उतारी करी कबरा पुण्डा राखा ³⁰पर परमेस्वरएँ तेसके मरीएँ मुंझी जीऊन्दा भाणा। ³¹अंर ईसा तिऊँक जे तेसके सात गलील से यरुसलेम ते रे आई, भरी दुस दुरी देखाऊणा अंर लोगु के सामणी ऐबे सो ई ईसा के गवा अ। ³²आमे तुमुक सेजी आछी खबर सुणाव तेथु का वादा आमारे बाटबाठी के सात ता करीएँ। ³³ईसा के मरनअ के बाद परमेस्वरएँ तेसके पछी जीऊन्दा भाणा अंर सेजा वादा आमारे अलादी के अरनी पुरा करा, जेसो दुजे भजन के किताबा पाण्डो लिखीएँ,

तु मेरा बेटा अ, अंर आऊँ ऐला से तेरा बाबा बणा।

³⁴ईसा मरी करी कदी सड़ी नु ता सकी, ऐतु अरनी परमेस्वरएँ तेसके मरीएँ मुंझी जिऊन्दा भाणा। तेणे ऐसो बोलो:

'आऊँ ताऊँखे सेई सुची अंर कदी खतम ना अण वाड़ी बरगत देन्दा जेतु का पाका वादा में दाऊदअ से ता करा।'

³⁵ऐथु अरनी तेणे भजन के किताबा के ओके ठाणी बी लिखीएँ:

'तु आपड़े तेस सुचे आदमीक सड़नई ना देन्दा।'

³⁶दाऊदएँ आपड़े जिन्देगीया मुंझ परमेस्वरअ के जीय के जेसे काम करे अंर मरी करी तेसके आपड़े बाटबाठी के कबरान्दा राखा अंर सो सड़ी बी नठा। ³⁷पर जेसके परमेस्वरएँ जिऊन्दा भाणा सो सड़ा ना। ³⁸ऐथु आस्ते ओ बाईओ तुवें ऐजो जाणी करो कि ईसा लेई तुमुक पापु के माफीया की खबर मिली। ³⁹अंर तेसीई लेई जे सारे लोग बिस्वास करअ, सो आपणे सारे पापु लेई छुटकारा पान्दे, जेथुक मुसा की बिवस्ता सकी ना देई। ⁴⁰ऐथु आस्ते चोकस रओ कि जेओ बाकीयूँ के किताबा पाण्डो लिखीएँ सेओ तुमुच नु गटलो

⁴¹'ओ परमेस्वरअ के मजाक भाणनअ वाड़ीओ चचकुई रओ अंर मरी नठो, काईकी तारे दुसु मुंझ आऊँ एक ऐसा काम करदा जेतुकी जे कुणीए तुमु बेर चर्चा करले तबे बी तुवें बिस्वास ना करदे।

⁴²जबी पलुस अंर बरनाबास भाण्डे आरे तबी लोगुएँ तिऊँसे अरजी

करी की ओके बेठोज के दुस ऐई बाता आमुक फेर सुणाया।⁴³जबी बेटांग खतम अई गो तबी भरी से यऊदी अर यऊदी दरम माननअ वाड़े लोग पलुस अर बरनाबास पछीण्डे अऐं, अर तबी तिवें तिऊँके सात बाता लाई करी समझाऐं की परमेस्वरअ के दया मुंझ बणी रओ।

गेर यऊदी मुंझ पलुस अर बरनाबासअ का परचार

⁴⁴आगले बेठोजअ के दुस सारे सईरअ के लोग परभु के बचन सुणनअ के आस्ते कठो अऐ। ⁴⁵ऐथु बिड़ा देखी करी यऊदी लोग चिड़ी नठे अर पलुसअ के बाताऊँ का बिरोद करा अर तेसके खीलाप गलत बोलदे लागे। ⁴⁶तबी पलुस अर बरनाबासऐं निडर अई करी बोलो कि, “ऐजो जरूरी तो कि सबुसे पोईले तारे बिचन्दा परमेस्वरअ का बचन सुणान्दे, पर तुवें तेथुक माना ना अर आपुक अमेसा के जिन्देगिया जोगे समझे ना, ऐथु अरनी आमे गेर यऊदी लोगु के बीला जावं। ⁴⁷काईकी परभुऐं आमुक ऐजा ऊकम राखा देई कि, ‘में तुमुक गेर यऊदी लोगु के आस्ते आसो राखो भाणी जो मोक्स की खबर दरतीया के कुणे कुणे दुरी पोछली। ⁴⁸ऐजी बात सुणी करी गेर यऊदी लोग खुस अऐ अर परमेस्वरअ के बाता की बढ़ाई करदे लागे अर जिऊँक अमेसा के जीवन के आस्ते छांटी ते राखे, तिवें बिस्वास करा। ⁴⁹अर परभु का बचन तेथु सारे देसंदा फईलदा लागे। ⁵⁰अर यऊदी लोगुऐं सईरअ के किछ ईजतदार लोगुंक अर बगती करनअ वाड़ी आछी बेटकुड़ीयाऊँक भड़काई। तबी पलुस अर बरनाबासअ के सात तिवें बुरो करनअ सुरु करो अर तिऊँक आपड़े मुलकन्दी धुर देने खेराऐ। ⁵¹तबी पलुस अर बरनाबासऐं तिऊँके बिरोद मुंझ आपड़े गोडी की दूड़ जाणी देनी अर सो इकुनिया नठे। ⁵²अर चेले खुसी से अर सुचा आत्मा लेई भरुन्दे रे लागी।

इकुनिया मुंझ पलुस अर बरनाबास

14¹इकुनिया मुंझ पलुस अर बरनाबास यऊदी दियाण्डे पुण्डे नठे अर तेकी तिवें ऐसा परचार करा की यऊदी अर गेर यऊदी लोगु मुंझी बरीसे लोगुऐं बिस्वास करा।²पर जीऊँ यऊदी लोगुऐं बिस्वास ना करा तिवें बिस्वासी लोगु के खीलाप ओके जाती के लोगुंक बड़काऐं।³पलुस अर बरनाबास भरी दुस दुरी तेकी रे अर

परभु के बारे मुंझ निडर अई करी लोगु बेर बोलदे रे लागी। तिऊँ बेरी परभु चिन अंर चमत्कार के काम कराएँ अंर आपणे दया का सबुत देन्दा रा लागी। ⁴जबी सर्इरअ के लोगु मुंझ फुट नठी पड़ी तबी किछ लोग यऊदी लोगु के बिला नठे अंर किछ खास चेली के बिला आएँ। ⁵तबी गेर यऊँदी लोगुएँ अंर यऊदी लोगुएँ आपड़े नेताऊ के सात मिली करी पलुस अंर बरनाबासअ के सात बुरा बरताव अंर डुंगरियाव देण की चाल चली। ⁶जबी पलुस अंर बरनाबासक ऐथु बाता का पता चला तबी सो लुकनिया के, लुस्तरा अंर दिरबे के सर्इरु अंर ऊँण्डड़े पुण्डड़े के देसुन्दे नठे बागी। ⁷अंर तेकी बी खुस खबरी सुणांदे लागे।

लुस्तरा अंर दिरबे मुंझ पलुस अंर बरनाबास

⁸लुस्तरा मुंझ एक आदमी ता बेठीएँ जो पईदा अण सेईं टांगा का लंगड़ा ता अंर कदी बी आण्डी नु ता सकी। ⁹ऐणे आदमीएँ पलुसक बाता लांदुई सुणी अंर पलुसएँ तेसके बिला गोर से ऐरो अंर देखो की ऐसके आपणे ठीक अण का बिस्वास अ। ¹⁰तबी पलुसएँ जोर से बोलो कि, “आपड़े गोडीच सीदा खड़ा अ” तबी तेणे खडी फाव मारी अंर आण्डदा लागे।

¹¹लोगुएँ पलुस का ऐजा काम देखी करी, लुकाउनिया की बोली मुंझ जोर से बोलो कि, देव आदमी के रुप मुंझ आमु बिचन्दे रे आई। ¹²सो बरनाबासक जेस अंर पलुसक ईरमेस बोलदे लागे, पलुसक ईरमेस ऐथु अरनी बोला कि सो बातु लाण मुंझ माईर ता। ¹³अंर सर्इर के भाईले बिला जेस देव को मन्दीर तो अंर जेस देव का पोरोईतएँ बड़ी चड़ाण के आस्ते बोधु अंर फुलु की माड़ा लेई करी सर्इरअ के दारंदा पोऊछा। काईकी लोगु अंर पोरोईत पलुस अंर बरनाबासअ के अरनी बड़ी ते सुंचअ देणी। ¹⁴जबी धुऊँ खास चेलीक ऐथु बाता का पता लागे तबी सो आपड़े गटूण चीरि करी बीड़ा मुंझ बागी करी नठे अंर ललीयाई करी बोलदे लागे। ¹⁵“ओ बाईओ, तुवै ऐजो काई लेओ करी? आमे बी त तुमुई जेसे आदमी अ। ऐकी आमे तुमुक खुस खबरी सुणान्दे रे आई जो तुवै ऐजी बेकार की चिजा छोडी करी जिऊन्दे परमेस्वरअ के बिला फिरले, जेणे गईण, दरती, समुन्दर अंर ऐन्दो जो कीछ बी असअ सेजो सब राखो भाणी। ¹⁶पुराणे बखतअ तेणे दुनिया के सारे लोगुंक आप आपणे बाटान्दे देने आण्डनई। ¹⁷तबी बी सो आपणे आछे कामु के दुवारा

आपणी गुवाई देन्दा रा लागी। सो गईणी बी पाणी ता बरसाव अंर आछी फसल ता ऊगांव अंर सो तुमुक खाणको देई करी तारो जिऊ खुसी से ता देवं भरी। ¹⁸ईछी बात बोलनअ के बाद बी लोगुंक बड़ीया चड़ाण के आस्ते बड़े मुस्कील से रोके। ¹⁹किछ यऊदी लोगुएँ अन्ताकियाई अंर इकुनिया मुंझ आई करी, तेकिया के लोगुंक आपणे बीला करी करी पलुसक डुंगरियाव देनी अंर मरीएे झाणी करी सईरअ के भाईले बिला दुरी गिरोड़ी करी नेया। ²⁰अंर जबी बिस्वासी लोग तेस बारोड़ी कठे अणे तबी सो ऊजुई करी सईरन्दा नठा अंर ओके दुस बरनाबासअ के सात दिरबे नठा।

पिसिदीया के अन्ताकियाक मुंझ

²¹सो तेथु सईरअ के लोगुंक खुस खबर सुणाई करी अंर भरीसे चले भाणी करी लुस्तरा, इकुनिया अंर अन्ताकियाक नठे। ²²अंर चेली के जिऊ मजबुत करदे अंर सिखांदे रवे लागी कि बिस्वास मुंझ बणी रओ अंर ऐजो बोलो कि, आमुक परमेस्वरअ के राज मुंझ जाण के आस्ते भरी दुख पड़दा झेलना । ²³पलुस अंर बरनबासएँ अलग अलग बिस्वासीयूँ के दड़े के आस्ते अलग अलग स्याणे देने भाणे अंर बरत राखी करी तिऊँक परभु के आतन्दे देने साँपी जेसीच तिवे बिस्वास ता करा। ²⁴ऐथु के बाद सो पिसिदिया बाठु पंफूलिया पोऊछे। ²⁵तबी पिरगा मुंझ बचन सुणाई करी अतलिया पोऊछे, ²⁶अंर तेकी सो पाणी के झाजन्दे बेठी करी अन्ताकिया आएँ। ऐथुई जागाची ईऊँक परमेस्वरअ के आतन्दे ते देने साँपी अंर तेसके काम करनक अलग ते करे। अंर जा काम ईवें पुरा ता करा तेथुक परमेस्वरअ के आतन्दा देना साँपा। ²⁷तेकी पोऊछी करी तिवे बिस्वासी लोगुंक कठे करे अंर परमेस्वरएँ जो तिऊँके सात करो तो तेथुकी बाता लोगु बेर लाई अंर ऐजी बात बी बोली कि गेर यऊदी लोगु के आस्ते परमेस्वरएँ कसो दार खोलो, ²⁸अंर सो चेली के सात भरी दुस लुगी तेकी रे।

यरुसलेम कि पन्चाईत

15 ¹तबी फेर किछ लोग यऊदियाएँ आई करी बिस्वासी लोगुंक सिखान्दे लागे कि, “जे तारा खतना मुसा के बिधीया जेसा आथीना अईएँ त तुमुक मोकस सकी ना मिली।” ²ऐथु बाताच पलुस अंर बरनाबासअ की तिऊँके सात बोल चाल अणी।

तबी ऐथु बाताक सुलझाण के आस्ते पलुस बरनाबास अंर किछ लोगुंक यरुसलेम मुंझ खास चेली अंर स्याणी ढाया भेजे।³जबी बिस्वासी लोगुएँ तिऊँक बीदा ते ले करी तबी सो फिनिकिया अंर सामरिया बाठू नठे अंर तेकीया के बिस्वासी लोगुंक ऐजी बात बोली कि गेर यऊदी लोगुएँ परमेस्वरच कसा बिस्वास करा, ऐजी बात सुणी करी तेकीया के बिस्वासी लोग बेजाई खुस अणे।⁴जबी सो यरुसलेम मुंझ पोऊछे, तबी बिस्वासी दड़े के लोगुएँ, खास चेलीएँ अंर स्याणा लोगुएँ खुस अई करी तिऊँका सुवागत करा अंर तिऊँके सात जो परमेस्वरएँ करो तो सेजी बाता तिवें बिस्वासी लोगु बेर लाई।⁵तबी जे फरिसी दड़े के बिसवासी लोग ते तिवें खड़े उजुई करी बोलो कि, “गेर यऊदी लोगुंक बी खतना कराएँ चाईएँ अंर तिऊँक मुसा कि बियस्ता माननअ का ऊकम चाएँ देईएँ।”

⁶तबी छांटिएँ चले अंर स्याणे ऐथु बाता की सलाव करनअ के आस्ते कठे अणे।⁷भरी बाता लाण के बाद पतरसएँ खड़े ऊजुई करी बोलो कि, “ओ बाईओ तुवें ऐजो झाण नि कि किछ दुस पोईले परमेस्वरएँ तुऊँ मुंझी मुखे छांटा काईकी मेरे मुंअ लेई गेर यऊदी लोग परमेस्वरअ कि खुस खबर सुणले अंर बिस्वास करले।⁸जियक जाचनअ वाड़े परमेस्वरएँ तिऊँक बी आमु जेसा सुचा आत्मा देना अंर ऐजो देखाओ कि तिऊँक बी आमु जेसे छांटे।⁹अंर बिस्वास के दुवारा तिऊँके जिऊ सुचे भाणे अंर आमु अंर तिऊँ बीचन्दा परमेस्वरएँ किछ फरक ना राखा।¹⁰त एबे तुवें काई सुचअ परमेस्वरक परेखणा? अंर चेली के मुण्डीयाच ऐजो बारो काई राखअ जो ना त आमे सकमें नेई अंर ना आमारे बाट बाठे।¹¹आमारा बिस्वास ऐजा अ कि परभु ईसा मसी के दया से जेसा मोक्स आमुक मिला, तेसाई ईऊँक बी मिला।

¹²तबी सबीयाएँ चुप रणे अंर बरनाबास अंर पलुसअ कि बात सुणदे रे लागी की परमेस्वरएँ ईऊँके दुवारा गेर यऊदी मुंझ कसे बड़े बड़े चिन अंर ताजुब के काम करे।¹³जबी तिवें आपणी बात खतम करी गाली, तबी याकुब बोलदा लागा कि, “ओ बाईओ, मेरी बात सुणो,¹⁴सेमोनएँ तो बोलो कि परमेस्वरएँ किछ गेर यऊदी लोगु मुंझी आपड़े नांव के आस्ते छांटी करी सबसे पोईले पियार देखाआ।¹⁵अंर बाकीयू के किताबा पाण्डो बी ऐसोई लिखीएँ :

16 'ऐथु के बाद आऊँ फेर आंदा अंर दाऊदअ के राजक पछी खडीयान्दा। अंर तेसके खनार पछिं चिणदा अंर तेथुक खड़ो करदा। 17 दुनिया के सारे लोग परभुक ऐरदे अंर ऐजो बी अन्दो कि जे गेर यऊदी लोग मेरो नांव लेवं सो मुं ढाया आन्दे। 18 ऐजी बात तेणेई परभु बोली जेणे जुग जुग मुंझ ऐथु बाता की खबर देनी।

19 याकुबएँ बोलो कि मेरी ऐजी सलाअ अ कि आमे गेर यऊदी लोगुंक जे परमेस्वरक मानअ तिऊँक परेसान चाईएँ ना देईएँ। 20 पर तिऊँक ऐजी बात लिखी करी बेजो कि छोरीया अंर ओके के बेटकुडीया के सात गलत काम नु करीया अंर मुरतीयाऊँच चड़ाएँ खाणको अंर सास गोटी करी मरीएँ जानवर को मसं अंर लोई कदी नु खाया। 21 काईकी पुराणे जमाने से मुसा की ऐजी बियस्ता का परचार करनअ बाड़े गांव गांव अ अंर तेथु बियस्ताक सारे बेठोज के दुस दियाण्डे पुण्डी पड़दे रअ लागी।

गेर यऊदी बिस्वासीयूँ के नांव चिठी

22 तबी सारे बिस्वासी लोगुएँ, खास चेलीएँ अंर बाट बाठीएँ ऐजो ठाटो की आपु मुंझी किछ लोगुंक छांटी करी पलुस अंर बरनाबासअ के सात अन्ताकिया मुंझ देंव बेजी। तबी तिवें यऊदा जेसके बरसब्बा ते बोलअ अंर सिलासक छांटे, काईकी सो सारे भाईयूँ मुंझी मुखया ते। 23 तिवें जेई चिठी तिऊँ बेर बेजी तेथु पाण्डो ऐसो लिखो कि अन्ताकिया, सीरिया अंर किलीकिया के गेर यऊदी भाईयो तुमुक खास चेली अंर बाटबाठी के तरफ से ढाल 24 आमे ऐजो सुणो कि आमु मुंझी किछ लोग आमारे ऊकम के बगर तारे बीचन्दे आई करी तिवें आपणे बातु लेयाई तुमुक डराई देने अंर तारो जिऊ ऊन्दड़ो ऊबड़ो देनअ भाणी। 25 आमे सबुएँ ऐजी सलाव करी कि आपु मुंझी किछ लोगुंक छांटी करी आपड़े पियारे बरनाबास अंर पलुसअ के सात तिऊँक तुमु ढाई देने बेजी। 26 ऐजे सेजेई लोग अ जिवें आमारे परभु ईसा मसी के अरनी आपड़ी जानी की बाजी देनी लाई। 27 ऐथु अरनी आमे यऊदा अंर सिलासक तुमु ढाया भेजे कि सो आपड़े मुँव लेयाई, ऐजी बाता तुमु बेर लाले। 28 सुचा आत्माअ अंर आमुक ऐजो ठीक लागा कि तुमुक ऐथु जरुड़ी बातु से अलावा ओके कथुई बाता का दबाव नु गेरमे।

²⁹तुवें छोरीया अंर ओके के बेटकुड़ीयाऊं के सात गलत काम नु करीया अंर मुरतीयाऊँच चड़ाएँ खाणको अंर सास गोटी करी मरीएँ जानवर को मसअ अंर लोई कदी नु खाया। जे तुवें आपुक ऐथु बातु से बचाई राखले तबी तारा बला अन्दा। आछा ता।”

³⁰तबी सो यरुसलेमई बीदा अई करी अन्ताकिया मुंझ पोऊँछे अंर बिस्वासी लोगुंक कठे करे अंर सेजी चिठी तिऊँक देनी। ³¹सो तेथु चिठीया पाण्डी लिखीएँ बातु लेयाई बेजाई खुस अणे। ³²यऊदा अंर सिलासएँ जे आपु बी दुयाई बाकी ते तिवें भरी सी बाता सिखाई करी भाईयूँक ईमत देनी अंर मजबुत करे। ³³किछ दुस रणअ के बाद तेकीया के बायूवें तिऊँक पियार से बीदा करे अंर सो पछी तिऊँ ढाया आएँ जिवें तिऊँक भेजे ते। ³⁴पर सिलास तेकी रा^० ³⁵पलुस अंर बरनाबास अन्ताकिया मुंझ रणे अंर भरीसे लोगुंक परभु का बचन सुणाई करी आछे खबरा का परचार करा।

पलुस अंर बरनाबास को जुदो अण

³⁶किछ दुसु के बाद पलुसएँ बरनाबासक बोलो कि “चाली तेथु सईरुन्दे जामे जेथुन्दा आमे परभु के बचन का परचार ता करा। तेकी जाई करी ऐजो ऐरमे कि सो कसे अ।” ³⁷मरकुस जेसके यऊना बी ते बोलअ तेसके बरनाबास आपड़े सात ता सुचअ लेजाण। ³⁸पर पलुसएँ तेसके आपणे साते लेजाणा ठिक ना समझा काईकी तेणे पोईले बी तिऊँका सात पफूलिया मुंझ ता देना छोडी अंर परभु का काम बी आधा देना छोडी। ³⁹ऐथु बाता लेयाई तिऊँ के बिचन्दी फुट नठी पडी अंर सो अलग अलग नठे अई। बरनाबासएँ आपणे साते मरकुसक लेजा अंर सो झाइंदे कुपुरुस नठे। ⁴⁰पलुसएँ आपणे सातअ के आस्ते सिलासक छाण्टा अंर सो तेकी धुर आएँ अंर भाईयूँवें तिऊँक परभु के आतंदा देने सौपी। ⁴¹पलुस सीरिया, किलिकिया बाहू नठा अंर बिस्वासी लोगु के दड़ेक मजबुत करदा रा लागी।

पलुस अंर सिलासअ के सात तीमुतियुसअ को जाणअ

16¹पलुस दिरबे अंर लुस्तरा बी नठा तेकी तेसके तिमुतियुस नांव का एक चेला मिला जा यऊदी बिस्वासी बेटकुड़ीया

का छोरा ता अंर तेसका बाबा यूनानी ता। ²अंर लुस्तरा अंर इकुनिया के बिस्वासी लोगु मुंझ तेसकी आछी इजत ती ³पलुस तीमुतियुसक आपणे सात ता सुचं लेजाणा अंर तेणे तेसके लेजा। तबी पलुसएँ यऊँदी लोगु के बजे से तेसका खतना करा। काईकी सबीयाएँ ऐजो झाणअ ते की तेसका बाबा यूनानी ता। ⁴अंर सारे सईरुन्दे जाई करी तिवें सेजे नियम बी लोगुंक सिखाए जे यरुसलेम मुंझ खास चेलीएँ अंर बाट बाठी ते राखे भाणी। ⁵तबी सारा बिस्वासीऊँ का दड़ा बिस्वास मुंझ बड़दा रा लागी अंर लोगु की गिणती बी बड़दी राई लागी।

पलुस को सुईनो

⁶पलुस अंर तेसके साती फुरगिया अंर गलातिया के मुलकअ बाठुई नठे काईकी सुचा आत्माएँ तिऊँक एसिया मुंझ बचन सुणाणक मना करो। ⁷फेर जबी सो मूसिया के ओडेच पोऊछे तबी तिवें बितुनिया जाणक सुचो पर ईसा के आत्माएँ तिऊँक तेकीबी देने ना जाणई। ⁸तबी सो मूसिया बाठुई तरोआस पोऊछे। ⁹रात पलुसएँ सुईनअ मुंझ देखो कि एक मकिदुनिया के मर्दएँ अरजी करदुई बोलो कि “मकिदुनिया आ अंर आमारी मदत कर।” ¹⁰ऐजो सुईनो देखी करी आमे तलाई मकिदुनिया जाणअ सुचो की परमेस्वरएँ आमुक तिऊँ मुंझ आछे खबरी सुणानक बोईदे।

लुदिया को मन बदलो

¹¹तबी आमे तरोआसएँ पाणी के झाजन्दे बेठे अंर समोथरा टापुच पोऊछे। अंर ओके दुस नियापुलिस नठे। ¹²तेकेई आमे फिलिपी पोऊछे जेओ मकिदुनिया मुलकअ को खास सईर अ अंर तेकी रोमी लोग ते रंअ अंर आमे किछ दुस तेकी रे। ¹³बेठोज के दुस आमे सईरन्दी गेटअ के भाईले बिला नदीया के छेवं पुण्डे पराथना की जागा ऐरदे नठे अंर तेवड़ी कठी अईएँ बेटकुड़ीयाऊँ के सात बेठी करी बातु लांदे लागे। ¹⁴तेवड़ी लुदीया नांव की एक परमेस्वरअ की भक्त ती। सो मईगे बेंगनी गटूण ती बिकअ। परभुएँ तियाँको जिऊँ खोलो देनअ अंर सो पलुसअ कि बाता दियान से सुणन्दी देली। ¹⁵जबी तियाँएँ आपड़े कबीले के सात नाईण लेई गाला तबी आमु से अरजी करी कि, जे तुमे मुखे परभु की साची

भक्त मानअ त मेरे गरे चालो अंर तेकी रुकीया अंर तियाँऐं आमुक आपणे गरे जाणके आस्ते मनाऐ।

पलुस अंर सिलास जेला पुण्डे

¹⁶जबी आमे पराथना करनअ के जागाच ते लागे नठी तबी बाटा आमुक एक आड़ीण मिली जियांदो ऐसो दुष्टांग तो जेथु लेई सो आण वाड़े बखतअ के बारे मुंझ ती सकं बोली अंर ऐथु कला लेई सो आपड़े मालीकु के आस्ते भरी ती कमाअ। ¹⁷सो पलुस अंर आमु पछीण्डी आई करी अंर ललीयाई करी ती बोलअ कि ऐजे आदमी परम बाबा परमेस्वरअ के सेवक अ अंर आमुक मोक्स के बाटा की बाता सुणावं। ¹⁸तियाँऐं भरी दुस दुरी ऐसोई करो तबी पलुस परेसान अई करी पछी फिरा अंर तेथु दुष्टांगक बोलो “आऊँ ताऊँखे ईसा मसी के नांव से ऊकम देवं कि, ‘या बेटकुड़ीया बितोड़ी धुर नठ’” अंर सो दुष्टांग तलाई धुर नठो। ¹⁹जबी तियाँके मालीकुऐं ऐजो देखो की आमारी कमाई खतम गोई आई तबी तिवें पलुस अंर सिलासक गिरोड़ी करी आंगणे पुण्डे स्याणाऊँ डाय ले ²⁰अंर तिऊँक बोलो, “ऐ लोग यऊदी अ, अंर ईवें आमारे सईरन्दी गड़बड़ी राखी मचाई। ²¹अंर ऐसे रिती रिवाजु के बारे मुंझ सिखाई जेतुक सुणनअ अंर माननअ आमु रोमी लोगु के आस्ते ठिक ना आथी। ²²तबी बीड़ बी तिऊँके बिरोद अणी अंर स्याणी लोगुवें तिऊँके गटूण चिरी करी उतारी देने अंर तिऊँक मारनअ का ऊकम देना। ²³भरी मारनअ के बाद तिऊँक जेला पुण्डे देने गटी अंर दरोगाक ऊकम देना कि ईऊँच कड़ी नजर राखीया। ²⁴ऐथु ऊकम मिलनअ के बाद तेणे तिऊँक जेला के बितले कमरे पुण्डे देने गटी अंर तिऊँके गोडे गरुवें लाकड़े पाण्डे देने भादी।

पलुस अंर सीलास जेला पुण्डी छुटे

²⁵अध राती के पलुस अंर सीलास पराथना करदुई परमेस्वरअ के गीत ते लागीऐं लांदे अंर केदी तिऊँक सुणदे ते लागीऐं। ²⁶तबी एक धम से बुचो लागो अंर जेला की बुनियाद ईली नठी अंर सारे दार अंर केदी लोगु कि सांगड़ा खुली नठी। ²⁷तबी दरोगा ऊजुई करी आ अंर जेला के दार खुल्ले देखी करी सुचो की केदी बागी रे अंर तेणे आपड़ी तलवार खईची करी आपुक मारना सुचा। ²⁸तबी पलुसऐं जोर से ललीयाई करी बोलो, “आपुक चोट नु पौऊछा काईकी आमे

सब ऐवड़े ई अ। ²⁹तबी दरोगाएँ मसाल मंगाई अंर कामलुई करी बितरे नठा अंर पलुस अंर सीलासअ के गोडी मुंझ रुड़ा। ³⁰तबी दरोगाएँ तिऊँक भाण्डे लेई करी पुछो, “ओ बाईओ, मोक्स पाणअ के आस्ते में का करनअ?” ³¹तिवें बोलो “परभु ईसाच बिस्वास कर तबी तु अंर तेरा कबिला मोक्स पान्दे। ³²तबी तिवें दरोगा अंर तेस के बितरअ के लोगुंक परभु का बचन सुणाआ। ³³तबी दरोगाएँ रातेई तिऊँक तेवड़ीधुर नेई करी तिऊँके घाव धोए अंर आपड़े सारे कबीले के सात नाईण लेया। ³⁴तबी तेणे पलुस अंर सिलासक आपड़े दारके नेए अंर तिऊँक खाणको खियाओ अंर तबी सारे कबीलेई परमेस्वरच बिस्वास करनअ की खुसी मनाई।

³⁵दोतके स्याणा लोगुवें आपड़े सिपायूँ बेर ऐजी खबर बेजी कि तिऊँक छोड़ी देओ। ³⁶दरोगाएँ ऐई बात पलुसअ बेर बोली कि स्याणा लोगुवें तुमु छोड़नअ का ऊकम राखा देई अंर एबे तुमे खुसी से भाण्डे जाओ। ³⁷तबी पलुसएँ तेसके बोलो, “आमुक रोमी लोग अई करी बी बगर गलतीया के लोगु के सामणी मारे अंर जेला पुण्डे गटे। एबे आमुक चुपके से काई ले बेजी? ऐसो अन्दो ना, जा लुगी सो आपु आई करी आमुक भाण्डे नु गाडले आमे जान्दे ना। ³⁸सिपाईयूँ ऐई बात स्याणी बेर बोली कि सो रोमी लोग अ अंर तबी स्याणे ऐजी बात सुणी करी डरी नठे। ³⁹अंर तबी स्याणीएँ आई करी तिऊँक मनाए अंर भाण्डे नेई करी अरजी करी कि ऐथु सईरन्दी धुर नठो। ⁴⁰अंर सो जेला पुण्डी धुर आई करी लुदीया के दारके नठे अंर भाईयूँ से भेट करी करी तिऊँक तसली देनी अंर तबी तेकेई धुर नठे।

पलुस अंर सिलास तिसलुनिके मुंझ

17¹तबी सो अफिपुलिस अंर अपुलोनिया बाहू तिसलुनिया पोऊछे अंर तेकी यऊदी लोगु को एक दियाण्डो तो। ²पलुस आपड़े आदता के जेसा बेठोजअ के दुस दियाण्डे पुण्डा ता जाव अंर सो तीन अलग अलग बेठोजू के दुसू मुंझ तेकी नठा अंर लोगु के सात बोल चाल करदा रा लागी। ³अंर गरथ पाण्डी पड़ी करी तिऊँक समझान्दा रा लागी कि मसी को दुख झेलनअ अंर मरी करी पछी जिऊँदो जाण जरुड़ी तो अंर ऐजाई ईसा जेसका मे परचार लेया करी, सोई मोक्स देणे वाड़ा राजा अ। ⁴तिऊँ मुंझी जिऊँ लोगुवें पलुस अंर सिलासअ कि बात मानी सो तिऊँके सात मिले अंर

परमेस्वरअ का डर मानन वाड़े भरी से यूनानी मरद अंर ईजतदार बेटकुड़ीया बी ती। ⁵पर यऊदी लोगुएँ जिदा के बजे से बजारअ के किछ गुण्डे आपड़े सात करे अंर बिड़ कठी करी करी सईरन्दी उतपात मचांदे लागे, अंर यासोन के दारखे जाई करी जगड़ी भाणदे लागे अंर पलुस अंर सिलासक लोगु के सामणी लेण की कोसीस करी। ⁶जबी तिवें पलुस अंर सिलासक सके ना पाकड़ी तबी यासोन अंर ओर लोगुंक सईरअ के स्याणाऊँ डाई गिरोड़ी करी ले अंर बोलदे लागे “जीऊँ लोगुवें सारे दुनीयांदी उतपात राखी मचाई ऐबे ऐकी बी आई रे। ⁷अंर यासोनएँ तिऊँक आपड़े दारके राखे अंर यो सारे लोग ऐजो बोलदे लागे कि ईसा राजा अ, अंर रोमी राजा के ऊकमअ का बी बिरोद करअ।” ⁸ऐजी बाता लाई करी तिवें सईरअ के स्याणीक अंर लोगुंक ऊकसाई देने। ⁹एथु आस्ते तिवें यासोन अंर ओरु लोगु बेरी जमानत के पईसे मांगी करी तिऊँक छोडी देने।

पलुस अंर सिलास बिरिया मुंझ

¹⁰तबी तलाई बाईयूँ रातेई रात पलुस अंर सिलासक बीरिया बेजे। अंर तेकी पोऊछी करी सो यऊदी दियाण्डे पुण्डे नठे। ¹¹ऐ लोग तिसलुनिया के लोगु से आछे ते अंर ईवे बड़े दियान से बचन सुणा अंर जेई बाता पलुस ता बोलअ तेथुक रोज गरन्थ पाण्डो ते मिलाव कि सेई साची की जुटी। ¹²एथु लेई भरीसे लोगुएँ बिस्वास करा जेथु मुंझ यूनानी ईजतदार बेटकुड़ीया अंर मरद बी ते। ¹³पर जबी तिसलुनिया के लोगुंक ऐजा पता चला की पलुस बिरिया मुंझ बी परमेस्वरअ के बचन का परचार लागीएँ करदा तबी तेकी आई करी बीड़ाक उकसांदे अंर भड़कांदे लागे। ¹⁴तबी भाईयूँ पलुसक समुदरअ के छेवं पुण्डक बेजा पर सिलास अंर तिमुथियुस तेकीई रुके। ¹⁵जे लोग पलुसक छोडदे ते नठे तिवें तेसके एथेंस दुरी देना छोडी अंर तिऊँ लोगुवें सिलास अंर तिमुथियुस के आस्ते ऐजा खबर लेई कि तुवें झट ऐकी धुर आया।

एथेंस मुंझ परचार

¹⁶जबी पलुसएँ एथेंस मुंझ सिलास अंर तिमुथियुसक ते ले ठरी तबी तेणे तेथु सईरक मुरतीयाऊँ लेई बरुईएँ देखो अंर तबी सो परेसान नठा अई। ¹⁷एथु आस्ते सो यऊदी दियाण्डे पुण्डा यऊदी अंर गेर यऊदी भक्तु के सात बातचित करदा रा लागी। अंर जे

लोग तेसके आंगणे पुण्डे ते मिलअ तिऊँके सात बी सो रोज बोल चाल ता करअ। ¹⁸तबी इपीकुरी अंर तोड़की दड़े के सास्तर सिखाण बाड़े लोग बी तेसके साते भईस करदे लागे अंर किछ लोग बोलदे लागे कि, “या बकवास करनअ वाड़ा का सुचंअ बोलनअ? तबी ओरुएँ बोलो कि, ‘याऊँ ओके देव का परचार करनअ वाड़ा लागअ।’ काईकी पलुस ईसा अंर तेसके पछी जिण कि आछे खबराक ता सुणाव। ¹⁹तबी तिवें तेसके पकड़ी करी आपड़े सात अरिपुस नांव के जागाच नेया जेकी बेंटाग तो अ अंर बेंटाग वाड़ीएँ पलुसअ बेरी पुछो, का आमे ऐजो झाणी सकअ कि ऐजी नई सिकसा कोजी अ? ²⁰ तु आमुक अजीब सी बाता सुणाएँ ऐथु आस्ते आमे ऐजो झाणन चावं की ऐथु का मतलब का अ? ²¹एथेंस के लोग अंर जे परदेसी ऐकी रअ सो नई बाता बोलनअ अंर सुणनअ के आस्ते बेजाई ईछा राखअ।

²²तबी पलुसएँ अरिपुस नांव के बेटांगन्दा खड़ा अणा अंर बोलो, “ओ एथेंस के लोगो, में ऐजो देखो कि तुवें देबी देवताऊँक बेजाई मानअ। ²³जबी आऊँ गुमदा नठा तबी में जेथु चीजाऊँक तुवें पुजंअ तेथुक देखी तबी एकअ जागाच ऐसी बेदी देखी जेथु पाण्डो ऐसो तो लिखीएँ, ‘अण जाण देव के आस्ते’ ऐथु आस्ते जेसके तुमे बिना झाणे पुजंअ आऊँ तुऊँक तेसकी खबर सुणाऊँ। ²⁴जेणे परमेस्वरएँ दुनीया अंर सारी चीजा भाणी सो सरग अंर दुनीया का मालीक अई करी आतअ के भाणीएँ मन्दिरअ पुण्डा रईना। ²⁵परमेस्वरक कथुई बी चिजा की कमी ना आथीना अंर तेसके आदमी के मदत की जरवत बी आथीना, काईकी सो ई सबुक जिन्देगी, सास अंर सब किछ देवं। ²⁶तेणे एकई आदमी लेई दरतीया के सारे लोगुंक भाणे की सो दरतीयाच रले अंर तेणे तिऊँके आस्ते बखत अंर जागा राखी ठईरा जेकी सो रले। ²⁷कि लोग परमेस्वरक ऐरले अंर अई सकअ कि सो तेस दुरी पोऊछी करी तेसके पाले। ईछो अण के बाद बी सो आमु मुंझी कसी से बी दुरे ना आथी। ²⁸काईकी आमे तेसीन्दे जिऊँदे अंर तेसीन्दे आण्डअ फिरअ अंर आमे बी तेसीन्देई अ। जेसो तारे कतीई लिखन वाड़ी बी बोलो, “आमे बी तेसी के खान्दानी के अ। ²⁹परमेस्वरअ की अलाद अण से अमुक ऐजो समझीएँ चाएँ की परमेस्वर सुने, चान्दी, अंर ढुंगुरु पाण्डी जेई कलाकारी अंर सोच आदमी देखावं तेथुके जेसा आथी ना। ³⁰जला

लोग परमेस्वरक झाणी नु ते तेथु बखतअ परमेस्वरएँ दियान ना देना पर एबे सारे जागा के लोगुंक आपणे गलतीयाऊँ से पछी जिऊँ बोऊड़ाण का ऊकम देवं ³¹काईकी परमेस्वरएँ एक दुस ऐसो राखो ठईराई जदुस सो तेस आदमी लेई दुनिया के लोगु का सचाई से नियाव करदा अंर तेसीक मरीएँ मुंझी जिऊँदा भाणी करी ऐथु बाता का सबुत देना”

³²मरीएँ अंर पछी जिऊँदे जाण के बाता लेई किछ लोग त मजाक करदे लागे, अंर किछी बोलदे लागे कि, “ऐई बाता आमे ताऊँ बेरी ओर सुणनी चावं।” ³³अंर तबी पलुस तिऊँ डाई धुर नठा। ³⁴किछ लोगुएँ बिस्वास करा अंर तेसके सात मिले। तेथु मुंझ दिनुयुस जा बेटांगन्दा ता अंर दमरिक नांव की एक बेटकुड़ी ती, अंर ओर लोग बी ते।

पलुस कुरिन्थुस मुंझ

18¹ऐथु के बाद पलुस एथेंस मुंझी कुरिन्थुस आ।²तेकी तेसके अकिला नांव का एक यऊदी मिला सो पुन्तुस मुंझ ता पइदा अवा। सो आपड़े जोरुवा पिरसीला के सात किछ दुस पोईले तेकी ता रा आई। तिवें इटली मुंझ रणअ ऐथु आस्ते छोडो की कलोदियुसएँ सारे यऊदी लोगुंक रोम सइर छोड़नअ का ऊकम ता राखा देई अंर पलुस अकिला अंर पिरसीला मिलदा नठा। ³पलुस अंर सो तम्बु भाणनअ का काम ते करअ, एथु अरनी सो तिऊँ के सात रुका अर काम करदा लागे। ⁴पलुस सारे बेठोज के दुस यऊदी दियाण्डे पुण्डा ता जावं अंर बोल चाल करी करी यऊदी अंर यूनानी लोगुंक ता समझावं। ⁵जला तिमुथियुस अंर सिलास मकिदुनियारें आये तला पलुस सारे बखते यऊदी लोगुंक बचन ता सुणावं अंर गवाई ता देव कि ईसा ई मसी अ। ⁶पर जबी सो बिरोद अंर बुरो बोलदे लागे तबी पलुसएँ आपड़े गटूण जाड़े अंर बोलो, “आपणे कामु कि सजा तुवें आपुई बुक्तन्दे मेरी गलती आना, एबे आऊँ गेर यऊदी डाय जान्दा। ⁷तबी पलुस गेर यऊदी तीतुस यूसतुस के दारखे नठा जा परमेस्वरअ का भगत ता अंर तेसको दारक दियाण्डे ढाया तो। ⁸तबी दियाण्डे के स्याणाएँ किसपुसएँ आपड़े सारे कबीले सुदा बिस्वास करा अंर भरीसे कुरिन्थुस के लोगुएँ जिवें पलुस का बासण सुणा तिवें बी बिस्वास करा अंर नाईण लेया। ⁹तबी एक रात परभुएँ पलुसक सुईने मुंझ बोलो “डरीया नु, बोलदा रअ लागी

अंर चुप नु रया। ¹⁰आऊँ तेरे सात अ, अंर कोई तेरे सात जगड़े भाणी करी ताऊँखे चोट ना सकदे पोऊछाई काईकी ऐथु सईरन्दे मेरे बेजाई लोग अ।” ¹¹पलुस तेकी परमेस्वरअ के बचन सिखाण के अरनी डेड साल दुरी रुका।

पलुसक गलिओ डया लेया

¹²जला अखाया का राज्यपाल गलिओ ता तला यऊदी लोगुएँ एक जुट अई करी पलुसअ का बिरोद करा अंर तेसके पाकड़ी करी कचेरीया पुण्डा लेजाआ। ¹³अंर बोलो, “या आदमी परमेस्वरअ की भक्ति करनी ऐसी सिखाव जेई आमारी बिवस्ता के खीलाप अ।” ¹⁴जबी पलुस बोलनअ वाड़ाई ता तबी राज्यपालएँ बोलो, “ओ यऊदीओ, जे ऐस आदमी कि ऐजी बाता बुरी या अनियाय कि अन्दी तबी आऊँ तारी बात सुणदा ता। ¹⁵पर तारा जगड़ा बातु, नांऊ अंर तारे बिवस्ता के बारे मुंझ अ ऐबे तुवेंई निमटो। आऊँ ऐथु बाताक ठाटनी ना सुची। ¹⁶अंर तेणे तिऊँक कचेरीया पुण्डी खेराई देने। ¹⁷तबी सारे लोगुएँ दियाण्डे के स्याणा सोस्थिनेसक पाकड़ी करी कचेरीया के सामणी मारा। पर राज्यपालई ऐथु बाता की परवा ना करी।

पलुस को पछी आण

¹⁸भरी दुस लुगी पलुस कुरिन्थुस मुंझ रा तबी तेणे बिस्वासी बाईयूँ से बिदा मांगी करी सो किंखिया पोछा तेकी तेणे आपड़ो मुण्ड खुराओ काईकी तेणे मन्नत ती राखी मांनी। तेकी सो नावीन्दा सीरिया भाटू नठा अंर तेसके सात पिरसीला अंर अकिला बी ती। ¹⁹जबी सो इफिसुस पोऊछी गे तबी तेणे अकिला अंर तसके जोरुवा पिरसीलाक तेवड़ेई देने छोड़ी अंर आपु दियाण्डे पुण्डे जाई करी यऊदी लोगु से बोल चाल करदा लागा। ²⁰जबी तिवें तेससे अरजी करी की “आमारे सात किछ दुस ओर रुका” तबी तेणे मानो ना। ²¹पर तेणे ऐसो बोलो की जे परमेस्वर चाला तबी आऊँ तुमु डाई फेर आन्दा। अंर सो तेकी नावीन्दा बेठा। ²²अंर केसरिया पोऊछा अंर तकी सो यरुसलेम नठा अंर बिस्वासी लोगुंक मिली करी फेर अन्ताकिया के बिला नठा। ²³तेकी किछ दुस रण के बाद सो गलातिया अंर फ्रूगिया मुलकन्दा पोऊछा अंर तकीया के बिस्वासी लोगुंक मजबुत रा करदा लागी।

इफिसुस मुंझ अपलुस

²⁴अपलुस नांव का एक यऊदी आदमी ता जा सिकन्दरिया मुंझ पईदा ता अणा अंर सो इफिसुस आ। या आदमी बिदुवान ता अंर पवित्र सास्त्र आछे से ता जाण। ²⁵तेसके परभु के बाटा का ज्ञान ता अंर सो जियसे ईसा कि सिकसा आछे डंग से ता सुणाव अंर सिखाव पर सो खाली यऊना के नाईण की बाता ता जाण। ²⁶सो निडर अई करी दियाण्डे पुण्डा बोलदा लागा, अंर जबी पिरसीला अंर अकिलाएँ तेसके बाता लान्दुई सुणा तबी तिवें अपलुसअ अलग नेई करी परमेस्वरअ की बाटा की बाता ओर आछे से समझाई। ²⁷जबी अपलुसएँ अखाया जाणअ सुचो तबी इफिसुस के भाईयूँएँ तेसका स्वागत करनअ के आस्ते अखाया के बिस्वासीऊक चिठी लिखी, जबी सो तेकी पोऊछी गा तबी जीऊँ लोगुवें परमेस्वरच बिस्वास ता करा तिऊँके आस्ते बड़ा मदत गार अणा। ²⁸अंर सो जोर से बोल चाल करी करी यऊदी लोगु के मुं जनता के सामणी बन्द ता करअ काईकी सो गरंथ पाण्डी ऐजा प्रमाण ता देवं कि ईसा ई मसी अ।

इफिसुस सईरन्दा पलुस

19¹जला अपलुस कुरिन्थुस मुंझ ता तला पलुस ओर मुलक गुमी करी इफिसुस मुंझ आ अंर तेकी तेसके किछ चले मिले। ²पलुसएँ तिऊँक बोलो, “का तुमुक बिस्वास करदुई बेरा सुचा आत्मा मिला अ?” तिवें जबाब देना कि, “आमे सुचा आत्मा के बारे मुंझ सुणोई ना।” ³तेणे तिऊँक बोलो, “तबी तुमे कसका नाईण लेया?” तिवें बोलो, “यऊना का नाईण।” ⁴पलुसएँ बोलो, “यऊनाएँ त ऐजो बोली करी गलत कामु से पछी जिऊँ बोऊड़ाण का नाईण देना कि जा मेरे बाद आण वाड़ा अ, तेसीच मतलब ईसाच बिस्वास करीया।” ⁵ऐजो सुणी करी तिवें परभु ईसा के नांव से नाईण लेया। ⁶जबी पलुसएँ तिऊँच अपड़ा आत राखा तबी सुचा आत्मा तिऊँच उतरा अंर सो भांती बांती की बोलिया अंर परमेस्वर का सन्देश देन्दे लागे। ⁷ऐजे सब करीबन बारअ मरद ते।

⁸पलुस तीन मिने दुरी यऊदी दियाण्डे पुण्डा जान्दा रा लागी अंर निडर अई करी परमेस्वरअ के राज के बारे मुंझ समझादा रा लागी। ⁹पर किछ धड़े जीय के लोगुएँ तेसकी मानी ना अंर सारे लोगु के सामणी परभु के बाटाक गलत भाणी करी बुरो बलो बोलदे

लागे, तबी पलुसएँ चेलीक तिऊँ मुंझी आलग करे अंर तुरनुस नांव के पंचाईत गर पुण्डे रोज सिखान्दा लागे। ¹⁰अंर दुई साल दुरी तेणे ऐसोई करो जेथु लेई एसिया के सब रण वाड़े का यऊदी का यूनानी सबुएँ परभु का बचन सुणा।

¹¹पलुसअ के आतु लेई परमेस्वरएँ भरी से बड़े बड़े चमतकार अंर ताजुब के काम करे। ¹²लोग तेसके छुईएँ रुमाल अंर गुलाबंदक जे बिमारुच ते राखअ तबी तिऊँकी बिमारी ठीक ती जावं अंर दुष्टांग बी धुर तो भागअ। ¹³पर किछ यऊदी जे जादु मंतर करनअ के आस्ते ते फिरअ सो बी ईसा मसी के नांव से दुष्टांगुक खेरान्दे लागे। “जेस ईसा का परचार पलुस करअ आऊँ ताऊखे तेसीकी कसम देऊ” ऐसो बोली करी सो दुष्टांगक ते खेराव। ¹⁴अंर सिकवा नांव का एक यऊदी बड़ा पुजारी ता तेसके सात छोरे बी ऐसोई ते करअ। ¹⁵पर एक दुष्टांगएँ जबाब देना अंर बोलो कि, “आऊँ ईसाक जाण अ अंर पलुसक बी पछाण अ पर तुमे कुण अ? ¹⁶तबी सेजा आदमी जेस पाण्डो दुष्टांग तो लागीएँ तिऊँ पाण्डा पिड़चा अंर तिऊँका ऐसा बुरा आल करा कि सो तेथु बितरेई लोई लखार अई करी नांगेनुंगे बागे। ¹⁷ऐथु बाता का पता इफिसुस के सब यऊदी अंर यूनानी लोगुक लागे अंर ऐजी बात सुणी करी सो डरी नठे अंर परभु ईसा के नांव की ओर इजत बड़ी। ¹⁸जिछे लोगुवें बिस्वास करा तिऊँ मुंझी भरीसे लोगुवें अपड़े गलतीयाक सबु के सामणी मानी। ¹⁹जादु टोना करनअ वाड़ी लोगु मुंझी भरीसीएँ आपड़ी किताबा लेई करी सबुके सामणी ढई देनी। तेथु किताबाऊँ कि कीमत चांदी के पचास अजार सीकी^४ के बाराबर ती। ²⁰अंर परभु का बचन मजबुत अई करी दुरे दुरे लागे फईलदा।

²¹ऐथु घटना के बाद पलुसएँ आपड़े जियन्दी मकिदुनिया अंर अखाया बाटू यरुसलेम जाण की ठाणी अंर बोलो, “तेकी जाण के बाद मुखे रोम बी ऐरनअ अ।” ²²अंर तेणे आपड़ी मदत करनअ वाड़ी मुंझी तिमुथियूस अंर इरातुसक मकिदुनिया बेजे अंर आपु एसिया मुंझ किछ दुस ओर रुका।

इफिसुस मुंझ दंगे

²³तेथु बखते इफिसुस मुंझ परभु के बाटा के बारे मुंझ बड़ी खलबली ति रोई मची। ²⁴तेकी दमेतियुस नांव का एक सुनार ता

^४ एक चांदी के सीके कि किमत एक दुस कि दियाड़ी अ।

अंर सो अरतिमिस के नेन्दरे नेन्दरे मन्दिर ता भणावं जेथु लेई सो मिसतरीऊँक खुब काम ता देवं। ²⁵अंर तेणे ईऊँक अंर ओर मिसतरीऊँक बी जे या काम ते जाणअ कटे करे अंर बोलो, “ओ भाईओ तुमे जाणअ कि ऐथु काम लेई आमारी कुछी कमाई अ। ²⁶तुमे देखअ अंर सुणअ कि ऐणे पलुसएँ इफिसुस मुंझ ना पर सारे एसिया मुंलक के लोगुंक समजाई करी भड़काई पाये। अंर सो बोलअ कि आतु के भाणीएँ देव कदी ना अई। ²⁷ऐथु लेई ऐजाई डर आना कि आमारा काम खतम अन्दा पर बड़ी देबी अरतिमिस को मन्दीर बी बेकार जाणदे अंर जियाँ देबीया की पुजा सारा एसिया अंर दुनीया करअ तियाँका इजत बी खतम अण का डर अ।” ²⁸जबी तिवें ऐजो सुणो तबी तिऊँक गुस्सा आ अंर जोर से ललीयाई करी बोलदे लागे, “इफिसियू की देबी अरतिमिस बड़ी अ।” ²⁹अंर तबी सारे सईरन्दी भगदड़ मची अंर लोगुएँ मकिदुनीया के रण वाड़े गयुस अंर अरितकुसक जे पलुस के सात ते जावं तिऊँक पाकड़ी करी पंचाईती आंगणे पुण्डे लेएँ। ³⁰जबी पलुसएँ आंगणे पुण्डो लोगु के सामणी जाणक सुचो तबी चेलीएँ तेसके देना ना जाणी। ³¹आसिया के अधिकारी जे तेसके दोस्त ते तिवें तेसके खबर बेजी कि तूँ पंचाईती आंगणे पुण्डा नु आया। ³²तेथु गड़बड़ के बजे से कुणीएँ किछ ते बोलअ अंर कुणीएँ किछ अंर भरी सारे लोग ऐजो बी जाणी नू ते की कठे काई रएँ अई। ³³यऊदी लोगुवें सिकेन्दरक बीड़ा मुझी आगीण्डा खड़ा करा अंर किछ लोगुएँ सुचो की ऐथु जगंडे कि बजे सिकेन्दरई अ अंर तेणे आत इलाई करी लोगु के सामणी आपणे बचाव के आस्ते किछ बोलनअ ता सुचो। ³⁴पर जबी तिऊँक या पता चला कि सो यऊदी अ। तबी सो सबीयाएँ एक अई करी करीब दुई घण्टे दुरी ललीयान्दे रे लागी “इफिसुस की देवी अरतिमिस बड़ी अ” ³⁵तबी सईरअ के मुन्सीएँ लोगुंक चुप कराई करी बोलो, “ओ इफिसुस के लोगो दुनीया के सारे लोग ऐजो झाण कि इफिसुस को ऐजो सईर जो ऐथु बड़ी देवी अरतिमिस के मन्दीरअ का अंर जेई मुरती गईणी बी रोई छुटी तेथुका खयाल राखअ?” ³⁶अंर ऐथु बाता से आमे मुकरी बी सकी ना तबी ऐजो आछो अ की तुमे चुप रओ अंर बिना सोचे बिचारे किछ नु करीया। ³⁷तुमे जीऊँ लोगुंक पाकड़ी ले तिवें ना त मन्दिर लुटो अंर ना आमारे देवीयाक किछ बुरो बोलो। ³⁸जे देमेतियुस अंर तेसके सात

के मिस्तिरीऊँक कसी के बिरोद मुंझ किछ सिकायत अ त कचरीया पुण्डे जाओ अंर तेकी ठाटदारे अ अंर तेकी सबीयाय आपणा दावा करअ। ³⁹पर जे तुमे ऐथु से जादा जाणनअ चावं त नियम भाणनअ वाड़े बेटागन्दे जाओ। ⁴⁰आमुक ऐतु बाता का बी डर अ कि कदी ऐला के जगड़ी का दोस बी आमु पाण्डा लावं। काईकी ऐला के जगड़े का कोई मतलब ना आथी अंर आमे ऐथु भीड़ा के कठे अण का बी कोई जबाब ना सकदे देई। ⁴¹ऐओ बोली करी तेणे बेटांग खतम करो।

पलुस को यूनान जाण

20¹जबी जगड़े खतम अई गोए तबी पलुसएँ चेलीक बोईदी करी तिऊँकी इमत बड़ाई अंर बिदा अई करी मकिदुनियाक नठा। ²सो तेथु सारे मुलकअ के चेली की इमत बड़ाई करी यूनान आ। ³तेके तीन मिने रण के बाद सो नावीन्दा सिरिया ता सुचअ जाण, पर तेथु बखते किछ यऊदी तेसके बिरोद मुंझ लागे ठाटदे। ऐथु आस्ते तेणे मकिदुनिया बाहू जाणक सुचो। ⁴अंर तेसके सात बिरीया के पिरुस का बेटा सोपतुस, तिसलुनिया के अरिसखुस अंर सिकुन्दुस, अंर दिरबे का गयुस, अंर आसीया का तुखिकुस अंर तुरफिमुस, अंर तीमुथियुस बी ते। ⁵तिवें आगीण्डे जाई करी तरोआस मुंझ आमुक ते ले ठरी। ⁶अंर आमे बगेर खमीर के असकी को तियार के बाद फिलिपीयाएँ नावी दे बेठी करी पाँच दुस मुंझ तरोआस तिऊँ डाई पोऊछे अंर तेके सात दुस दुरी रुके।

तरोआस मुंझ पलुस का चमत्कार

⁷जबी अपते के पोईले दुस आमे परभु के आद मुंझ कोदुवें तोड़दे कठे अएँ तबी पलुस तिऊँके सात बातु लान्दा लागा अंर सो दोतका तेकेई जाण वाड़ा ता ऐतु आस्ते अध राती दुरी बाता लाई। ⁸उफले पुरे जेवड़े अमे बेठीएँ ते तेवड़े भरीसे दिये ते ओजाएँ। ⁹अंर यूतखुस नांव का एक जुआन खीड़कीया डाई बेठी करी ऊँगाई ता लागा काईकी पलुसएँ बिसते दुरी बाता लाई तबी सो नीन्दा के बस मुंझ तिजे मंजिलची रुड़ी पड़ा अंर तेसके मरीएँ चुंगा। ¹⁰पलुस उन्दा उतरा अंर ढाया जाई करी तेस पाण्डी अंगाव देनी अंर बोलो, “डरीया नु यओ जिऊन्दा अ।” ¹¹अंर उबे जाई करी तेणे परभु के आद मुंझ कोदुआ तोड़ा अंर खाई करी बियाणीया दुरी बाता लाई

अंर तबी धुर नठा। ¹²अंर तिवें तेस जुआन छोरेक जिऊन्दा दारखे नेया अंर तिऊँक चेण मिली।

तराआसएँ मिलतेस जाण

¹³आमे पोईलेई नावीन्दे बेठी करी असुस के आस्ते नठे कि तेकी पलुसक बी आपणे सात नावीन्दा बेठाई करी नेमे। काईकी पलुस पईदल ता लागीएँ आन्दा। ¹⁴अंर जबी सो आमुक असुस मुंझ मिला गा तबी आमे तेसके बेठाई करी मिलतेस के आस्ते नठे। ¹⁵अंर दोतके आमे खियुस टापु के सामणी पोऊछे अंर तेथु के दोतके सामोस टापुच आए तबी तेथुके एक दुस बाद मिलतेस सईर पोऊछे। ¹⁶काईकी पलुस पेन्तीकुस के तियारु के दुस यरुसलेम ता सुचं पोऊछण अंर ऐथु आस्ते तेणे तान्त ती लेई करी कि इफिसुस बाठु जाऊँ जो मुखे एसिया मुंझ रुकनअ नु पड़लो।

पलुस की इफिसुस के बाटबाठी के सात बात चित

¹⁷पलुसएँ इफिसुस के बिस्वासी दड़े के बाटबाठीक ऐजी खबर बेजी की तुवें मिलतेस मुंझ मुखे मिलो। ¹⁸जबी सो तेस डाई आये तबी तेणे बोलो, “तुमे जाण की आसिया आण के बाद पोईलेई दुस से आऊँ तारे सात कसा रणा। ¹⁹अंर यऊदी लोगु के कपट के बजे से मुखे बेजाई दुख अंर परेसानी अणी। पर आऊँ दीन अई करी रुई रुई करी परभु कि सेवा करदा रा लागी। ²⁰तुमे जाण कि आऊँ तारे भले की बातु बोलनक कदी ना रुकी अंर लोगु के सामणी अंर दारखे दारखे जाई करी सिखान्दा रवा लागी। ²¹आऊँ यऊदी अंर यूनानियूँ लोगु से अरजी करु की परमेस्वरअ के बिला बोऊड़ो अंर आमारे परभु ईसाच बिस्वास करो। ²²अंर ऐबे आऊँ सुचा आत्मा के बोलीएँ यरुसलेम लागा जान्दा अंर आऊँ जाणी ना की तेकी मेरे सात का अंदो। ²³आऊँ त बस ईछो झाण कि सारे सईरन्दा सुचा आत्माएँ ऐजो बोली करी मुखे चोकस रई करदी लागी कि, जेल अंर कष्टा ताऊँखे लागीएँ ठरदी। ²⁴पर मेरे नजरी मुंझ मेरे जानी की कोई किमत ना आथी, काईकी आऊँ आपड़ी दोड़ खत्म सुचअ करनी अंर परमेस्वरअ के दया की आछी खबरा सुणाण का काम पुरा सुचअ करना जा मुखे परभु ईसाएँ राखा देई। ²⁵ऐबे आऊँ ऐजो झाण कि जिऊँ बेर में परमेस्वरअ के राज का परचार करा, तुवें मुखे कदी ना देखदे। ²⁶ऐथु आस्ते आऊँ ऐला ऐई गवाई देव कि, जे

तुमु मुंझी कुणीएँ बी नास अला त आऊँ तेथु का जुमेदार आथी ना। ²⁷काईकी परमेस्वरअ के सारी मरजी बोलनक आऊँ कदी ना जीझका। ²⁸ऐतु आस्ते तुवें आपड़ी अंर आपड़े लोगु की देख बाड़ करो जे तुऊँक सुचा आत्माएँ राखे देई काईकी तुवें बिस्वासी लोगु के आस्ते ऐसे अ जेसा बेड़ावा बेड़ाऊ के आस्ते अ। जीऊँक परभुएँ आपणे लोई लेयाई राखे गाडी। ²⁹आऊँ झाण की मेरे जाण के बाद खतरनाक सियाऊटी जेसे लोग तारे बिचंदे आंदे अंर सो बिस्वासी लोगु के टोलीयाक ना छोड़दे। ³⁰तुमु मुंझी बी ऐसे लोग खड़े अंदे जे चेलीक आपु पछीण्डे खचन के आस्ते फिराई गुमाई करी बाता लान्दे। ³¹ऐथु आस्ते चोकसी के रो अंर आद करो की में तुमुक तीन साल दुरी रात दुस रुई रुई करी सबुक समझाएँ। ³²अंर ऐबे आऊँ तुऊँक परमेस्वरअ के बचन अंर तेसके दया के आतन्दे देव सोपी, जो तुऊँक बड़ाई अंर वारिस सकअ दियाई। ³³में कदी बी कसी के सुने, चान्दी अंर गटुणु का लालचा ना करा। ³⁴तुमे ऐजो आपु बी झाणअ की मे आपणे आतु लेई आपड़ी अंर आपड़े सतीयूँ की जरुवत पुरी करी। ³⁵में तुऊँक ऐजो देखाई राखो की मेनत करी करी कसी चाएँ ओरुकी मदत करीएँ। अंर परभु ईसा का सेजा बचन आद राखो जेतुक तेणे आपु बोला, “मांगनअ से देण आछो अ।” ³⁶ऐजी बात बोली करी तेणे आपणे गुण्डे नाएँ अंर तिऊँ सबुके पराथना करदा लागा। ³⁷तबी सो खुबेई के रुंदे लागे अंर बेटी करी तेसके बीदा देना करी। ³⁸काईकी तेणे तिऊँक ऐजो तो बोलो कि तुमे ऐबे मेरो मुं कदी ना देखदे, ऐथु बाता लेई तिऊँक सकोड़ा दुख अणा। तबी तिवें तेसके झाजअ डाई दुरी देना छोड़ी।

पलुस को यरुसलेम जाण

21 ¹तिऊँ डयाई धुर आई करी आमे पाणी के झाजन्दे बेठे अंर सिधे कोस टापुच पोऊछे, अंर तेथु दोतके रोदुस आये अंर तबी तेकी पतरा नठे। ²तेकी आमुक फिनीके जाण वाड़ो एक पाणी को झाज मीलो अंर तबी आमे तेन्दे बेठे। ³जबी आमुक कुपरुस टापु देखाउँणा अंर तबी आमे दखीन के बीला मुड़ी करी सीरिया के बिलाक नठे अंर ऐजो झाज सूर मुंझ रुको अंर समान उतारो अंर तबी आमे बी तेकी उतरे। ⁴तेकी आमुक चले मिले जिऊँ के सात आमे सात दुस दुरी रएँ। तिवें सुचा आत्मा के मदत लेई पलुसक बोलो कि, “तु यरुसलेम नु जाया।” ⁵जबी आमारा तेकी रण

का बखत पुरा अई गा तबी आमे तेकी धुर ते लागीं आन्दे तबी सो सारे आपड़े बेटकुडीया अंर लाइकटी लेई करी आमु छोइन्दे सईरअ के भाईले बीला दुरी आएँ अंर तबी आमे समुद्रअ के छेवं पुण्डी गुडी नाई करी पराथना करी।⁶अंर आमे आपस मुंझ बीदा लेई करी झाजन्दे बेठे। अंर सो आपड़े आपड़े दारखे नठे।

⁷सूरई पाणी के झाजन्दे बेठी करी पतुलिमईस पोऊछे अंर तेकी बिस्वासी लोगुंक डाल करी करी एक दुस तेकी रणे।⁸दोतके तेकी आई करी आमे केसरिया पोऊछे अंर तेकी आमे फिलिपुसअ के दारखे नठे जा आछी खबरा का परचार ता करअ। सो तिऊँ सात लोगु मुंझ एक ता जिऊँक कामअ करनअ के आस्ते ते राखे छाण्टी।⁹तेसकी चार अण बियाई छोरीया ती जेई परमेस्वरअ का सन्देस ती देव।¹⁰भरी दुस तेकी रण के बाद यऊदियाई अगबुस नांव का एक परमेस्वरअ का बाकी आ।¹¹तेणे आमु डाई आई करी पलुस को मंजण गाडो अंर आपड़े आत गोडे बाधी करी बोलो, सुचा आत्मा मुंखे ऐसो बोलो कि जेस आदमी को ऐजो मंजण अ तेसके यरुसलेम मुंझ यऊदी ऐसाई बादे अंर गेर यऊदीक देन्दे सोपी।¹²जबी आमे ऐजो सुणो तबी आमे अंर तेकिया के लोगुएँ पलुसअ से अरजी करी कि तु यरुसलेम नु जाया।¹³पर पलुसएँ तिऊँक जबाब देना, तुवें रुई रुई करी मेरो जिऊ काई दुखावं? आऊँ यरुसलेम मुंझ परभु ईसा के नांव से बादुणक अंर मरनक बी तियार अ।¹⁴जबी तेणे ऐजी बात मानी ना तबी आमे चुप रे अंर बोलो कि, “जेसी परभु की इछा अ”।¹⁵किछ दुसु के बाद आमे तियार अई करी यरुसलेम नठे।¹⁶केसरिया के किछ चले बी आमारे सात आएँ अंर तिवें आमुक कुपरुस के एक आदमी मनासोन डायाने जा एक पुराणा चेला ता अंर आमे तसके सात रणे।

पलुस याकूबक मिला

¹⁷यरुसलेम पोऊछी करी बिस्वासी लोगुंक आमु मिली करी बेजाई खुसी अणी।¹⁸अंर दोतका पलुस आमारे सात याकूबक मिलदा नठा अंर तेकी सारे बाटबाठे ते।¹⁹अंर तिऊँक ढाल करनअ के बाद पलुसएँ तेथु सारे कामु की बाता लाई जे परमेस्वरएँ तेसके सेवा के दुवारा गेर यऊदी लोगु मुंझ ते करे।²⁰तेसकी बाता सुणी करी तिवें परमेस्वरअ की बड़ाई करी अंर तेसके बोलो, “ओ बाई, तु देखी सके कि यऊदी लोगु मुंझी कती अजार लोग अ जिवें बिस्वास

करा अंर सो सारे लोग बिवस्ता के आस्ते बफादार अ। ²¹तेरे बारे मुंझ लोग ऐसो बोलअ की तु गेर यऊदी बीचन्दे जे यऊदी लोग रअ तिऊँक तु ऐसो सिखाएँ कि ना त मुसा के नियमुक मानीया अंर ना आपणे लाइकटी का खतना करीया अंर ना रिती रिवाजूक मानीया। ²²तबी का चाएँ करीएँ? अंर सो ऐजो सुणी पान्दे कि तु आई रा। ²³ऐथु आस्ते तु ऐसो करअ जेसो आमे ताऊँखे बोलअ। आमारे सात चार ऐसे आदमी अ जिवें किछ मनत राखी मानी। ²⁴ईऊँक लोगु के सात जा अंर सुधी करण के कामअ मुंझ सामील अ अंर तेथु का खरचा दे की सो मुण्ड खुराले। ऐथु लेयाई सारे लोगुंक पता लागदा कि जो तेरे बारे मुंझ बोली लेओ सेजी सारी बात झुटी अ। पर तु आपु बी बिवस्ताक मानी करी तेसोई कर। ²⁵जा गेर यऊदी बिस्वास करनअ वाड़े लोगु का सवाल अ, आमे तिऊँक बी चिठा लिखी करी बेजी राखी, कि

“तुवें मुरतीयाऊँच चड़ाएँ खाणको अंर सास गोटी करी मरीएँ जानवर को मसअ अंर लोई कदी नु खाया अंर छोरीया अंर ओके के बेटकुड़ीयाऊँ के सात गलत काम नु करीया।”

²⁶दोतकी पलुसएँ तिऊँक सात सुद्धीकरण की रीत पुरी करनअ के बाद सो मन्दिरअ पुण्डा नठा अंर बोलो कि सुद्धीकरण के दुस कदुस पुरे अन्दे अंर आमारे आस्ते चड़ावा कदुस चड़ान्दे।

पलुसक पाकड़ा

²⁷जबी से सात दुस पुरे अण वाड़े ते तबी आसीया के यऊदी लोगुंवें पलुसक मन्दिरअ पुण्डा देखा तबी तिवें लोगुंक बड़काई करी तेसके पाकड़ी गेरा। ²⁸तबी तिवें ललियाई करी बोलो, “ओ इसराईली लोगो आमारी मदत करो, ऐजा सेजाई आदमी अ, जा सारे जागा जाई करी सब लोगुंक बिव्यस्ता के खीलाप, इसराईली लोगुंके खीलाप अंर ऐथु मन्दिर के खीलाप मुंझ सिखावं। ऐकीया दुरी की ऐणे यूनानि लोगुंक मन्दिर पुण्डे नेई करी ऐथु सुचा जागाक बिष्टाई देनी।” ²⁹तिवें ऐजो ऐथु आस्ते बोलो काईकी तुरमुस नांव का एक इफिसुस का रण बाड़ा आदमी तेसके सात ऐथु सईरन्दा देखी करी सुचो की पलुसएँ तेसके मन्दिरअ पुण्डा लेजाआ। ³⁰तबी सारे सईरन्दी ऊथल पथल ती मचीएँ अंर लोग चारु बिलाई दोऊड़ी करी ³¹कठे अणे अंर तिवें पलुसक खाईची करी मन्दिरअ पुण्डा भाण्डा नेया अंर तलाई गेट बन्द देनअ करी। जबी तिवें तेसीके

मारना कि कोसीस ती लेई करी तबी रोमी पलटन के सेनापतिक खबर मिली की यरुसलेम मुंझ जगड़े रे अई। ³²तेणे तलाई आपड़े सात किछ सुबेदार अंर सिपायूँक ने अंर बीड़ा के बिलाक उन्दा दोऊड़ा अंर जबी लोगुएँ सेनापति अंर सिपाईऊँक देखे, तबी तिवें पलुसक मारना छोडी देना। ³³तबी सेनापति पलुसअ ढाया नठा अंर तेसके पाकड़ी गेरा अंर दुई सांगणाऊ पाण्डे बाधनअ का ऊकम देई करी पुछो, “यओ कुण अ अंर ऐणे का करो?” ³⁴पर बिड़ा मुंझ कोई किछ अंर कोई किछ ते लागीएँ बोलदे अंर जबी आले के बजे से तेसके सचाया का पता ना चला, तबी तेणे पलुसक छाऊणी पुण्डा लेजाण का ऊकम देना। ³⁵जबी सो पोईड़ी डायो पोऊछे तबी बिड़ा के दबाव के बजे से सिपाईऊँक पलुसक चुंगी करी पड़ा नेणा। ³⁶अंर लोग ललीयाई करी ते लागीएँ बोलदे की, “ऐसके मारी गेरो।” ³⁷जबी पलुसक छाऊणीन्दा ता लेया नेजाई तबी पलुसएँ सेनापतिक बोलो, “का आऊँ ताऊँसे किछ बोली सकअ?”

सेनापतिएँ बोलो, “का तू यूनानी बोली सके?” ³⁸ऐथु का मतलब ऐजा अ कि तू सेजा मिसरी आदमी आथीना जेणे किछ दुस पोईले जगड़े ते भाणे अंर चार अजार गुण्डीक रेगिसतान मुंझ ते लेजाएँ। ³⁹पलुसएँ बोलो, “आऊँ सिलिकिया मुलकअ के तरसुस सईरअ का रण वाड़ा यऊदी अ। अंर आऊँ ऐजो चावं की तू मुखे ईऊँ लोगु के सात बाता दे लाणई।”

⁴⁰तेसके पुछी करी पलुस पोईड़ीछ खड़ा अणा अंर बीड़ाक चुप रण का ईसारा करा, जबी सबीयाएँ चुप अई गे तबी पलुसएँ इबरानी बासा मुंझ लोगुंक बोलो।

बीड़ा के आस्ते पलुसअ का बासण

22¹“ओ बाईओ, अंर बाटबाठीओ, मुखे आपड़े बचाव मुंझ जो किछ बोलनअ तेथुक सुणो” ²जबी तिवें पलुसक इबरानी बासा मुंझ बोलदुई सुणअ तबी सो चुप रएँ अंर तेणे बोलो ³“आऊँ त एक यऊदी आदमी अ जा किलिकिया के तरसुस मुंझ पईदा अणा अंर यरुसलेम मुंझ गमलीएल ढाया पढा अर बड़ा अणा अंर जेई आमारे बाटबाठी कि बिवस्ता ती तेथुक आछे से सिखी, अंर आऊँ बी परमेस्वरअ का ऐसनाई भगत ता जेसने तुवें ऐला अ। ⁴ईसाक माननअ वाड़े लोगुंक में इछे सताएँ की मरद अंर बेटकुड़ीयाऊँक भाधी करी जेला पुण्डे गटे अंर किछ मराई बी देने।

5^{ऐथु} बाता के बड़े पुजारी अंर यऊदी बेटांग के बाटबाठे गवा अ। में तिऊँ बेरी दमिसक के यऊदी भाईयूँ के आस्ते चिठी लिखाई कि जो आऊँ तेकीया के ईऊँ लोगुंक बादी करी यरुसलेम लेमा अंर सजा सकमा दियाई।

पलुसअ को जिऊँ कसो बदलुण

6^{तबी} ऐसो ओ कि जबी आऊँ दमीस के आस्ते जान्दा ता लागीएँ अंर तेथु नजदीक पोऊँछा तबी गमा का बखत अणा अंर एकदम से गईणी बेजाई आसो लागो अंर मुं भारोड़ी चमको। 7^{अंर} आऊँ धईनी पड़ा रुड़ी, तबी मुखे एक बास सुणुणी, 'साऊल, ओ साऊल, तु मुखे काई सताएँ?' 8^{तबी} में जबाब देना, 'ओ परभु तु कुणा अ?' तेणे मुखे बोलो, 'आऊँ सेजाई नासरत का ईसा अ जेसके ते सताई लेया।' 9^{जे} लोग मेरे सात ते तिवें बी तेथु आसेक त देखो पर जेणे मेरे सात बाता ती लेई लाई तेसकी बास तिवें सुणी ना। 10^{तबी} में तेस बेरी पुछो कि, 'ओ परभु, में का करन?' तबी परभुएँ मुखे बोलो, 'खडा ऊजु अंर दमीस के आस्ते जा, तेकी आऊँ सेजो सब ताऊँ बेर बोली देन्दा जेतुके आस्ते में ताऊँखे छांटी राखा।' 11^{अंर} तेथु बेजाई आसे लेई आऊँ अन्धा गोणा अंर तबी तिवें मेरा आत पाकड़ी करी मुखे दमीस नेजा। 12^{तेकी} मुसा कि बिवस्ता माननअ वाड़ा अनया नांव का एक भगत ता अंर तेसकी तेकीया के लोगु मुंझ आछी इजत ती। 13^{सो} मुखे मिलदा आ अंर तेणे खड़े अई करी मुखे बोलो, 'ओ बाई साऊल, तु फेर से ऐर अंर तलाई मेरे आखे खुली नठे अंर सो मुखे देखाऊँन्दा लागे। 14^{तबी} तेणे मुखे बोलो, "आमारे बाटबाठी के परमेस्वरएँ ताऊँखे ऐथु आस्ते छांटा कि तुँ तेसकी इछा झाणला, अंर तेस धरमीक ऐरला अंर तेसकी बाता सुणला। 15^{काईकी} तुई तेसके बिलाई सबु लोगु के सामणी तेथु बाता का गवा अन्दा जेई ते देखी अंर सुणी अ। 16^{ऐबे} देर काई करे? ऊजु, अंर नाईण कर अंर तेसके नांव से पराथना करी करी आपड़े पाप धोई गेर।"

17^{जबी} आऊँ पछी यरुसलेम आई करी मन्दीरअ पुण्डा पराथना ता लागीएँ करदा तबी मे एक दरसन देखा 18^{अंर} तेथु दरसन मुंझ परभुवें मुखे बोलो, "तान्त कर अंर झठ यरुसलेमई धुर जा, काईकी ऐजे लोग मेरे बारे मुंझ तेरी गवाई मानदे ना।" 19^{में} बोलो, "ओ परभु, सो त मेरे बारे मुंझ ऐजो जाणअ कि आऊँ ताऊँच बिस्वास

करनअ वाड़े लोगुंक जेला पुण्डे गेरअ अंर तिऊँ मारनअ के आस्ते यऊदी दियाण्डे पुण्डा ता जावं।²⁰जला तेरे गवा सितफनुसक जान से ता लेया मारी, तला आऊ बी तिऊँके सात तेवड़ा खड़ा ता अंर जीवें तेसके मारी ता लेया मे तिऊँके गटूण ते ले जागी।²¹अंर परभुएँ मुखे बोलो, 'तुँ जा, काईकी आऊँ ताऊँखे दुरे दुरे गेर यऊदी डाई बेजदा।'

²²लोगुंवे ऐथु बाता दुरी पलुसअ कि बात सुणदे रे लागी। अंर तबी जोर से ललीयान्दे लागे कि, "ऐसे आदमीक मिटाई देओ, काईकी ऐसको जिऊन्दो रणअ ठीक ना आथी।"²³जबी सो ललीयान्दे, गटूण खोली करी फेरकादे अंर गईणी बी दुड़ उड़ान्दे लागे,²⁴तबी सेनापतीएँ ऊकम देना कि पलुसक छाऊणी बितोड़ी लेजाई करी मारो अंर पुछी करी पता लाओ कि यऊदी लोग ऐसके बिरोद मुंझ काई लागीएँ ललीयान्दे।²⁵जबी सो तेसके मारनअ के आस्ते बाददे ते लागीएँ तबी पलुसएँ तेस सुबेदारक बोलो जा तेस डाय़ा खड़ा ता, "का ऐजो ठीक अ कि तुवें एक रोमी आदमीक बगर गलतीया साबीत करे, मारदे लागीएँ?"²⁶ऐजो सुणी करी सुबेदार सेनापति डाय़ा नठा अंर बोलो, "ते ऐजो का लो कराई? काईकी यओ त रोमी आदमी अ।"²⁷तबी सेनापतीएँ पलुस डाय़ा आई करी तेसके पुछो, मुँ बेर ऐसो दे बोली, का तुँ रोमी नागरीक अ?" पलुसएँ बोलो, "अ।"²⁸ऐजो सुणी करी सेनापतीएँ बोलो, "में ऐथु नागरीता पाण के आस्ते भरी किमत देनी" पलुसएँ बोलो, "पर आऊँ त पईदाइसी रोमी अ।"²⁹तबी जे लोगु तेस बेरी पुछ ताछ ते करदे सो पछी नठे अटी अंर सेनापती बी ऐजो झाणी करी डरी नठा की में एक रोमी आदमीक लेया बादी अ।

बड़े बेटांगन्दा पलुस

³⁰सेनापती ऐजो ता सुचअ झाणन कि पलुस के खीलाप यऊदी लोगुवें का दोस लेया लाई ऐथु आस्ते दोतको जेथु लेयाई तेसके बाधी ता राखा सेजो खोली देनअ तबी बड़े पुजारी अंर यऊदी सनदरी लोगु को बेटांग करो अंर पलुसक उन्दा लेजाई करी तिऊँ के सामणी खड़ा करा।

23¹पलुसएँ बड़े बेटांग वाड़े लोगु के बिला गोर से ऐरो अंर बोलो, "ओ बाईओ, आऊँ ऐला दुरी परमेस्वरअ के आस्ते साचे जीय से जीणा।²तबी बड़े पुजारी अनयाएँ तिऊँ लोगुक जे

पलुसअ डाई खड़े ते तेसके मुअं बी साट लाणक बोलो।³ तबी पलुसएँ तेसके बोलो, “ओ कपटी तु गदीएँ लेई लीमिँ बीत जेसा अ, परमेस्वर ताऊँखे मारदा, ताऊँखे बिवस्ता के जेसा मेरा नियाव करनक राखा बेठाई पर ते बिवस्ता के बिरोद मुंझ मुखे मारनअ का ऊकम लेया देई?”⁴ पर जे लोग डाया खड़े ते तिवें बोलो, “का तूँ परमेस्वरअ के बड़े पुजारीक बुरो भलो बोले?”⁵ पलुसएँ बोलो, “ओ बाईयो मुखे ऐजा पता नु ता आथी कि यओ बड़ा पुजारी अ काईकी गरन्थ पाण्डो ऐसो लिखीएँ कि, ‘आपड़े लोगु के स्याणेक बुरो नु बोलीया।’”

⁶जबी पलुसक ऐजा पता लागा की बेटांगन्दे आधे फरीसी अंर आधे सदुकी लोग अ, तबी सो बेटांगन्दा जोर से बोलदा लागा कि, ओ बाईओ, आऊँ एक फरीसी का बेटा फरीसी अ। अंर मुच ऐथु आस्ते मुकदमा लेया चलाई कि आऊँ ऐजा बिस्वास करअ कि आदमी मरनअ के बाद पछी जिअ।”⁷जबी तेणे ऐई बात बोली तबी फरीसी अंर सदुकी लोगु मुंझ झगड़ा नठा अई अंर बेटांगन्दी फूट नठी पड़ी।⁸काईकी सदुकी ऐजो ते मानअ कि, मरनअ के बाद लोग पछी जिई ना अंर सरग दुत, अंर आत्मा आथी ना, पर फरीसी लोग ऐथु बाताक मानअ ते।⁹तबी बेजाई आला गुला माचा अंर फरीसी मुंझ के किछ सास्तरी लोग खड़े अणे अंर जगडूई करी बोलदे लागे। “आमे ऐस आदमी बीतोडी किछ बुराई ना देखी, जे कोजेई आत्माएँ या सरग दुतएँ ऐसके सात बाता लाई त का ओ?¹⁰जबी जगड़ा बेजाई नठा बड़ी तबी सेनापति डरी नठा की कदी सो पलुसअ के टुकड़े टुकड़े देवं करी। तबी तेणे सिपाईयूक ऊकम देना की सो उन्दे जाई करी पलुसक तिऊँ बिचन्दी जबरदसती नेई करी छाऊणी पुण्डे लेजाले।¹¹तेथुई रात परभुएँ तेस डाई खड़े अई करी बोलो, “इमत राख, काईकी जेसी तें यरुसलेम मुंझ मेरी गवाई देनी, तेसीई ताऊँखेरोम मुंझ बी देणी पड़दी

पलुस मारनअ की सलाव

¹²दोतके रातीएँ यऊदी लोगुवें सलाव करी अंर कसम खाई की जा लुगी आमे पलुसक मारी नु गेरमे ता लुगी किछ ना खान्दे पीन्दे।¹³सलाव करनअ वाड़े चालीस लोगुं से जादा ते।¹⁴तिवें बड़े पुजारीऊँक अंर बाटबाठी बेर जाई करी बोलो कि, “आमे ऐई राखी ठाणी कि जा लुगी आमे पलुसक मारी नु गालमे ता लुगी किछ ना

बिनास दे। ¹⁵ऐथु आस्ते ऐबे तुवें अंर यऊदी बेटांग वाड़े सेनापतिक समझाओ की डंग से छांट बीण करनअ के आस्ते पलुसक आमु डया ले, अंर आमे तेसके ऐवड़े पोऊछनअ से पोईले मारी गेरदे।”

¹⁶पर जबी पलुसअ के बाणजेक ऐथु बाता का पता चला तबी तेणे छाऊणी पुण्डे जाई करी पलुसक बोलो। ¹⁷तबी पलुसएँ सुबेदारु मुंझी एकक आपु डाई बोईदा अंर बोलो, “ऐस आदमीक सेनापती डाई लेजाओ अंर यओ तेस बेर किछ बोलनअ सुचअ।” ¹⁸तेणे तेस छोरेक सेनापति डाई लेजा अंर बोलो, “बंदी पलुसएँ मुखे आपु डाई बोईदा अंर ऐस छोरेक ताऊँ डया पोऊछाण के आस्ते मुँ से अरजी करी, काईकी ऐजा छोरा ताऊँ बेर किछ बोलनअ सुचअ।”

¹⁹सेनापती तेस छोरे का आत पाकड़ा अंर अलग नई करी पुछो, “बोल तु मुँ बेर का सुचे बोलनअ?” ²⁰छोरेएँ बोलो, यऊदी लोगुवें ऐसो राखो ठाटी कि सो ताऊँसे ऐजी अरजी करदे कि तु पलुस बेरी ओर गईराया से जाणनअ के आस्ते तेसके बड़े बेटांगन्दा लेया। ²¹पर तिऊँकी नु सुणीया काईकी तिऊँ मुंझी चालीस से जादा लोगुवें ऐजो राखो ठाटी कि जा लुगी आमे पलुसक मारी नु गालमे ता लुगी किछ ना खान्दे पिन्दे, अंर सो ऐबी बी तियार अ बास तेरा ऊकम लेया ठरी।” ²²तबी सेनापतीएँ तेसके ऐसो बोली करी पछी बेजा कि, “कसी बेर नु बोलीया की ऐई बाता ते मुँ बेर राखी बोली।”

पलुसक केसीरीया बेजा

²³तबी तेणे दुई सुबेदारुक आपु डया बोईदी करी बोलो “दुई सो सिपाईऊँक, सतर घोड़े वाड़ीक, अंर सो भाले वाड़ीक बोईदअ अंर राती के नौ बेजे कैसरीया जाण के आस्ते तियार अले। ²⁴अंर पलुसअ के आस्ते बी किछ घोड़े तियार राखो जो तेसके बी फेलिक्स राज्यपाल डाई ठीक ठाक से देले पोऊछाई।” ²⁵तेणे ऐसी चिठी लिखी:

²⁶“आदरणीय राज्यपाल फेलिक्सक ताऊँखे कलेदिऊस लूसियास के तरफ से ढाल। ²⁷ऐस आदमीक यऊदी लोग पाकड़ी करी मारनअ वाड़े ते पर जबी मुखे ऐजो पता लागा की यओ रोमी अ, तबी में सिपाईऊँक नई करी छुड़ाई लेया। ²⁸अंर ऐजो जाणनअ के आस्ते की यऊदी तेस पाण्डा दोस काई लावं में तेसके यऊदी बड़े बेटांगन्दा लेजा। ²⁹तबी मुखे ऐजा पता लागा की यऊदी तेस पाण्डा आपड़े

बिबस्ता के बिरोद मुंझ दोस लावं, पर जानसे मारनअ अंर बादनअ जोगा तेसका कोई दोस ना आथी। ³⁰जबी मुखे पता चला की सो ऐसके मारनअ के ताक पाण्डे अ, तबी में ऐसके तलाई ताऊँ डाई बेजा; अंर ऐस पाण्डा दोस लाण वाड़ीक ऊकम देना की सो बी तेरे सामणी आई करी बोलले।” ³¹सिपायूँ ऐथु ऊकमक पुरा करा अंर रातेई रात पलुसक अंतिपतरिस सईर लेजा। ³²दोतके सिपाई पछी छाऊँणीन्दे आए अंर तेसके घोड़ी वाड़ी के सात आगीण्डा देना बेजी। ³³तिवें कैसरिया पोऊछी करी सेजी चिठी राज्यपालक देनी अंर पलुसक तेसके आतन्दा देना सौंपी। ³⁴राज्यपालऐं चिठी पढ़ी अंर पलुस बेरी पुछो की तु कोजे मुलक का रणअ वाड़ा अ? जबी तेसके पता चला की सो किलिकिया का रण वाड़ा अ, ³⁵तबी तेणे बोलो, “आऊँ तेरी सुणाई तबी करदा जबी ताऊँच दावा करनअ वाड़े आई जाले।” अंर तेणे ऊकम देना की पलुसक ऐरोदेस के किले पुण्डा राखीया अंर तेसका पेरा देया।

राज्यपाल फेलिस के सामणी

24 ¹पांच दुस के बाद बड़े पुजारी अनयाऐं किछ यऊदी बाटबाठे नेताऊँक अंर तिरतुलुस नांव का एक बकील लेई करी केसरिया आ अंर सो राज्यपालअ के सामणी पलुसअ पाण्डी गलतीया लान्दे ते रे आई। ²जबी पलुसक बोईदी गाला तबी तिरतुलुसऐं तेस पाण्डा दोस लाई करी बोलो, “आदरणीय फेलिस, तेरे बजे से आमारे देसन्दी सान्ती अ अंर तेरे कामु लेयाई देसन्दा बेजाई सुदार अणा। ³ऐथु आस्ते सारे जागा अंर सारे बखतअ आमे ताऊँखे साबासी देवं। ⁴आमे ताऊँखे ओर दुख देणा ना सुची पर आमे ताऊँ से अरजी करु की तु आमारी एक दुई बात सुण। ⁵आमारी बात ऐजी अ कि या आदमी जगड़ी अर दुनिया के सारे यऊदी लोगु मुंझ फूट गेरनअ वाड़ा अ अंर नासरी लोगु के दड़े का स्याणा अ। ⁶अंर जबी ऐणे मन्दिरक बी बिष्टण सुंचो, तबी आमे ऐसके पाकड़ी गेरा (°अंर ऐसका नियाव आपणे बिबस्ता के जेसा करना सुचअ ⁷पर सेनापति लिसियाऐं आमु बेरी तेसके जबरदसती खाईची नेया ⁸अंर ऐसीच दोस लाण वाड़े लोगुंके तेरे सामणी आण का ऊकम देना।) आमे ऐसीच ऐथु बाता का दोस लावं अंर तु ऐस

° (किछ पुराणे युनानी ग्रन्थों पाण्डा ऐजी आयता आथीना।)

बेरी आपु कर पुछी तबी ताऊंखे बी पता चलदा।” 9अंर यऊदी लोगुवें बी तेसका सात देना अंर बोलो, ऐई बाता साची अ।

पलुस का जबाब

10जबी राज्यपालएँ पलुसक बोलनअ का ईसारा करा तबी तेणे जबाब देना; “तु भरी सालु से ऐथु देसअ का ठाटनअ वाड़ा अ। मुखे ऐथु बाता झाणी करी बेजाई खुसी अ पर आऊँ तेरे सामणी आपणे बचाव मुंझ बोलअ। 11तु आपु बी झाणी सके की मुखे परमेस्वर कि आराधना करनअ के आस्ते यरुसलेम आई करी बारअ दुस गे अई। 12मुखे ना त मन्दिरअ पुण्डा ना दियाण्डे पुण्डा अंर ना सईरन्दा कसीके सात जगड़े या बोलचाल करदुई सुणा। 13अंर ना यओ तेथु बाताऊक साबीत सकी करी, जेथु का दोस यओ मुँ पाण्डा लावं। 14पर आऊँ तेरे सामणी ऐथु बाताक मानी गाल कि आऊँ आपणे बाटबाठी के परमेस्वरअ की आराधना तिऊँ लोगु के बांती करु जिऊँक यओ कचले बोलअ अंर जेओ किछ मुसा कि बिवस्ता अंर बाकीयूँ के गरन्थ पाण्डो लिखीएँ तेथुच आऊँ बिस्वास करु। 15अंर आऊँ परमेस्वरच तेसीई आस राखअ जेसी यओ आपु राखअ कि सारे दरमी अंर अदरमी दुयाई मरी करी पछी जिन्दे। 16ऐथु आस्ते आऊँ बी परमेस्वर अंर आदमी के सामणी आपड़ी अन्तर आत्मा सुचा राखनअ की कोसीस करु। 17भरी सालु के बाद आऊँ आपड़े लोगुंक के आस्ते दान पोछान्दा अंर भेटा चड़ान्दा आ। 18जला आऊँ मन्दिरअ पुण्डा आपणा सुधीकरण ता लागीएँ करदा तला ईवें लोगुवें मुखे देखा अंर तेला मुं ढाया ना त बीड़ ती अंर ना आला गुला ता। 19पर आसीयाई आईएँ किछ यऊदी लोग तेवड़े ते। जे तिऊँ मेरे खिलाप किछ असंअ तबी तिऊँक ताऊँ डाई आई करी मुँच दोस चाएँ लाईएँ। 20या जे लोग ऐकी अ सो आपुई बोलले कि जबी आऊँ यऊदी बड़े बेटांगन्दा खड़ा ता तबी तिवें मु पाण्डी का गलती लाई। 21सिरप एक बाताक छोडी करी जेई मे तिऊँ के बिचंदी खड़े अई करी बोली, ‘मरी करी पछी जिण के बारे मुंझ तारे सामणी मेरा नियाव ता लागीएँ अन्दा।’”

22पर फेलिसरें जा परभु के ऐथु बाटा के बारे मुंझ आछे डंग से ता जाण, तेणे ऐथु फसलेक टाड़ी देना अंर बोलो कि, “जबी सेनापति लुसियास आई जाला तबी आऊँ ऐथुच आपड़ा फेसला सुणान्दा।” 23अंर सुबेदारक ऊकम देना की पलुसअ के परे मुंझ

कणीक सी छुट देया अंर तेसके दोस्तुक तेसकी जरत पुरी करनई से नु रोकीया।

पलुसअ की फेलिस अंर तेसके जोरुआ के सात बातचित

²⁴किछ दुस के बाद फेलिस आपड़े जोरुवा दुरसिलाक आपणे सात लेई करी आ जेई यऊदी ती अंर पलुसक बोईदी करी तेथु बिस्वासक के बारे मुंझ सुणो जा ईसा मसीच अ। ²⁵जबी सो परमेस्वरअ कि अछाई, संयम अंर परमेस्वरअ के आण वाड़े नीयाव की बाता ता लागीएँ बोलदा तबी फेलिस डरी नठा अंर जबाब देना, ऐबी तु जा अंर आऊँ ताऊँखे बखत ऐरी करी फेर बोईदन्दा। ²⁶काईकी तेसके पलुसअ बेरी पईसे मिलनअ की ऊमीद ती, ऐथु अरनी सो तेसके बार बार ता बोईअ अंर बाता ता लावं। ²⁷पर जबी दुई साल बिची गोएँ तबी फेलिस के झागाच पुरकियुस फेस्तुस आ अंर फेलिसएँ यऊदी लोगुंक खुस करनअ के आस्ते पलुसक जेलाई पुण्डा देना रणई।

पलुसअ कि रोमी राजा के सामणी अण कि मांग

25 ¹जबी फेस्तुसक तेथु मुलकन्दे आई करी तीन दुस अई गे तबी सो कैसरियाई यरुसलेम नठा। ²तबी बड़े पुजारीऊँवे अंर यऊदी के बड़े लोगुएँ तेसके सामणी पलुसअ कि नालस करी ³अंर ऐजी अरजी करी कि पलुसक तु यरुलेम दे बेजी काईकी सो तेसके बाटाई ते सुचअ मारना। ⁴फेस्तुसएँ बोलो कि, “पलुस केसरीया मुंझ गटीएँ अंर आऊँ तिखा तेकी जाण वाड़ा अ।” ⁵तबी तेणे फेर बोलो कि, “तुमे मुंझी जे खास लोग अ सो मेरे सात चालो अंर जे तेस आदमी कि किछ गलती अ, त तेस पाण्डी लाले।

⁶सो तिऊँके सात आठ दस दुस लुगी रणा अंर तबी केसरीया नठा। अंर दोतकेई कचरीया पुण्डा बेठी करी पलुसक लेण का ऊकम देना। ⁷जबी पलुस आई गोवा तबी यरुसलरमई जे यऊदी ते रे तवें तेसके गेरी करी तेसीच ऐसी गलतीया लाई जेई तिवें साबीत बी सकी ना करी। ⁸पलुसएँ आपड़े बचाव मुंझ बोलो, “मैं ना त यऊदी बिवस्ता के बिरुद अंर ना मन्दिरअ के अंर ना रोम के राजा के बिरुद कोई काम करा।” ⁹तबी फेस्तुसएँ यऊदीक खुस करनअ के आस्ते पलुसक बोलो, का तु यरुसलेम जाण सुचे की तेकी आऊँ ताऊँच लाईएँ गलतीयाऊँ का फेसला सकमा करी?” ¹⁰तबी पलुसएँ

बोलो, आऊँ रोमी राजा के कचरीया पुण्डा अ खड़ा अंर मेरे मुकदमे का फेसला बी ऐवड़ाई चाएँ अणा। जेसो तु आछे से जाणे की में यऊदी लोगु को किछ ना राखो बिगाड़ी। ¹¹जे आऊँ गलत अ अंर में मोती जोगा कोई काम राखा करी तबी आऊँ मरनअ के आस्ते तियार अ। पर जे ईऊँके लाईएँ दोसु मुंझी एक बी साचा नु अला तबी मुखे कोई बी तिऊँके आतन्दा सँपी ना सकी अंर रोमी राजा से मेरी ऐजी अरजी अ। ¹²तबी फेस्तुसएँ आपड़े सलाकारु के सात सलाव करी अंर पलुसक जबाब देना, “ते रोमी राजाक अरजी करी, ऐथु आस्त ताऊँखे रोमी राजा के सामणी लेजान्दे।”

राजा अग्रीपा डाई पलुस

¹³किछ दुस बाद राजा अग्रीपा अंर बिरनीकी फेस्तुस से मिलदे केसरिया आएँ। ¹⁴जबी तिऊँक तेकी कुछेई दुस अई गोए तबी फेस्तुसएँ पलुसअ के बारे मुंझ बोलो, ऐकी एक ऐसा आदमी अ जेसके फेलिसएँ जेला पुण्डा राखा गेरी, ¹⁵जबी आऊँ यरुसलेम मुंझ ता तबी बड़े पुजारी अंर यऊदी के बाटबाठीएँ तेस की नालस करी अंर तेसके सजा देण कि मांग करी। ¹⁶तबी में तिऊँक जबाब देना कि, “रोमी लोगु की ऐसी चाल आथीना की जा दुरी दुयाई जगड़ी सामणी नु अले अंर जे तेसीच दोस लाईएँ तेथु के बारे मुंझ आमणी सामणी बात नु अली ता लुगी सजा सकी ना देई। ¹⁷जबी सो मेरे सात ऐकी आएँ तबी में बिना देर करे दोतकेई कचरीया पुण्डे बेठी करी तेस आदमीक बोईदनअ का ऊकम देना। ¹⁸जबी तेसीच दोस लाण वाड़े बोलदे उजुणे तबी तिवें तेसीच ऐसा कोई दोस ना सका लाई जेसो में सुचो तो ¹⁹पर तिवें आपड़े दरम की किछ बाता अंर ईसा नांव के एक आदमीअ जा मरी रा, पर पलुस तेसके जिऊन्दे अण का दावा करअ ऐथु बाताच तिऊँका जगड़ा। ²⁰पर मेरे समझ मुंझ ना आओ कि ऐथु बाता का पता कसा लाणा, ऐथु आस्ते में तेसके पुछा, ‘का तु यरुसलेम जान्दा अंर तेकी ऐथु बाता का फेसला सकला अई?’ ²¹पर जबी पलुसएँ अरजी करी कि मेरा नियाव रोमी राजा ई करदा अंर ता दुरी आऊँ ऐकीई रन्दा, तबी में ऊकम देना की जा लुगी आऊँ ऐसके राजा डाई नु बेजमा, ता लुगी यओ ऐकीई रन्दा।” ²²तबी राजा अग्रपाएँ फेस्तुसक बोलो, “आऊँ बी तेस आदमी की बात सुणनी चावं” तबी फेस्तुसएँ बोलो, “तु तेसकी बात दोतिया सुणीया।” ²³जबी दोतके अग्रीपा अंर

बिरनीके बड़े धुम धाम से सेनापतिऊँ अंर सईरअ के खास लोगु के सात दरबार मुंझ पोऊछे तबी फेस्तुसएँ ऊकम देना की पलुसक ऊण्डा लेओ अंर तबी तेसके ऊण्डा लेया। ²⁴फेस्तुसएँ बोलो, “ओ राजा अग्नीपा, अंर जिछे लोग ऐवड़े आमारे सात अ, तुमे जे आदमीक देखी लेया ऐसके खीलाप यरुसलेम अंर ऐकीया के यऊदी लोगुवें मुँ से ललीयाई करी अरजी करी की ऐस को जिऊन्दो रण ठीक ना आती। ²⁵पर में झाणी गालो की ऐणे ऐसा किछ गलत काम ना करा जो मोत कि सजा मिलली। जबी ऐणे आपुई रोमी राजा से ऐजी अरजी करी कि मेरा फेसला राजा ई करदा ऐथु आस्ते में तेसके भेजनअ का फेसला करा। ²⁶तबी मुँ बेर एसके बारे मुंझ रोमी राजा डाई लिखी करी भेजनक किछ खास बात नु ती आथी। में ऐसके खास करी ओ राजा अग्नीपा तेरे सामणी ऐथु आस्ते लेया, जो जाच पड़ताल के बाद मुँ बेर किछ लिखनक अलो। ²⁷काईकी कसी केदीच लाईएँ दोस के बारे मुंझ बगेर बोले बेजना मुखे बेकार लागअ।

अग्नीपा के सामणी पलुस

26¹राजा अग्नीपाएँ पलुसक बोलो, “ताऊँखे आपड़े तरफ से बोलनअ की ईजाजत अ।” तबी पलुसएँ आत खड़ा करा अंर जबाब देना, ²“ओ राजा अग्नीपा, जिछे बाताऊँ का यऊदी लोगुवें मु पाण्डा दोस ला, ऐला तेरे सामणी तेथुका जबाब देणा आऊँ ठीक समझअ। ³खास करी ऐथु अरनी कि तु यऊदी की परथा अंर सारे जगड़ी के बारे मुंझ झाणे, अंर आऊँ ऐजी अरजी करु की तु आराम से मेरी बात सुण। ⁴सारे यऊदी ऐथु बाताक जाण कि में नान्दरीयाई से आपड़े जिन्देगी आपणे देस मुंझ अंर यरुसलेम मुंझ कसी जी। ⁵अंर सो मेरे बारे मुंझ पोईले से झाण अंर जे सो चावं त ऐथु बाता की गवाई बी देई सकं की में फरीसी अई करी आपणी जिन्देगी दरम के आस्ते कटर अई करी जी। ⁶ऐजा मुकदमा मुंच ऐथु बाता के बजे से लागीएँ चलदा कि जा वादा परमेस्वरएँ आमारे बाटबाठी के सात ता करा आऊँ तेथुच बिस्वास करअ।⁷अंर आमारे बारा खानदानीएँ ऐथु वादेक पाणअ के आस्ते खुसी से रात दुस परमेस्वरअ की सेवा करअ। अंर ओ राजा ऐथुई ऊमीद के बजे से यऊदी लोग मु पाण्डा दोस लाव। ⁸तुँक ऐजी

बात बिस्वास करनअ जोगी काई ना लागी कि परमेस्वर मरीऐक पछी जिऊन्दा देव भाणी?

9“में बी ऐजोई तो सोचो की ईसा नासरी के नांव फईलण के बिरोद मुंझ मुखे बी किछ करनअ। 10अंर में यरुसलेम मुंझ ऐसोई करो कि बड़े पुजारी बेरी अक की चिठी लिखाई करी बेजाई परभु के लोगुंक जेला पुण्डे ते ले गेरी, अंर जबी तिऊंक जानसे ते ले मारी तबी आऊँ बी तेथु बाताच राजी ता। 11अंर आऊँ यऊदी लोगु के दियाण्डी पुण्डा जाई करी बिस्वासीऊँक डराई दमकाई करी तिऊँ बेरी ईसा के बिरोद मुंझ ता बोलाऊँ अंर आऊँ गुस्से लेई पागल अई करी भारीया के सईरुन्दा जाई करी बी तिऊँक सताऊँ ता।

जिऊ बदलुण के बारे मुंझ बोलनअ

12जबी आऊँ बड़े पुजारीऊँ बेरी अक अंर ऊकम लेई करी दमिसक ता लागीऐं जान्दा। 13तबी ओ राजा गमा के बखतअ में गईणी बी एक आसो ऊँन्दो आन्दुई देखो जेथु को आसो दुस से बी जादा तेज तो अंर सेजो आसो मेरे अंर मेरे साते आण्डन वाड़ी के चारु बिला फईलो। 14जबी आमे सबीयाऐं दईनी पड़े रुड़ी तबी मुखे इब्रानी बोली मुंझ ऐई बास सुणाऊणी, ‘साऊल, ओ साऊल, तु मुखे काई सताऐं? पईनेन्दी लात लाणी तेरे आस्ते अखो आ।’ 15में बोलो कि, ‘ओ परभु तु कुण अ?’ परभुऐं बोलो, ‘आऊँ ईसा अ जेसके तु सताऐं आ। 16पर तु उजुऊ, अंर आपड़े गोडीच खड़ा आ। में ताऊँखे ऐथु आस्ते दरसन देना की तु मेरा सेवक बण अंर जेई बाता मे ऐला ताऊँखे देखाई अ अंर जो बी किछ आऊँ ताऊँखे देखामा तु तेथु कि गवाई लोगुंक देला।’ 17आऊँ ताऊँखे यऊदी अंर गेर यऊदी डाय़ा बेजदा अंर तिऊँ से बचान्दा। 18कि तु तिऊँके आखे खोलला अंर तिऊँ लोगुंक इनीयारे मुंझी आसे के बिला लेला अंर सेतानअ के तागत से परमेस्वरअ के बिला बोऊड़ाला जेथु लेई तिऊँके पाप माफ अले अंर परमेस्वरअ के छांटीऐं लोगु मुंझ आपणी जागा पाले।

पलुसअ के काम

19“ओ राजा अग्रिपा, ऐथु आस्ते में तलाई जा दरसन मुखे सरग से ता मिला मे तेथुक टाड़ा ना। 20अंर पोईले दमिसक मुंझ तबी यरुसलेम अंर तबी सारे यऊदिया मुलक के लोगु मुंझ अंर गेर

यऊदीक समझांदा रा लागी की आपणे गलत कामु से पछी जिऊ बोऊड़ाओ अंर परमेस्वर के बिला बोऊड़ो अंर ऐसे काम करो जेथु लेयाई ऐजा पता लागला कि तुवें आपणे जिऊँ बोऊड़ाई राखो।

²¹ऐथु बाता के बजे से यऊदी लोग मुखे मन्दिरअ पुण्डी पाकड़ी करी मारनअ की कोसीस करी। ²²पर परमेस्वरअ के मदत से आऊँ ऐला ऐकी नेन्दरे अंर बड़े लोगु के सामणी गवाई देण के आस्ते खड़ा अ। आऊँ तेथु बाताऊँ छोडी करी ओर किछ ना बोली जेई बाकीयूँ अंर मुसाँ बोलो की अण वाड़ी अ। ²³ मसीक दुख पड़दा जेलना अंर सो ई सबु से पोइले मरीँ मुंझी पछी जिऊँन्दा अई करी, यऊदी लोगु मुंझ अंर गेर यऊदी मुंझ मोक्स के आसे का परचार करदा।”

²⁴सो आपड़े बचाव मुंझ जबी ऐजी बाता बोलदा ता लागीँ तबी फेस्तुसँ जोर से बोलो, “ओ पलुस, तु पागल अ। तु जादा पड़ी करी पागल रा अई। ²⁵तबी पलुसँ बोलो, “ओ आदरणीय फेस्तुस, आऊँ पागल आथीना, पर आऊँ साची अंर समझ की बाता बोलअ। ²⁶ओ राजा आऊँ तेरे सामणी निडर अई करी बोली सकअ काईकी तु ऐथु बाता के बारे मुंझ आपु बी जाणे अंर मुखे बिस्वास अ की ऐथु बाताऊँ मुंझी किछ बी बाता ताऊँ से छुपीँ ना आथी। काईकी ऐजी गटना कथुई कुणेन्दी अई ना। ²⁷ओ राजा अग्रिपा, का तु बाकीयूँ का बिस्वास करे अ? आऊँ जाण अ की तु बिस्वास करे।” ²⁸तबी राजा अग्रिपाँ पलुसक बोलो, “का तु ऐजो समझे की इछे झट तु मुखे मसीच बिस्वास करनअ के आस्ते मनाई गालदा?” ²⁹पलुसँ बोलो, “ बाऊँ तीखे बाऊँ बीसते पर मेरी परमेस्वरअ से ऐजी अरजी अ कि, तुई ना पर जिछे बी लोग मुखे ऐला सुणदे लागीँ सो, ऐथु सांगणाऊ छोडी करी, सबीयाँ मु जेसे बणले।” ³⁰तबी राजा खड़ा उजुणा अंर तेसके सात राज्यपाल, बिरनिकी अंर तेवड़े बेठीँ सारे लोग बी खड़े अणे। ³¹तेवड़ी भाण्डे जाई करी सेजे लोग आपस मुझ बोलदे लागे, एणे आदमी त ऐसा किछ काम ना करा कि ऐसके जेल कि सजा या मोत की सजा मिलली। ³²तबी अग्रिपाँ फेस्तुसक बोलो, “जे या आदमी रोमी राजा बेर आपणी अरजी नु करदा, त आमे ऐसके छोडी ते सकअ।

पलुसक रोम बेजा

27¹जबी ऐजो ठाटी पाओ की आमे झाजन्दे इटली जान्दे, तबी तिवें पलुस अंर ओर केदियूँक बी तेथु पलटण के सुबेदारक देने सोंपी जेथु को नांव 'रोमी राजा की पलटण' तो अंर तेस सुबेदार यूलियुस थाले सो सिपाई काम ते करअ।²अंर आमे अदरमिँक नांव के जागाची पाणी के झाजन्दे बेठे जेओ एसिया के छेवं छेवं के मुलकअ बाठु जाण वाड़ो तो अंर अरिस्तखुस नांव का तिसलुनीकिया का रण वड़ा मकदूनीयाएँ आमारे सात बेठा।³दोतके आमे सेदा मुंझ उतरे अंर तेकी यूलियुसएँ पलुसअ के सात आछा बेवार करा अंर तेणे पलुसक आपणे सातीँ के सात मिलनअ कि ईजाजत देनी जो सो तेसकी खातीर दारी करले।⁴तेकीई आमे साइप्रस के आइ मुंझ नठे काईकी बात ऊलटो तो लागीएँ भन्दो।⁵तबी आमे समुद्रन्दे किलिकिया अंर पंफूलिया पाईले बीला लुकिया के मूरा सईरन्दे पोऊछे।⁶तेकी सूबेदारक इटली जाण वाड़ो सिकन्दरिया को एक झाज मिलो, अंर तेणे आमुक तेथुन्दे देने बेठाई।⁷तेकी आराम आराम से जान्दुई कती दुस बाद बेड़े मुसकिल से कनिदुस के सामणी पोउछे। काईकी बात ऊलटो तो लागीएँ भन्दो अंर आमुक आगिण्डो नु तो देई बड़नई अंर आमे सलमोन के सामणीई जाई करी क्रेत टापु के आइ मुंझ नठे काईकी तिया बाटू बात कम तो।⁸अंर तेथु के छेवं छेवं पुण्डे बड़े मुसकिल से जान्दुई आमे एक जागाच पोऊछे जेथुको नांव बांका झाज का अडा ते बोलअ अंर तेकीई लसया सईर नजदीक तो।⁹जबी बेजाई बखत बिती गा अंर झाजको आगीण्डो जाण बी मुसकिल नठो अई अंर यऊदी लोगु के बरतअ के दुस बी खतम नठे अई तबी पलुसएँ तिँक ऐसे बोलो कि,¹⁰"ओ बाईयो, मुखे एसो लागअ कि ऐथु सफर मुंझ बेजाई मुसिबत आण बाड़ी अ अर घाटा समान अंर झाज का ई आथी ना पर आमारी जानी का बी अई सक।"¹¹पर सुबेदारएँ पलुस के बातु से जादा झाज के मालीक अंर चलाण बाड़े के बाताऊच जादा बिस्वास करा।¹²काईकी सेजो झाज का अडा स्याड़े काटनक ठीक नु ता आथी, ऐथु आस्ते बरीसी लोगु कि ऐजी सलाव ती कि फीनिक्स पोऊछी करी स्याड़ा बितामे। फीनिक्स सईर क्रेत टापु का एक झाज का अडा अ जेथु को मुं दखीन पछीम अंर उतर पछीम के बिला तो।

समुन्दरन्दो ढण्ड बात

¹³दखीन के बीलाई बात सुले सुले भन्दो लागो अंर लोगुंवेँ सुचो आमे आगीन्डे बडी सकअ ऐथु आस्ते तिवे झाजक रोकनअ वाड़े लंगरक चुंगी गेरो अंर झाज क्रेत के छेवं छेवं पुण्डो जान्दो लागो। ¹⁴किछ बखत के बाद तेथु टापुची बेजाई ढण्ड लागो भन्दो जेतुक उतर पुरवी ढण्ड ते बोलअ। ¹⁵जबी ढण्ड झाजअ के बीला आओ तबी झाजअ आगीण्डो ना सको बडी अंर आमे आगीण्डे जाण की कोसीस बी छोडी देनी अंर झाजक बात के सात जाणई देनअ। ¹⁶झाज भई भई करी कौदा नांव के टापु के आड़ मुझ पोऊछो अंर आमे बड़े मुसकिल से जेई नान्दरी नावी झाजन्दी ती तेथुक झाज पाण्डी बादी अंर ¹⁷तेथु के बाद लोगुंवेँ झाजक रसी लयाई देनअ बादी, काईकी लोग ऐसे ते डरअ कि कदी झाज उन्दो रते मुंझ नु चाएँ दसो अंर झाजअ की चादर ऊन्दी देनी खईची जेथु लेयाई झाज तो चलअ। ¹⁸अंर दोतके जबी ढण्ड ओर जोर से लागो बन्दो तबी आमे झाजन्दी समान फेरकान्दे लागे। ¹⁹अंर दोतके तिवेँ झाजअ को जो समान तो तेथुक बी फेरकाई देनअ। ²⁰जबी भरी दुस लुगी दुस अंर तारे देखाउणे ना अंर ढण्ड भन्दो रो लागी। तबी आमारी बचनअ की कोई उमीद ना रई।

²¹जबी भरी दुसु से तिवेँ किछ नु तो राखो खाई तबी पलुसएँ खड़े अई करी बोलो, “ओ लोगो, आछो ऐजो तो की तुमे मेरी बात सुणदे अंर क्रेतई नु आन्दे तबी ना त ऐई मुसिबत ती आन्दी अंर ना या घाटा ता अन्दा। ²²पर ऐबे आऊँ तुमुक ऐसे समझाव की इमत राखो काईकी तुमु मुंझी कसी की बी जान ना जान्दी पर झाज टुटी नठदो। ²³काईकी जेस परमेस्वरअ का आऊँ अ, अंर जेसकी सेवा आऊँ करअ तेसका एक सरगदुत एला रात मुँ डाय आ अंर तेणे मुखे बोलो, ²⁴“ओ पलुस, डरीया नु; ताऊँखे रोमी राजा के सामणी खड़ो अण जरूरी अ अंर तेरे आस्ते जेई परमेस्वरअ कि अछाई अ तेथु के बजे से जे लोग तेरे सात अ सो बी बची जान्दे।” ²⁵एथु आस्ते तुवेँ इमत राखो, काईकी आऊँ परमेस्वरच बिस्वास करअ कि जेसो मुँ बेर बोली राखो तेसोई अन्दो। ²⁶पर आमुक कोजेई टापुच जाई करी रुकन अ।

झाजअ को टुटन

27जबी चोऊँदअ राती अई गोई अंर आमै आदरीया के समुद्रन्दे ते लागी भटकन्दे, तबी आदोड़ी के रात झाजअ के चलाण वाड़ेक लागो कि कोजेई छेवं पुण्डे लागे पोऊछी। 28तिवें समुद्रअ की गईराई नापी त असी आत ती। कणिक बिसतोड़े फेर पाणी की गईराई नापी त साठ आत ती। 29तिवें झाजक कइड़ी पाण्डो टकराण के डर के बजे से झाजअ के पछले बिला के चार लंगर देने फेरकाएँ कि झाज रुको जालो अंर सबुएँ ऐजी अरजी करी कि दुस चाएँ निकड़ो। 30अंर झाजअ के चलाण वाड़े तेन्दी भागन के ताक मुंझ ते अंर तीवें लंगर फेरकाण के भाने से, मदत करनअ वाड़ी नावी पाणी मुंझ उतारी। 31तबी पलुसएँ सुबेदार अंर सिपाईऊँक बोलो “जे ऐजे झाजअ के चलाण वाड़े लोग झाजन्दे नु रुकले तबी तुमे बी बचदे ना।” 32तबी सिपाईऊँवें रसे काटी देने अंर मदत करनअ वाड़ी नावी पाणी मुंझ पड़ी।

33रात बियाण से पोईले पलुसएँ तिऊँसे अरजी करी कि खाणको करो खाई, “ऐला तुऊँक ठरदुई ठरदुई बुकाएँ चोऊँद दुस गे अई अंर तुवें किछ बी खाणको ना खाओ। 34आऊँ तुऊँक खाण खाणक ऐथु आस्ते बोलअ की तारो जिऊन्दो रण जरुरी अ। काईकी तुऊँ मुझी कसी का मुण्डअ का बाड़ बी बाका ना अन्दा।” 35ऐजी बात बोलनअ के बाद तेणे सबु के सामणी आपुक रोटी गाडी अंर परमेस्वरक धन्यवाद देना अंर तेथुक तोड़ी करी खान्दा लाग। 36तबी तिवें सबुएँ बी इमत करी अंर खाणको खाओ। 37झाजन्दे कुल मिलाई करी दुई सो छीयातर लोग ते। 38जबी तिवें अगाई करी खाणको खाई गालो तबी गीऊँ समुद्रन्दे देने फेरकाई जो झाज अइको जालो।

39जबी दुस निकड़ीगो तबी तिवें सेई जागा सकी ना पछाणी पर एक छेवं पुण्डो झाजक रोकनअ सुचो। 40तबी तिवें लंगरअ के रसे काटी करी तेथुक समुद्रन्दे देनअ जाणई अंर तलाई पतवार के बधियण खोली देने अंर बातअ के बिला का पाला चड़ाई करी छेवं पुण्डेक नठे। 41झाज रते मुंझ नठो दसी अंर तेथु का आगला ईसा अइजी नठो अंर तेथुक ईलाई बी ना सको अंर झाजअ का पछाला ईस्सा पाणी के अलीयारी लेई टूटदा लाग। 42तबी सिपाईऊँवें केदी मारनअ की सलाव करी जो तिऊँ मुंझी कुणीएँ बी भवा लाई करी

बची नु सकला। ⁴³पर सुबेदार पलुसक बचाणा ता सुचअ अंर तेणे तिऊँक ऐसो देनअ ना करनईँ अंर ऊकम देना की जो भवा लाईँ सकं सो पोईले छेवं पुण्डे पोऊछो। ⁴⁴अंर बाकी लोग तखतीच अंर झाज के टुकड़ी के सारे के जाओ। ऐथु डंग से सारे लोग चोकसी के छेवें लागे।

माल्टा टापु मुंझ पलुस

28¹जबी आमे बची गोवे तबी आमुक ऐजा पता लागा की ऐजा माल्टा टापु अ। ²अंर तेकीया के मुल निवासी लोगुएँ आमारे सात आछा बरताव करा। काईकी सायाड़े मुंझ जड़ ते रे लागी ऐथु अरनी तिवें आग ओजाईँ करी आमु सबुक ठईँराए। ³जबी पलुसएँ लाकड़ी का पुवा भादी करी आगी मुंझ ला तबी एक सुपाणोईँ आगी लेईँ तापी करी पुवे बितोड़ी भाण्डो आओ अंर पलुसक टुकी करी तेसके आत पाण्डो लपेटुण। ⁴जबी तेकीया के लोगुएँ सेजी सुपाणोईँ तेसके आत पाण्डो लपेटुएँ देखो तबी आपस मुंझ बोलदे लागे, “या आदमी साचेका खुनी अ। यओ समुदरन्दी त बची गा पर सचाईँ ऐसके जिणईँ ना देन्दी।” ⁵तबी पलुसएँ तिया सुपाणोयाक आगी मुंझ देनी फेरकाईँ अंर तेसके आपुक किछ ना ओ। ⁶तबी लोगुवें सुचो की यओ ऊसाईँ या एकदम से रुड़ी करी मरी नठदा, पर जबी सो बिसते दुरी ऐरदे रएँ लागी अंर पलुसक किछ ना अण तबी तिवें आपड़ी सोच बदली करी बोलो, “यओ त कोजाईँ देव अ।”

⁷तेथु जागा के उणडोड़ी पुण्डोड़ी तेथु टापु के स्याणे पबलियुस की जमिन ती अंर तेणे आमुक आपड़े दारके नेईँ करी तीन दुस लुगी दोसती दारी मुंझ आमारी आदीर खातीर करी। ⁸पबलियुस का बाबा बुखार अंर पेचीस लेईँ सातरन्दा ता सुतीएँ। अंर तबी पलुस तेस मिलदा बितरे नठा अंर पराथना करी करी आपड़े आत तेसीच राखा अंर सो ठीक गोआ। ⁹तेथु गटना के बाद तेथु टापु के सारे मरीज बी आएँ अंर ठीक गोएँ। ¹⁰तिवें आमारी भरी आदीर खातीर करी अंर जबी आमे जान्दे लागे तबी आमारे जरूरत को समान बी देनअ अंर झाजन्दो राखो।

पलुस को रोम जाणअ

¹¹तीन मिने के बाद आमे सिकन्दरिया के एक झाजन्दे नठे जेओ झाज तेथु टापुच पुरे सयाड़ा रओ अंर तेथु झाज को नांव जुड़वा देव तो। ¹²अर सरकुस पोऊछी करी आमे तेकी तीन दुस ठईरे। ¹³तेकीई झाजन्दे रेगियुम पोऊछे अंर एक दुस के बाद दखीण के बिलाई बात लागो भन्दो, अंर दोतके आमे पुतियुली पोऊछे। ¹⁴तेकी आमुक किछ बिस्वासी बाई मिले अंर तिवें आमुक तेकी रुकनक बोलो अंर आमे सात दुस दुरी तिऊँके सात रुके अंर ऐथु डंग से आमे रोम पोऊछे। ¹⁵जबी रोम के बाईयूक आमारी खबर मिली तबी सो अपियुस के चोक अंर तीन सराय नांव के जागा दुरी आमुक मिलदे आए। पलुसएँ तिऊँक देखी करी परमेस्वरक धन्यबाद देना अंर बेजाई खुस अणा।

पलुस रोम मुंझ

¹⁶जबी आमे रोम पोऊछी गे तबी पलुसक ऐखले रण की ईजाजत मिली अंर तेसके चोकीदारी मुंझ एक सिपाई ता।

¹⁷तीन दुस के बाद पलुसएँ यऊदी नेताऊक बोईदे अंर सो कठे अणे तबी पलुसएँ बोलो, “ओ बाईओ में आपड़े लोगु के या बाठबाठी के बिवस्ता के बिरोद मुंझ किछ ना करो तबी बी मुखे यरुसलेम मुंझ बादी करी रोमी लोगुंक देना सोंपी। ¹⁸तिवें मेरी जाँच पड़ताल करी करी मुखे छोड़ना सुचा, काईकी मेरा मोती जोगा कोई दोस नु ता आथी। ¹⁹पर जबी यऊदी लोग ऐथु के बिरोद मुंझ ललीयान्दे लागे तबी मुखे रोमी राजा बेर अरजी पड़ी देणी पर मुखे आपड़े लोगुच किछ दोस ना लाणा। ²⁰अंर ऐजाई कारण अ जो आऊँ तु से मिलण अंर बातचित ता सुचअ करनी। काईकी आऊँ सांगड़ाऊँ पाण्डा मसी के बजे से बादीएँ जा इसराईल की आस आ।” ²¹यऊदी नेताऊई पलुसक बोलो, “ना त तेरे बारे मुंझ यऊदीयाई कोई चिठी आई अंर ना कुणिए बाईयूवें आई करी खबर देनी अंर ना तेरे बारे मुंझ बुरी बात बोली, ²²पर तेरा बिचार का अ? आमे ताऊँ बेरी सुणना चावं, काईकी आमे झाण की सबतीई ऐथु बाटा के बिरोद मुंझ बोलअ, जेथुन्दा तु अ।”

²³तबी तिवें तेसके अरनी एक दुस ठईराओ अंर तदुस भरीसे लोग जेकी पलुस ता रअ तेकी कठे अणे अंर पलुसएँ परमेस्वरअ

के राज के बारे मुंझ गवाई देनी अंर मुसा की बिवस्ता अंर बाकीयू के किताबाऊँ पाण्डी ईसा के बारे मुंझ रातीएँ से पाछा दुरी समजान्दा रा लागी। ²⁴किछ लोगुएँ तेथु बाताच बिस्वास करा अंर किछ लोगुएँ बिस्वास करा ना। ²⁵जबी तिऊँकी आपस मुंझ सलाव पड़ी ना तबी सो जान्दे लागे तबी पलुस ऐसो बोलो कि, “सुचा आत्माएँ यसायाअ बाकी बेरी तुमारे बाटबाठी के बारे मुंझ ठीक बोलो,

²⁶‘जाई करी ईऊँ लोगुंक दे बोली, तुवें सुणदे त लागी रन्दे पर किछ ना समझन्दे तुमे ऐरदे त लागी रन्दे पर देखाऊन्दो ना, ²⁷काईकी ईऊँ लोगु के जिऊ धड़े रे गोई अंर कानु लेई योऊँ सुणन ना चाई अंर आपणे आखे बंद राखे करी, कदी ऐसो नु चारें अण की यओ आपणे आखी लेई देखले, अंर कानु लेई सुणले अंर जिय से समझले अंर पछी परमेस्वरअ के बीला फिरले अंर आऊँ तिऊँक ठीक भाणमा।’

²⁸“ऐथु आस्ते तुऊँक झाणीएँ चाईएँ की परमेस्वरएँ ऐथु मोकस की बात गेर यऊदी बेर देनी बेजी, अंर सो ऐथुक सुणदे अ।”
²⁹जबी तेणे ऐजो बोलो तबी यऊदी लोग आपस मुंझ बोल चाल करदे लागे अंर तेवड़ी धुर नठे नठी। ³⁰पलुस तेकी दुई साल लुगी किराए के कुड़े पुण्डा रणा अंर जे लोग तेस डाय़ा ते आवं सो तिऊँ सबुसे ता मिलअ। ³¹अंर सो निडर अई करी पुरे आजादी से परमेस्वरअ के राज के बारे मुंझ परचार ता करअ अंर परभु ईसा मसी की बात लोगुंक सिखान्दा रा लागी।

^f खास चेली के काम, किछ किताबा पाण्डी आयत 29 जोड़ी राखा